

Nihánj me se-nānā Jesucristó nana sa' cachrón síí cu'naj Juan rihaan yanj a

Nana nihánj taj xna'anj se vaa guun yuvii man se-nānā Diose a

1 Asij ataa qui'yaj Diose chumii, ne aj vaa se-nānā Diose, ne se-nānā Diose ro', canicun' so' rihaan ma'an Diose, ne Diose me so' a. ²Dan me se asij ataa qui'yaj Diose chumii, ne canicun' se-nānā Diose rihaan Diose, ³ne ca'ne' Diose suun rihaan so' qui'yaj so' nū' rasuun a. Ne sese taj se-nānā Diose, ne taj vaj a doj rasuun mán nihánj cuano ne guun ma'. ⁴So' me síí qui'yaj cunuu i'na' rasuun, ne che'é se cunuu i'na' yuvii qui'yaj so', che'é dan guun nucuaj yuvii xcaj yuvii cuentá a. Dan me se ase vaa ya'an chuguun vaa so' rihaan yuvii, ⁵ne qui'yaj so' chuguun rej rmi' rej man ní' sij man rihaan chumii nihánj sij ataa xcaj cuentá, ne ne qui'yaj canaán rej rmi' yo' rihaan so' a man adonj.

⁶Ne curihanj yo'q snó'o, ne dan me se síí ca'néé Diose me so', ne Juan cu'naj so', ⁷ne ca'na' so' cataj xna'anj so' che'é ya'an chuguun yo', ne me rá so' cuchuman rá cunudanj yuvii ni'yaj nij yuvii man ya'an chuguun yo' a. ⁸Nuveé ma'an so'

me ya'an chuguun yo'; maan se ca'na' so' cataj xna'anj so' che'é ya'an chuguun yo' a.

⁹Ne ya'an chuguun ya yo' ro', yo' me síí yaj chuguun rihaan cunudanj yuvii, che'é rej guun nucuaj nij yuvii xcaj nij yuvii cuentá a. Ne ca'na' so' rihaan chumii nihánj, ¹⁰ne cayáán so' rihaan chumii nihánj, ne ma'an so' me síí qui'yaj chumii nihánj, qui'yaj Diose, tzaj ne ne xcaj nij síí man rihaan chumii nihánj cuentá me síí me so' a ma'.

¹¹Ndaa rihaan ma'an nij tuvi' so' cuchi' so', tzaj ne ne ca'mii sa' nij so' ga so' a ma'. ¹²Tzaj ne xa' taran' nij síí ca'mii sa' ga so', tzaj ne síí amán rá ni'yaj man so' me nij so', ne danj nanj rqué so' guun nij so' ta'níí ma'an ya Diose a. ¹³Ne nij síí guun ta'nij Diose man, tzaj ne nuveé che'e se nayón nij so' rque nii nij so' me guun ta'nij Diose man nij so' ma'. Ne nuveé che'e se guun rá ma'an rej nij so' nayón nij so' rque nii nij so' me guun ta'nij Diose man nij so' ma'. Nuveé che'e se guun rá rej nij so' ca'ngaa nij so' me guun ta'nij Diose man nij so' ma'. Maan se ma'an Diose me síí qui'yaj guun ta'nij Diose man nij so' adonj.

¹⁴Gaa ne guun se-nana Diose yo' yuvi, ne cayáan so' ga ní', ne quene'en núj se vaa ve'é inanj qui'yaj so', ne dan me se taj vaj yo'ó ta'níí Rej so' Diose ma'. Tananj orún' so' me síí qui'yaj ndaa vaa qui'yaj so', ne se luj ndo'o qui'yaj so' che'é ní', ne inanj nana ya ca'mii so' adonj.

¹⁵Ne síí cu'naj Juan me síí cataj xna'anj rihaan yuvi che'é Jesucristó, ne nucuaj ca'mii so', cataj so':

—Síí nihánj ro', aj cataj xna'anj 'unj rihaan soj che'é so' gaa rque á. Dan me se cataj xna'anj 'unj rihaan soj se vaa nda' se síí ca'na' rej rihanj me so', tzaj ne 'o se sij uun chij ndo'o doj me so' rihanj nanj á. 'O se asij ataa ca'ngaa 'unj, ne aj nicun' so' nanj adonj —taj síí cu'naj Juan yo' a.

¹⁶Danj ca'mii síí cu'naj Juan che'é se Jesucristó me síí nicaj nu' rasuun sa', ne so' me síí rque se sa' man taran' ní', ne dan me se nuveé orún' se luj 'yaj so' che'é ní' ma'. 'O se que'ee se luj 'yaj so' che'é ní' adonj. ¹⁷'O se rque Diose se-tucuanj Moisés rihaan xji ní' gaa naá, tzaj ne Jesucristó me síí tacuachén nana luj do', nana ya do', rihaan ní' a. ¹⁸Ne xa' Diose, tzaj ne taj vaj a doj síí ne'en rihaan man Diose ma'. Tzaj ne xa' Jesucristó, tzaj ne orún' so' me ta'níí Diose, ne nicun' so' rihaan Diose, ne so' me síí tihaan rihaan ní' daj vaa Diose adonj.

**Nihánj me se-nana síí cu'naj
Juan síí cuta' ne man yuvi a**

¹⁹Ne nij síí uun chij rihaan nij yuvi israelitá síí man chuman'

Jerusalén me se ca'née nij so' man xrej do', man doj tuvi' síí cu'naj Leví síí cayáan gaa naá do', se vaa ca'anj nij so' xna'anj nij so' man síí cu'naj Juan me síí me Juan a. Dan me se ca'anj nij so' xna'anj nij so' man Juan, gaa ne Juan yo' ro', ca'mii so' nana nihánj rihaan nij so' a. ²⁰Dan me se yo'o cataj xna'anj síí cu'naj Juan rihaan nij so' daj sij me so', ne ne ca'mii ne so' ma'. 'O se ca'mii ya so', cataj so':

—Nuveé sij ca'née Diose tinanii man yuvi rihaan sayuun mé 'unj ma' —taj síí cu'naj Juan yo' a.

²¹Gaa ne xna'anj uún nij so' man so', cataj nij so':

—Che'é dan me síí mé so' ga. Síí cu'naj Elías síí nata' se-nana Diose gaa naá mé so' na' —taj uún nij so', xna'anj nij so' man Juan a.

—Taj ma'. Nuveé so' mé 'unj ma' —taj uún síí cu'naj Juan yo' a.

—Ne'en núj se vaa vaa güii ca'na' yo'o síí nata' se-nana Diose, ne sij nata' yo' mé so' na' —taj uún nij so', xna'anj nij so' man Juan a.

—Taj ma' —taj síí cu'naj Juan yo' a.

²²Che'é dan cataj nij so':

—Tzaj ne cataj yá so' me sij mé so', gaa ne ca'vee cataj xna'anj núj rihaan nij síí ca'née man núj ca'na' núj daj sij mé so' a. Me sij mé so' ga. Daj vaa yo', rá so' ga —taj uún nij so', xna'anj nij so' man Juan a.

²³Ne cataj síí cu'naj Juan:

—Síí cu'naj Isaías síí nata' se-nana Diose gaa naá ro', cataj xna'anj so' che'é suun 'yaj sunj a. Dan me se 'unj me síí nucuaj ndo'o a'mii rej

tacaan, ne taj 'un̄j rihaan yuvii se vaa nuchran' nimán yuvii, ne ve'elé ca'mii nij yuvii ga síí 'nij ra'a man ní' asa' ca'na' so' a —taj síí cu'naj Juan yo' a.

²⁴Ne ta'aj nij síí ca'na' rihaan síí cu'naj Juan me síí fariseo, ²⁵ne cataj nij so' rihaan síí cu'naj Juan a: —Dan me se nuveé sij ca'née Diose t̄inanii man yuvii rihaan sayuun mé so' ma'. Nuveé sij cu'naj Elías mé so' ma'. Nuveé sij nata' se-nana Diose yo' mé so' ma'. Che'é dan ne nó xcúún so' cuta' ne so' man yuvii —taj nij síí fariseo yo' rihaan síí cu'naj Juan a.

²⁶Ne cataj xna'an̄j síí cu'naj Juan rihaan nij so', cataj so':

—'Un̄j me síí uta' ne uun man yuvii a. Tzaj ne vaa yo'ó síí nicun' sca'núj soj, ne ne ne'en soj man so' ma'. ²⁷Ne so' me síí 'na' rej xcoj, ne sij sa' uxrá doj me so' rihan̄j, ne daj chihaa m̄ij se quis̄ij raj quirij canj 'nij tacóó so' ma' —taj síí cu'naj Juan rihaan nij síí fariseo yo' a.

²⁸Danj guun rej Betania rej rnej tu'va chráa cu'naj Jordán, rej vaj síí cu'naj Juan gaa cuta' ne so' man yuvii a.

²⁹Dan me se yo'ó güii, ne quene'en síí cu'naj Juan se vaa ca'na' Jesucristó rihaan so', ne cataj so':

—Ni'yaj soj ei. Ase vaa matzinz̄j cavi' rihaan Diose vaa síí nihánj, ne dan me se síí nihánj me síí ca'nee cacun' tumé yuvii man rihaan chumii nihánj, ³⁰ne síí nihánj ro', cataj xna'an̄j 'un̄j rihaan soj che'é so' gaa rque, ne cataj 'un̄j se vaa ca'vee se sij 'na' rej xcoj me so', tzaj

ne sij uun chij doj rihaan 'un̄j me so' a. 'O se asij ataa ca'ngaa 'un̄j, ne aj nicun' so' nan̄j adonj. ³¹Dan me se gaa rque ro', ne quene'en ma'an̄j sese sij nihánj me so' ma'. Tzaj ne maan che'é se me rá 'un̄j quene'en nij yuvii israelitá man so' ro', che'é dan ca'ná' 'un̄j, ne che'é dan cuta' ne 'un̄j man yuvii nan̄j á —taj síí cu'naj Juan yo' a.

³²Gaa ne cataj xna'an̄j ya síí cu'naj Juan che'é se vaa quene'en ma'an so', cataj so':

—Quene'én 'un̄j se vaa nanij Nimán Diose rej xta', ne ase vaa 'o cha'aan vaa Nimán Diose yo', ne ca'na' yo', quitáa yo' raá Jesucristó ei. ³³Gaa ne nu' xcaj 'un̄j cuentá se vaa ma'an so' me síí ca'née Diose á. 'O se síí ca'née mán 'un̄j cuta' ne 'un̄j man yuvii me se ma'an so' cataj rihaan 'un̄j se vaa sese quene'én 'un̄j nanij Nimán Diose raá yo'o so', ne sese quitaj Nimán Diose yo' raá so', ne so' me síí ca'née Diose, ne cayáán uxrá Nimán Diose ga yuvii, qui'yaj so' a, taj síí ca'née manj adonj. ³⁴Gaa ne quene'en ma'an 'un̄j man Jesucristó nihánj, se vaa nanij Nimán Diose raá so', ne aj cataj ya 'un̄j rihaan soj se vaa ta'nij Diose me so' ei —taj síí cu'naj Juan yo' a.

Nana nihánj taj xna'an̄j se vaa guun che'e va'n̄uj nij snóo canoco' nij so' man Jesucristó a

³⁵Güii a'yuj me se canicun' uún síí cu'naj Juan ga vij tuvi' nij síí tucu'yón se-nana so' a. ³⁶Ne ni'yaj uxrá síí cu'naj Juan man Jesucristó gaa chée Jesucristó, ne cataj síí cu'naj Juan:

—Ni'yaj roj soj ei. Ase vaa matzinj cavi' rihaan Diose vaa síf nihánj á —taj síf cu'naj Juan a.

³⁷Dan me se cuno roj síf tucu'yón se-nana Juan nana ca'mii so', ne canoco' roj so' man Jesucristó a.

³⁸Gaa ne canicaj Jesucristó, ne quene'en so' se vaa canoco' roj so' man so', ne cataj Jesucristó rihaan roj so' a:

—Vaa se achiin man roj soj na' —taj Jesucristó, xná'anj Jesucristó man roj so' a.

Gaa ne xná'anj roj so', cataj roj so':

—Me rej né so', rabbí —cataj roj so', xná'anj roj so' man Jesucristó, ne nana "rabbí" yo' taj "maestró" a.

³⁹Gaa ne cataj Jesucristó rihaan roj so' a:

—Ca'anj ní', ne quene'en soj á —taj Jesucristó a.

Che'é dan me ca'anj roj so', ne quene'en roj so' rej ne Jesucristó, ne cunuú roj so' tucúa' so' cunu' güiii yo' a. Dan me se aga' ca'anj rej anoco' güiii me orá ca'mii roj so' ga Jesucristó a.

⁴⁰Dan me se yo'o tuvi' roj síf cuno nana ca'mii síf cu'naj Juan ne canoco' man Jesucristó ro', me síf cu'naj Andrés, ne tinúú síf cu'naj Simón Pedró me uún so' a. ⁴¹Asino yaan nari' síf cu'naj Andrés man tinúú so' síf cu'naj Simón, ne cataj so' rihaan tinúú so':

—Nari' núj man Mesías ei —taj so' rihaan tinúú so' a. Ne nana "Mesías" taj "síf ca'née Diose tinanii man yuvi' rihaan sayuun" a.

⁴²Ne ca'anj nicaj so' man tinúú so' rihaan Jesucristó, gaa ne ni'yaj

uxrá Jesucristó man síf cu'naj Simón yo', ne cataj so':

—Síf cu'naj Simón mé so', ne ta'níí síf cu'naj Juan mé so' á. Tzaj ne ndaa yaj, ne Cefas cu'naj so' á —taj Jesucristó rihaan so' a. Ne nana "Cefas" ro', xná'anj hebreo me yo', ne 'o cuyaan vaa yo' ga nana "Pedró", ne taj yo' se vaa ase vaa 'o yuvej vaa síf cu'naj Pedró, ne sca' nimán so' a.

Nana nihánj taj xna'anj se vaa canacúun Jesucristó man síf cu'naj Felipé do', man síf cu'naj Natanael do', se vaa canoco' roj so' man so' a

⁴³Dan me se yo'ó güii uún me rá Jesucristó cavi' so' ca'anj so' estadó Galilea, ne nari' Jesucristó man síf cu'naj Felipé, ne dan me se cataj Jesucristó rihaan so' a:

—Canocó' so' manj, ca'anj ní' á —taj Jesucristó rihaan so' a.

⁴⁴Ne Felipé ro', me síf ne chuman' Betsaida, ne Betsaida me chiháán síf cu'naj Andrés do', síf cu'naj Pedró do', uún a. ⁴⁵Veé dan, ne nari' síf cu'naj Felipé yo' man síf cu'naj Natanael, ne cataj so':

—Aj nari' núj man síf ca'née Diose tinanii man yuvi' rihaan sayuun, ne dan me se síf ca'mii Moisés che'é gaa cuchruj so' se-tucuanj so' me so', ne nij síf nata' se-nana Diose gaa naá ro', nata' uún nij so' che'é so' nanj adonj. Ne dan me se Jesús ta'níí síf cu'naj José, síf ne chuman' Nazaret me so' ei —taj Felipé rihaan Natanael yo' a.

⁴⁶Ne cataj Natanael yo':

—Taj vaj síf sa' avii chuman' Nazaret ma' —taj Natanael yo' a.

Ne cataj Felipé:

—Ca'anj ní', quene'én so' man so', sese me rá so' á —taj Felipé rihaan so' a.

⁴⁷Veé dan, ne quene'en Jesucristó se vaa ca'na' Natanael rihaan so', ne ca'mii so' 'o nana che'é Natanael, cataj so':

—Ni'yaj soj ei. Ya sij israelitá me síí 'na' cuano ei. Nica a'mii so', ne a'mii so' nana tiha' yu'unj ma' —taj Jesucristó ni'yaj so' man Natanael yo' a.

⁴⁸Gaa ne xna'anj Natanael yo' man Jesucristó, cataj so':

—Asa' a'vee ne'én so' manj ga —taj so', xna'anj so' man Jesucristó a.

Ne cataj Jesucristó:

—Asij ataa ca'mii Felipé rihaan so' do', asij cayáan so' tacóo chruun man chruj higó raá do', ne aj quene'én 'unj man so' ei —taj Jesucristó rihaan so' a.

⁴⁹Gaa ne cataj Natanael:

—Ta'nij Diose mé so', maestro. Sij nicaj suun rey uun chij rihaan ní' sij israelitá mé so' á —taj Natanael a.

⁵⁰Gaa ne cataj Jesucristó rihaan so':

—Che'é se cataj 'unj rihaan so' se vaa quene'én 'unj man so' gaa cayáan so' tacóo chruun man chruj higó ro', maan che'é dan amán rá so' ni'yaj so' manj na'. Tzaj ne quene'én so' que'ee doj rasuun nocoo doj uún a á. ⁵¹Ya ya cataj xna'anj 'unj rihaan nij soj cuano se vaa quene'en soj naxra' rej xtá', ne quene'en soj man nij se-mozó Diose, ne cavií nij so' xtá', ne nanij uún nij so' rihaan 'unj sij ca'née Diose nicaj yu'unj man yuvií adonj —taj Jesucristó rihaan taran' nij so' a.

Nana nihánj taj xna'anj se vaa naqui'yaj Jesucristó na vinó man na uun gaa canuú cha'anj nara'ga chuman' Caná a

2 Cachén yavíj güii, gaa ne canuú cha'anj nara'ga chuman' Caná chuman' naj estadó Galilea, ne ca'anj nii Jesucristó cha'anj yo' a. ²Dan me se nacúún nii man Jesucristó do', man nij síí tucuyón se-nana so' do', ca'na' nij so' cha'anj yo' a. ³Veé dan, ne navij na vinó man nij síí navij rá cha'anj yo', ne che'é dan cataj nii Jesucristó rihaan Jesucristó a:

—Taj vaj na vinó rihaan nij síí navij rá cha'anj ma' —taj no' a.

⁴Gaa ne cataj Jesucristó rihaan nii so' a:

—Taj che'é ca'mii so' danj rihanj ma'. Ni'yaj so', ne ataa quisij güii quí'yáj suun sa' nocoo á —taj so' no nii so' a.

⁵Gaa ne cataj xna'anj nii Jesucristó rihaan nij mozó a:

—Cuno nij soj nu' se vaa cataj xna'anj ta'níj rihaan soj, ne qui'yaj soj nu' se vaa cataj so' á —taj no' rihaan nij mozó a.

⁶Veé dan, ne ne vatan' xruj yahij xij a. Xruj nicaj ca'anj chihaa litró na me xruj yo', ne xruj araa nij yuvií israelitá na rásuun nij so' na'ya' nij so' ndaa vaa taj se-tucuanj Moisés me xruj yo' a. ⁷Ne ca'ne' Jesucristó suun rihaan nij mozó, cataj so':

—Caraa soj na rque nij xruj yahij yo' á —taj so' rihaan nij mozó yo' a.

Gaa ne caraa nij mozó na, ne yo'oo caraa ndaa tu'va xruj yo', qui'yaj nij so' a. ⁸Gaa ne cataj xna'anj uún

Jesucristó rihaan nij mozó yo', cataj so':

—Yaj ro', quirii soj doj na nuu rque xruj, ne ca'anj nicaj soj na yo' rihaan síi uun chij rihaan nij mozó anicaj co'oo rihaan nij yuvii á —taj Jesucristó a.

Ne danj qui'yaj nij so' a.

⁹Veé dan, ne síi uun chij rihaan nij mozó anicaj co'oo rihaan yuvii me se co'o so' doj tzin' na yo', tzaj ne nuveé na uun me yo' a ma'. Nu' guun na yo' na vinó nanj adonj. Ne ne quene'en so' me rej cavii na vinó yo' a ma'. 'O se maan inanj nij mozó quirii na yo' rque xruj ro', orún' nij so' me síi quene'en me rej cavii na yo' a. Veé dan, ne nacúún síi uun chij yo' man síi nara'aa ca'na' síi nara'aa rihaan so', ¹⁰ne cataj so':

—Tucuáan 'yaj ní' ro', me se nanj vaa yo' nanj á. Asino yaan go' ní' na vinó sa' doj co'o nij síi tihaj 'na' cha'anj, gaa ne ndaa quisíj guun xno yuvii asuun, gaa ne go' ní' na vinó nij doj co'o nij so' a. Tzaj ne so' me se ino qui'yáá so' chuguanj. Dan me se ndaa yaj quirii so' na vinó sa' doj yo' asanj —taj síi uun chij yo' rihaan síi nara'aa yo' a.

¹¹Nihánj me se guun che'e Jesucristó qui'yaj Jesucristó suun sa' nocoo, ne nu' nihánj me se vaa qui'yaj so' chuman' Caná chuman' naj estadó Galilea a. Che'é dan xcaj nij yuvii cuentá se vaa sij sa' uxrá me so', qui'yaj so', ne cuchumán rá nij síi tucu'yón se-nana so' ni'yaj nij so' man so' a.

¹²Gaa quisíj canuú cha'anj nara'aa yo', gaa ne ca'anj Jesucristó do', nii so' do', nij tinúú so' do', nij síi

tucu'yón se-nana so' do', chuman' Capernaum, ne doj güii cayáan nij so' chuman' yo' a.

Nana nihánj taj xna'anj daj qui'yaj Jesucristó gaa quirii so' man síi chi'ii rá nuvií nocoo a

¹³Dan me se ataa doj quisij cha'anj pascuá cha'anj navij rá nij yuvii israelitá, gaa ne cavii Jesucristó ca'anj so' chuman' Jerusalén a. ¹⁴Gaa ne rá nuvií nocoo ro', naj 'o yu'vee nocoo 'yaj nij yuvii israelitá, ne maan dan mán nij so' tu'vej nij so' scúj do', matzinj do', cha'aan do' a. Ne vaa síi ne rihaan chruun mesá, ne síi natuná sa'anj che'é yuvii atúj rque nuvií me nij so' a. ¹⁵Gaa ne nicaj Jesucristó ne', qui'yaj so' cuartá, go' so' man nij síi tu'vej xcuu do', man nij síi natuná sa'anj do', ne quirii so' xe' man taran' nij so' a. Ne rano so' man nij scúj do', man nij matzinj do', quirii so' xe' a. Ne ticha'nuu so' se-sa'anj síi natuná sa'anj rihaan yo'óo, ne tinaxru' so' nij chruun mesá a. ¹⁶Gaa ne cataj so' rihaan nij síi tu'vej cha'aan a:

—Quirii soj rasuun nihánj xe' cuaj ei. Se guun qui'yaj soj yu'vee tucuá Réj ma' —taj so' rihaan nij síi tu'vej cha'aan man rá nuvií yo' a.

¹⁷Gaa ne ninuj rá nij síi tucu'yón se-nana Jesucristó se vaa nó nana nihánj rihaan danj Diose a: "Che'é se 'ee ndo'o raj ve' tucuá so', che'é dan ca'née nimanj qui'yaj sunj che'é yo' a". Yo' me nana nó rihaan danj Diose a.

Nana nihánj taj xna'anj se vaa ca'mii Jesucristó che'é güii cunuú i'na' uún so' a

¹⁸Quene'en nij síi uun chij rihaan nij yuvii israelitá se vaa qui'yaj

Jesucristó rá nuvií yo', gaa ne che'é dan cataj nij so' rihaan Jesucristó a:

—Ne nó xcúún so' quirij so' man síí tu'vej xcuu man rá nuvií nocoo, rá núj ma'. Maan se qui'yáá so' 'o suun sa' nocoo quene'en núj, gaa ne guun ya rá núj se vaa no xcúún so' qui'yáá so' danj ei —taj nij so' rihaan Jesucristó a.

¹⁹Ne cataj Jesucristó rihaan nij so' a:

—Tiri' soj man nuvií nihánj, ne rque va'núj güii, ne cunuu sa' uún nuvií nihánj, qui'yáj ei —taj Jesucristó a.

²⁰Che'é dan cataj nij síí uun chij yo' rihaan Jesucristó a:

—Vij chihaa vatán' ya yo' qui'yaj suun nij síí cune' nuvií nihánj, tzaj ne asa' ca'vee naqui'yaj sa' so' nuvií nihánj rque va'núj güii, rá so' ga —taj nij so' rihaan Jesucristó a.

²¹Tzaj ne ne ca'mii Jesucristó che'é maan nuvií nocoo yo' ma'. Maan se ca'mii so' che'é ma'an yan cunuu i'na' uún so' rque va'núj güii a. ²²Che'é dan, gaa quisij cavi' so' ne cunuu i'na' uún so', gaa ne nanuj rá nij síí tucu'yón se-nana so' nana nihánj nana aj ca'mii so', ne cuchumán rá nij so' nana no rihaan danj Diose nana taj xna'anj daj quirán' síí ca'nej Diose tinanii man yuvií rihaan sayuun, ne cuchumán rá nij so' nana ca'mii ma'an Jesucristó uún a.

Nana nihánj taj xna'anj se vaa ne'en Jesucristó daj vaa nimán yuvií a

²³Dan me se nu' nihánj qui'yaj Jesucristó chuman' Jerusalén gaa canuú cha'anj pascuá, ne che'é dan que'ee ndo'o nij yuvií cuchumán rá

se vaa sij ca'née Diose me so' a. 'O se quene'en nij yuvií nij suun sa' nocoo qui'yaj suun so' a. ²⁴Tzaj ne ma'an Jesucristó, ne gaa nucuaj rá so' man nij yuvií yo' ma'. 'O se so' me síí ne'en cunudanj, ²⁵ne ne cachiin yo'o síí cataj xna'anj rihaan Jesucristó daj vaa nimán yuvií ma'. 'O se ma'an so' me síí quene'en daj vaa nimán nu' nij yuvií adonj.

Nana nihánj taj xna'anj daj ca'mii Jesucristó ga síí cu'naj Nicodemo a

3 Dan me se vaa yo'o síí fariseo cu'naj Nicodemo, ne síí uun chij rihaan nij yuvií israelitá me so' a. ²Dan me se rej nij ca'na' so' rihaan Jesucristó, ne cataj so':

—Ne'en núj se vaa sij ca'née Diose tucu'yón man yuvií mé so', maestro. 'O se sese nuvi' Diose racuján mán so', ne ne guun nucuáá so' qui'yáá so' ndaa vaa 'yáá so' nihánj cuano asuun ma' —taj so' rihaan Jesucristó a.

³Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa síí se ca'ngaa naca uún ro', daj chihaa mój se guun nucuaj so' quene'en so' man Diose asa' guun chij Diose rihaan chumii nihánj a ma' —taj Jesucristó rihaan so' a.

⁴Dan me se xná'anj síí cu'naj Nicodemo man Jesucristó, cataj so':

—Asa' ca'vee ca'ngaa uún 'o síí aj cachij ga. Ca'vee xa' catuu uún so' rque nii so' ne ca'ngaa naca uún so' gaa a na' —taj Nicodemo, xná'anj so' man Jesucristó a.

⁵Gaa ne cataj uún Jesucristó:

—Ya ya cataj xna'anj 'unj rihaan so' se vaa sese se ca'ngaa yo'o so'

qui'yaj na ne qui'yaj Nimán Diose, ne se guun nucuaj so' catuú so' rihaan Diose asá' guun chij Diose rihaan chumií nihánj ma'. ⁶O se sese nanj yuvií qui'yaj ca'ngaa ní', ne nanj yuvií man rihaan chumií nihánj me ní', tzaj ne sese ca'ngaa ní' qui'yaj Nimán Diose, ne ase vaa sa' Nimán Diose ro', danj gaa sa' nimán ní' nanj adonj. ⁷Se caráya'anj tihá' so' se vaa cataj 'unj rihaan so' ma'. 'O se no xcuún nij soj ca'ngaa ya uún nij soj adonj. ⁸Dan me se xcaj so' cuentá ni'yaj so' nana a. Avii nana yo', ne cayuj 'yaj yo', tzaj ne ne ne'én so' me rej avii yo' 'na' yo', ne ne ne'én so' me rej ca'anj yo' ma'. Ne ase vaa nana ro', danj vaa Nimán Diose, ne dan me se sese cunuu sa' nimán yo'o so' qui'yaj Nimán Diose, ne taj ne'én' asá' ca'vee cunuu sa' nimán so' qui'yaj Nimán Diose ma' — taj Jesucristó rihaan síí cu'naj Nicodemo yo' a.

⁹Veé dan, ne xná'anj síí cu'naj Nicodemo, cataj so':

—Asá' ca'vee qui'yaj yuvií danj ga —taj so', xná'anj so' a.

¹⁰Gaa ne xná'anj uún Jesucristó man so', cataj Jesucristó:

—'O se me che'é sij uun chij sij tucu'yón se-nana Diose rihaan nij yuvií israelitá mé so', tzaj ne ne ne'én so' nana nihánj nana cataj 'unj rihaan so' ga. ¹¹Ya ya cataj xna'anj 'unj rihaan so' se vaa xa' núj, tzaj ne che'é inanj se vaa ne'en núj a'mii núj ne che'é se vaa quene'en núj nata' núj adonj. Tzaj ne ne amán rá nij soj nana a'mii núj ma'. ¹²Dan me se nanj che'é rasuun man rihaan chumií nihánj

cataj xna'anj 'unj rihaan soj, tzaj ne ne cuchuman rá soj ma'. Asá' ca'vee cuchuman rá soj sese cataj xna'anj 'unj rihaan soj che'é rasuun man rej xtá' ga. ¹³O se taj vaj síí cavii rej xtá' nanij rihaan yo'óo cataj xna'anj rihaan soj daj vaa nij rasuun man rej xtá' ma'. Maan orún' 'unj sij ca'née Diose nicaj yu'unj man yuvií ro', me síí 'na' rej xtá' nanij rihaan yo'óo nihánj, ne che'é dan ma'anj me síí guun nucuaj cataj xna'anj rihaan soj che'é rej xtá' adonj. ¹⁴Dan me se ase vaa tacavii síí cu'naj Moisés xcuáa aga' raá chruun rej tacaan ro', danj qui'yaj nii manj sij ca'née Diose nicaj yu'unj man yuvií, ne tacavii nii manj raá 'o chruun, ¹⁵ne ndaa síj, gaa ne taran' nij síí cuchuman rá ni'yaj manj ro', cayáan nij so' ga Diose nu' cavii nu' ca'anj nanj adonj —taj Jesucristó rihaan síí cu'naj Nicodemo a.

**Nana nihánj taj xna'anj
me che'é ca'na' Jesucristó
rihaan chumií nihánj a**

¹⁶Dan me se 'ee uxrá rá Diose ni'yaj Diose man ní' sij man rihaan chumií nihánj, ne nda' se orún' ta'níí Diose, tzaj ne rqué uun Diose ta'níí so' yo', ca'na' ta'níí so' rihaan chumií nihánj, ne cataj Diose se vaa nij yuvií amán rá ni'yaj man ta'níí so' ro', se cavi' nij so' daj chihaa mój ma'. Tananj cane nij so' ga Diose nu' cavii nu' ca'anj nanj adonj. ¹⁷O se ne ca'nej Diose ta'níí so' che'é rej cutá' ta'níí so' cacun' xráa nij yuvií man rihaan chumií nihánj ma'. Tananj ca'née Diose man ta'níí so' rihaan chumií

nihánj che'é rej t̄inanii ta'níi so' man nij yuvii rihaan chrej chi'ii uun chij nimán nij so' adonj. ¹⁸Ní' sij amán rá ni'yaj man ta'níi Diose me se taj vaj sayuun quirán' ní' ma'. Tzaj ne s̄íi ne amán rá ni'yaj man so' ro', aj cataj Diose se vaa ya quirán' so' sayuun nanj á. Che'é se ne cuchuman ya rá so' ni'yaj so' orún' ya ta'níi Diose ro', che'é dan quirán' ya so' sayuun adonj.

¹⁹Dan me se nihánj me cacun' tumé nij s̄íi quirán' sayuun yo' a. 'O se aj ca'na' Jesucristó rihaan chumii nihánj, ne ase vaa 'o ya'an chuguun vaa so', tzaj ne caran' inanj rá nij s̄íi man rihaan chumii nihánj cachee nij so' rej rmi', ne ne ca'vej rá nij so' quinichrun' nij so' rihaan ya'an chuguun yo' a. 'O se chi'ii ndo'lo vaa se qui'yaj nij so' adonj. ²⁰Dan me se nu' yuvii 'yaj se chi'ii ro', taj ri'yunj nij so' ni'yaj nij so' ya'an chuguun yo', ne ne 'na' nij so' rihaan ya'an chuguun yo' ma'. 'O se na'vej rá nij so' curuvi' se vaa 'yaj nij so' ma'. ²¹Tzaj ne nij s̄íi me rá canoco' nana ya ro', 'na' nij so' rihaan ya'an chuguun yo', ne dan me se gaa 'yaj nij so' danj, ne ruvi' se vaa 'yaj nij so', ne s̄íi nocó' man Diose me nij so', ne Diose racuíj man nij so' nu' se vaa 'yaj nij so' a.

Nana nihánj taj xna'anj se vaa sij sa' doj rihaan s̄íi cu'naj Juan me Jesucristó, taj ma'an Juan yo' a

²²Dan me se gaa quisij nu' se vaa qui'yaj Jesucristó chuman' Jerusalén, gaa ne curihanj Jesucristó do', nij s̄íi tucu'yón se-nana so' do', chuman' Jerusalén, ne ca'anj nij so' ne nij so' chuman'

le'ej nii naj estadó Judea, ne veé dan vaj nij so' cuta' ne nij so' man yuvii do' a. ²³Ne s̄íi cu'naj Juan ro', ne chuman' cu'naj Enón, ne uta' ne so' man yuvii uún a. 'O se nichrun' naj chuman' Enón ga chuman' Salim, ne man uxrá na cata' ne yuvii rej yo', ne ca'na' uxrá yuvii, ne ata' ne nij yuvii adonj. ²⁴'O se ataa doj caxrii nii taga' man s̄íi cu'naj Juan yo' gaa ei. ²⁵Veé dan, ne guun che'e nij s̄íi tucu'yón se-nana Juan ca'mii cunu' nij so' ga 'o s̄íi uun chij rihaan nij yuvii israelitá che'é nana cataj xna'anj s̄íi cu'naj Moisés, se vaa daj qui'yaj yuvii na'ya' yuvii, gaa ne ca'vee guun niha' rá Diose ni'yaj Diose man nij so' a. ²⁶Veé dan, ne cuchi' nij s̄íi tucu'yón se-nana Juan rihaan ma'an Juan, ne cataj nij so':

—S̄íi chéé ga so' gaa vaj ní' rej rnej tu'va chráa cu'naj Jordán ro', s̄íi natá' so' che'é ro', uta' ne so' man yuvii cuango, ne 'anj taran' nij yuvii rej vaj so', maestro —taj nij s̄íi tucu'yón se-nana Juan rihaan Juan a.

²⁷Gaa ne cataj Juan:

—A 'ó yuvii na'vee canoco' daj chihaa mij man so', sese nuveé Diose me s̄íi ca'vej rá ma'. ²⁸'O se aj cuno ma'an soj nana cataj xna'anj 'unj rihaan soj se vaa nuveé sij ca'née Diose t̄inanii man yuvii rihaan sayuun mej a. Maan se 'unj me s̄íi ca'née Diose ca'na' asino yaan rihaan s̄íi t̄inanii man yuvii rihaan sayuun ei. ²⁹Ase vaa s̄íi xcaj man chana ne nara'aa ro', vaa so', ne ase vaa tuvi' s̄íi nara'aa ro', danj vaa 'unj, ne nicún' 'unj unó 'unj se vaa a'mii so', ne uun niha' uxrá raj, 'yaj nana a'mii

sí nara'aa, ne che'é dan me uun niha' uxrá raj adonj. ³⁰Q se no xcúun so' guun chij so' doj, ne 'unj me se no xcúnj gunj sí nica' doj rihaan so' adonj —taj sí cu'naj Juan yo' a.

Nana nihánj taj xna'anj se vaa no xcúun ní' cuchuman rá ní' ní'yaj ní' man Jesucristó a

³¹Sí nanij rihaan chumii nihánj ro', so' me sí uun chij rihaan cunudanj rasuun adonj. Nij sí man rihaan chumii nihánj, tzaj ne che'é inanj rasuun man rihaan chumii nihánj a'mii nij so', ne taj vaj yo'ó rasuun ne'len nij so' ma'. Tzaj ne sí nanij rej xtá' ro', ³²so' me sí a'mii che'é se vaa quene'len so' rej xtá' do', che'é nana cuno so' rej xtá' do', ne taj vaj sí amán rá uno se-nana so' ma'. ³³Tzaj ne sí amán rá se-nana so' ro', so' me sí taj se vaa nana ya me se-nana Diose adonj. ³⁴Sí ca'néé Diose man ro', me sí a'mii se-nana Diose á. 'Q se rqué ndo'o Diose Nimán Diose rihaan so' adonj. ³⁵Ee rá Rej so' man so', che'é yan ta'nij Rej so' me so', ne rqué Rej so' cunudanj rasuun man so', che'é rej guun chij so' rihaan cunudanj nij rasuun yo' adonj. ³⁶Sí amán rá ni'yaj man ta'níí Diose ro', so' me sí ve'é cayáan ga Diose nu' cavii nu' ca'anj, tzaj ne sí na'vej rá cuno rihaan ta'níí Diose ro', daj chihaa mīj se cayáan so' ga Diose ma'. Tananj yo'o ca'maan rá Diose ni'yaj Diose man so', ne yo'o quirañ' so' sayuun, qui'yaj Diose adonj.

Nana nihánj taj xna'anj che'é nana ca'mii Jesucristó ga 'o chana samaritana a

4 Dan me se xcaj Jesucristó cuentá se vaa cuchi' nana

rihaan nij sí fariseo se vaa doj a vaa nij sí tucu'yón se-nana Jesucristó rihaan nij sí tucu'yón se-nana Juan, ne nocoo doj nij yuvii cata' ne qui'yaj Jesucristó rihaan nij yuvii cata' ne qui'yaj Juan a. ²Tzaj ne nuveé ma'an Jesucristó me sí cuta' ne man nij yuvii ma'. Maan nij sí tucu'yón se-nana so' cuta' ne man nij yuvii a. ³Dan me se xcaj Jesucristó cuentá se vaa cuchi' nana yo' rihaan nij sí fariseo, gaa ne cavii so' estadó Judea ca'anj so' estadó Galilea a. ⁴Q se ya cachén so' estadó Samaria yo', ⁵ne cuchi' so' tu'va yo'o chuman' naj estadó Samaria, ne Sicar cu'naj chuman' yo' a. Dan me se nichrun' naj chuman' yo' tu'va yo'óo rqué sí cu'naj Jacob rihaan ta'níí so' sí cu'naj José gaa naá, ⁶ne tu'va chuman' yo' nuú yo'o na yu'uj qui'yaj sí cu'naj Jacob gaa naá a. Dan me se xe' man Jesucristó che'é yan cachéé uxrá so' ca'na' so' chuman' yo', ne che'é dan ca'anj cané so' tu'va na yu'uj yo', ne caxuj me yo' a.

⁷Dan me se ca'na' 'o chana samaritana na yu'uj quirii no' na, ne cataj Jesucristó rihaan chana yo' a: —Qui'yáá so' se ndo'o, ne rque so' doj na co'oj ruguanj —taj Jesucristó no chana yo' a.

⁸Ne taj vaj nij sí tucu'yón se-nana Jesucristó nicun' ga so' gaa ma'. 'Q se ca'anj nij so' chuman' quirañ' nij so' se chá a.

⁹Veé dan, ne cataj chana samaritana yo' rihaan Jesucristó a: —Me che'é cachín so' na rihanj, co'o so', ne ni'yaj so', ne sij israelitá mé so', ne chana samaritana mej

ga —taj chana yo', xná'anj no' man Jesucristó a.

⁹O se ne a'mii sa' nij sí israelitá ga nij sí samaritano ma'.

¹⁰Gaa ne cataj Jesucristó rihaan no' a:

—Sese xcaj so' cuentá che'é se luj qui'yaj Diöse che'é so' ne sese quene'én so' me sí achíin na mán so' cuango, ne cachíin so' na 'yaj vaa i'na' yuvii man so' co'o so', ne rque so' na yo' co'o so' saj adonj —taj Jesucristó no chana yo' a.

¹¹Gaa ne cataj chana rihaan Jesucristó a:

—Tzaj ne taj vaj sihuu rihaan so' quirii so' na nihánj ma'. Ne cunu ndo'o nuú na rá yu'uj nihánj, señor. Me rej quirii so' na 'yaj vaa i'na' yuvii rque so' co'oj ga. ¹²Dan me se xii ní sí cu'naj Jacob ro', so' me sí co'o na nuu na yu'uj nihánj, ne veé dan me co'o ta'níi so' do', daán so' xcuu do', ne rque so' na nihánj co'o núj a. Ne sij sa' doj rihaan so' mé so', rá so' na' —taj chana yo' rihaan Jesucristó a.

¹³Gaa ne cataj Jesucristó rihaan no':

—Cunudanj nij sí co'o na nuu rá yu'uj nihánj ro', canacoó uún nij so' na vaa güii, ne ca'na' uún nij so' quirii nij so' doj na a adonj. ¹⁴Tzaj ne sí co'o na rque 'unj nihánj me se daj chihaa mój se canacoó uún so' na yo' a ma'. Ase vaa rej ve'é uxrá avii na ro', danj gaa nimán so', ne cunuú uxrá se luj nimán so', ne gaa i'na' so' ga Diöse nu' cavii nu' ca'anj, qui'yaj na rquej adonj —taj Jesucristó rihaan chana yo' a.

¹⁵Ne cataj chana rihaan so':

—Rque so' doj na yo' co'oj, señor. Ne se canacoó 'unj na, ne se ca'na'

uún 'unj quirij na nihánj a ma' —taj chana rihaan Jesucristó a.

¹⁶Ne cataj Jesucristó rihaan no' a: —Ca'anj nacunj so' man nica so', ne ca'na' so' nihánj á —taj so' rihaan no' a.

¹⁷Ne cataj chana rihaan so': —Taj vaj nicaj ma' —taj chana yo' a.

Ne cataj Jesucristó rihaan no' a: —Cunaj uxrá ca'mii so', cataj so' se vaa taj vaj nica so' ei. ¹⁸O se asij rque me se quisij ya 'un' snó'o xcaj so', tzaj ne tanáj so' man nij so', ne yaj nihánj me se nicaj so' man 'ó so', tzaj ne nuveé nica so' me so' ma'. Che'é dan ya uxrá ca'mii so' ei —taj Jesucristó no chana yo' a.

¹⁹Ne cataj chana rihaan so':

—Cuanó nihánj xcaj 'unj cuentá se vaa sij nata' se-nana Diöse mé so', señor. ²⁰Dan me se xii núj ro', quina'víj nij so' xráá quij nihánj, tzaj ne soj sij israelitá taj se vaa orún' chuman' Jerusalén me rej nō xcúin ní na'vij ní rihaan Diöse, taj soj adonj —taj chana yo' rihaan Jesucristó a.

²¹Gaa ne cataj Jesucristó rihaan chana a:

—Cuchuman rá so' nana nihánj nana cataj xna'anj 'unj rihaan so', nocoj. Dan me se vaa güii, ne se cavii nij soj raa quij nihánj do', se ca'anj nij soj chuman' Jerusalén do', na'vij soj rihaan Rej ní Diöse ma'. ²²Dan me se ne ne'en nij soj man sí na'víj soj rihaan ma'. Tzaj ne xa' núj sij israelitá, tzaj ne ne'en núj man sí na'víj núj rihaan a. 'O se núj sij israelitá me nij sí qui'yaj quinani yuvii rihaan sayuun a.

²³Tzaj ne vaa güii, ne nij síí na'v'ij sa' rihaan Rej ní' Diose ro', guun inanj rá nij so' na'v'ij nij so' rihaan Diose, ne me rej ma'an vaj nij so' na'v'ij ya nij so' rihaan Diose nanj adonj. Ne cuano nihánj me aj guun che'e yuvii qui'yaj yuvii danj adonj. 'O se me ndo'o rá Rej ní' Diose na'v'ij ya yuvii rihaan so' ei. ²⁴Dan me se me ma'an rej vaj ní' nicun' Diose, ne che'é dan ní' sij na'v'ij rihaan Diose ro', me ma'an rej mán ní', ne no xcúún ní' guun nihá' rá ní' na'v'ij ya ní' rihaan so' adonj —taj Jesucristó rihaan chana yo' a.

²⁵Gaa ne cataj chana rihaan Jesucristó a:

—Ne'én 'unj se vaa vaa güii, ne ca'na' síí ca'nej Diose tinanii man ní' rihaan sayuun, ne asa' ca'na' so', ne cataj xna'anj ma'an so' che'é cunudanj rasuun rihaan ní' nanj á —taj chana rihaan Jesucristó a.

²⁶Gaa ne canicaj Jesucristó cataj Jesucristó rihaan no', ne:

—'Unj sij a'mii rihaan so' cuano nihánj ro', me síí ca'née Diose adonj —taj Jesucristó rihaan chana yo' a.

²⁷Veé dan, ne nu' 'na' nique nij síí tucu'yón se-nana Jesucristó, ne caráya'anj nij so' se vaa ca'mii Jesucristó ga chana yo' a. Tzaj ne a 'ó nij so' ne xna'anj man so' daj qui'yaj so' do', me che'é ca'mii so' ga chana yo' do' a ma'. ²⁸Gaa ne tanáj chana se-sihuu chana, ne cavii chana quinán' chana chuman', gaa ne cataj chana rihaan nij yuvii man chuman' a:

²⁹—Ca'anj ní', ne quene'en soj 'o snó'o síí cataj xna'anj rihanj che'é nu' se vaa qui'yáj gaa rque á.

Nuveé sij ca'née Diose tinanii man ní' rihaan sayuun me so', rá soj na' —taj chana rihaan nij snó'o man chuman' yo' a.

³⁰Gaa ne curihanj nij so' chuman', ne ca'na' nij so' rihaan Jesucristó a.

³¹Dan me se gaa ca'mii chana ga nij síí man chuman' yo', ne guun che'e nij síí tucu'yón se-nana Jesucristó rquee nij so' chraa man Jesucristó, cataj nij so':

—Cha so' doj chraa, maestro —taj nij so' a.

³²Tzaj ne cataj Jesucristó rihaan nij so' a:

—Vaa se chá rihanj, tzaj ne ne ne'en soj ma' —taj Jesucristó rihaan nij so' a.

³³Gaa ne xná'anj nij so' man tuvi' nij so', cataj nij so':

—Vaa síí ca'na' rqué se chá so', rá soj na' —taj nij so' rihaan tuvi' nij so' a.

³⁴Gaa ne cataj Jesucristó rihaan nij so' a:

—Sese 'yáá 'unj ndaa vaa me rá síí ca'née manj qui'yáj, ne sese navij quisij suun ca'ne' so' rihanj, ne ase vaa se chá vaa yo' rihanj adonj.

Dan me se nuu xej nimanj gaa 'yaj sunj suun yo' ei. ³⁵Se guun cataj soj se vaa cachén yo'ó ca'anj yavii, gaa ne quirii ní' naa, cataj soj ma'. Maan se cuano nihánj cataj xna'anj 'unj rihaan soj se vaa naxcaj soj rihaan soj, ni'yaj soj nij yuvii, se vaa ase vaa naa 'núú trigó vaa nij yuvii, ne catzii ndo'o vaa naa 'núú trigó yo', cachij yo', ne cuano nihánj me se no xcúún ní' quirii ní' 'núú trigó yo' adonj. Dan me se aj guun che'e ³⁶Diose naru'vee Diose rihaan nij síí rii naa yo', ne naquiyaj chre' ndo'o

nij so' man nij síi cayaán ga Diose nu' cavii nu' ca'anj, ne rej rihaan guun niha' rá síi cunô naa ga síi rii naa adonj. ³⁷ 'O se ya uxrá vaa nana nihánj se vaa ino vaa síi cunô naa ga síi rii naa, ³⁸ ne aj ca'née 'unj man soj quirii soj naa rej ne qui'yaj suun soj ma'. Yo'ó yuvií me nij síi qui'yaj suun naa yo' gaa rque, ne catúj soj qui'yaj suun soj ga nij so' adonj — taj Jesucristó rihaan nij síi tucu'yón se-nana so' a.

³⁹ Dan me se che'é se nata' chana yo' rihaan nij yuvií samaritana man chuman' yo' se vaa cataj xna'anj Jesucristó rihaan no' nu' se vaa qui'yaj no' gaa rque ro', che'é dan me cuchumán rá que'ee nij yuvií man chuman' yo' ni'yaj nij yuvií man Jesucristó a. ⁴⁰ Dan me se cuchi' nij síi man chuman' yo' rihaan Jesucristó, ne cachíin ni'yaj uxrá nij so' rihaan so' se vaa caran' so' doj tucua' nij so', ne che'é dan vij güii quináj so' chuman' yo' a. ⁴¹ Ne guun rií doj nij síi cuchumán rá cuno se-nana Jesucristó a. ⁴² Ne nij yuvií amán rá ni'yaj man Jesucristó ro', cataj nij so' rihaan chana yo' a: —Nuveé che'e doj nana natá' so' rihaan núj me cuchumán rá núj ni'yaj núj man so' ma'. Maan se cuno ma'an núj se-nana so', ne xcaj núj cuentá se vaa ya síi tñanii man yuvií man rihaan chumií nihánj rihaan sayuun me síi nihánj nanj adonj —taj nij so' rihaan chana yo' a.

Nana nihánj taj xna'anj se vaa nahuun sa' ta'níi yo' o síi nicaj suun, qui'yaj Jesucristó a

⁴³ Dan me se quisíj vij güii caran' Jesucristó chuman' yo', gaa ne

cavii so' ca'anj so' estadó Galilea a. ⁴⁴ Dan me se ma'an Jesucristó me síi cataj xna'anj se vaa nij síi man chiháán 'o síi a'mii natáj se-nana Diose me se ne aráj cochroj nij síi man ma'an dan rihaan so' ma'.

⁴⁵ Gaa ca'na' Jesucristó estadó Galilea, gaa ne ve'é uxrá ca'mii nij síi man estadó yo' che'é suun sa' nocoo qui'yaj so' cha'anj canuú chuman' Jerusalén a. 'O se ma'an nij so' ca'anj cha'anj yo' a.

⁴⁶ Dan me se ca'anj uún so' chuman' Caná chuman' naj estadó Galilea a. Chuman' yo' me chuman' naqui'yaj so' na vinó man na uun gaa rque a. Ne chuman' Capernaum ro', ne yo' o síi nicaj suun rihaan rey a. Ne canó chi'ii man ta'níi so' 'o snó'o cunii a.

⁴⁷ Dan me se cuchi' nana rihaan síi nicaj suun yo' se vaa cavii Jesucristó estadó Judea ca'na' Jesucristó estadó Galilea, gaa ne ca'anj so' cuchi' so' rihaan Jesucristó, ne cachíin ni'yaj uxrá so' rihaan Jesucristó se vaa ca'anj Jesucristó qui'yaj cono'ó Jesucristó man ta'níi so' a. Dan me se daj doj cavi' ta'níi so', taj so' a.

⁴⁸ Gaa ne cataj Jesucristó rihaan so' a: —Sese se qui'yáj suun sa' nocoo quene'en soj, ne daj chihaa míj se cuchumán rá soj ni'yaj soj manj ma' —taj Jesucristó rihaan so' a.

⁴⁹ Gaa ne cataj síi nicaj suun yo' rihaan Jesucristó a:

—Daj doj cavi' ta'níj, nanj señor. Qui'yáa so' se ndo'o uxrá, ne ca'anj ní' doj ruguanj —taj so', cachíin ni'yaj so' rihaan Jesucristó a.

⁵⁰ Ne cataj Jesucristó rihaan so' a: —Ca'vee ca'anj so' á. 'O se aj nahuun sa' ta'níi so' nanj adonj —taj Jesucristó rihaan so' a.

Gaa ne cuchumán rá snó'o yo' nana cataj xna'anj Jesucristó rihaan so', ne cavii so' ca'anj so' a.

⁵¹Veé dan, ne tihaj nan' so' chrej, ne ca'anj caran' nij se-mozó so' man so', ne cataj xna'anj nij yo' rihaan so' se vaa aj nahuun sa' ta'níi so' nanj adonj. ⁵²Veé dan, ne xná'anj so' man nij mozó yo':

—Me orá me guun che'e ta'nij nahuun sa' yo' ga —cataj so' rihaan nij mozó yo' a.

Gaa ne cataj nij mozo yo' rihaan so':

—Quii aga' 'o me na'maân cachi' man xnii nanj á —taj nij mozó yo' rihaan so' a.

⁵³Che'é dan me xcaj snó'o yo' cuentá se vaa maan orá cataj xna'anj Jesucristó rihaan so' se vaa nahuun sa' ta'níi so' ro', maan orá dan me nahuun sa' ya ta'níi so' a. Gaa ne cuchumán rá nij tucua so' se vaa sij ca'née Diose me Jesucristó a. ⁵⁴Dan me se quisij vij suun sa' nocoo qui'yaj Jesucristó gaa quisij cavii so' estadó Judea ca'anj so' estadó Galilea a.

Nana nihánj taj xna'anj se vaa nahuun sa' 'o síi ninaj cunü' icó xnu' va'nuj yo', qui'yaj Jesucristó a

5 Veé dan, ne canuü cha'anj navij rá nij síi israelitá, gaa ne cavii Jesucristó ca'anj so' chuman' Jerusalén a. ²Dan me se chuman' Jerusalén ro', vaa 'o na cu'naj Betesda xna'ánj a'mii nij síi israelitá a. Nichrun' naj na yo' ga ta'yaa atúj matzinj, ne vaa 'un' ve' ne nu' anicaj tu'va na yo' a. ³Rá ve' yo' mán ndo'o síi ninaj do', síi tuchrij do', síi rengo do', síi nuu

chrúnj ra'a do' a. ⁴Dan me se ndaa vaa orá nanij yo'o se-mozó síi 'nij ra'a man ní' rá na yo', ne tanicaj so' na yo', taj nij yuvii yo' a. Ne gaa anicaj na yo', ne síi nanij asino yaan rque na ro', orún' so' güej naj guun chi'ii xráá, taj uún nij yuvii yo' a. ⁵Ne naj yo'o snó'o tu'va na yo', ne síi icó xnu' va'nuj ya yo' ran' so' a. ⁶Dan me se quene'en Jesucristó man so' se vaa naj so' rej yo', ne aj quene'en Jesucristó se vaa guun que'ee yo' ran' so', ne xná'anj Jesucristó man so', cataj Jesucristó a:

—Nahuun sa' so', rá so' na' —taj Jesucristó rihaan so' a.

⁷Ne cataj síi ran' yo' rihaan Jesucristó a:

—Nahuún 'unj raj, tzaj ne taj vaj tuví' 'unj síi tinanij mán 'unj rá na gaa anicaj na, man señor. Che'é dan me gaa 'anj 'unj tu'va na yo', ne guun yucuan' yo'ó so', ne asino so' atúj rque na rihanj nanj adonj —taj so' rihaan Jesucristó a.

⁸Gaa ne cataj Jesucristó rihaan so':

—Naxagaa so', ne naxcaj so' tuvée so', cachee so' á —taj Jesucristó rihaan so' a.

⁹Gaa ne nu' nahuun sa' snó'o yo', ne naxcaj so' tuvée so', ne ca'anj so' a.

Nana nihánj taj xna'anj me che'é no xcúún Jesucristó qui'yaj cono'ó so' man yuvii güii naránj rá nij yuvii israelitá a

Ne güii nahuun sa' snó'o yo' me güii naránj rá nij yuvii israelitá a. ¹⁰Che'é dan me nij síi uun chij rihaan nij yuvii israelitá me se cataj nij so' rihaan síi nahuun sa' yo':

—Güii naránj rá ní' me nihánj á. Ne nó xcúun so' catá so' tuvée so' cuan' ma' —taj nij so' rihaan so' a.

¹¹Gaa ne cataj so' rihaan nij so' a:
—Tzaj ne síi qui'yaj nahuun sa' 'unj ro', so' me síi ca'ne' suun rihanj naxcaj 'unj tuvée 'unj ne cachee 'unj adonj —taj so' rihaan nij so' a.

¹²Gaa ne xná'anj nij so' man so', cataj nij so':
—Me síi cataj rihaan so' naxcaj so' tuvée so' ne cachee so' ga —taj nij so' rihaan so' a.

¹³Tzaj ne ne quene'en síi nahuun sa' me síi qui'yaj danj ma'. 'O se gaa quisij nahuun sa' so', ne naxuun Jesucristó man ma'an so' cachén Jesucristó sca'núj nij yuvii man anicaj ni'yaj man síi nahuun sa' yo', ca'anj so' a. ¹⁴Veé dan, ne nari' Jesucristó man síi nahuun sa' yo' rá nuvií nocoo, ne cataj Jesucristó rihaan so' a:

—Ya nahuun sa' so' á. Tanáj so' chrej chi'ii á. Sese taj, ne canicaj uún chi'ii mán so', ne doj a quirán' so' nanj adonj —taj Jesucristó rihaan so' a.

¹⁵Dan me se cavii snó'o yo', ne nata' so' rihaan nij síi uun chij rihaan nij yuvii israelitá se vaa Jesucristó me síi qui'yaj nahuun sa' so' a. ¹⁶Che'é dan guun rá nij síi uun chij yo' qui'yaj nij so' sayuun man Jesucristó, che'é se güii naránj rá nij so' me güii nahuun snó'o yo', qui'yaj Jesucristó a.

¹⁷Gaa ne cataj Jesucristó rihaan nij so' a:

—Réj me se ne anicun' so' ga suun ma'. Che'é dan yo'q 'yaj suun ma'anj adonj —taj Jesucristó rihaan nij so' a.

¹⁸Che'é dan doj a nano' nij so' daj qui'yaj nij so', gaa ne ca'vee cavi' Jesucristó a. 'O se nuveé che'e inanj tinavij Jesucristó tucuáan nocoo' nij so' che'é güii naránj rá nij so' me guun rá nij so' cavi' Jesucristó ma'. 'O se che'é se cataj so' se vaa Rej ma'an so' me Diose, che'é dan guun doj rá nij so' cavi' Jesucristó nanj adonj. Dan me se ase vaa Diose vaa ma'an so', taj so' a. ¹⁹Che'é dan cataj Jesucristó rihaan nij so' a:

—Dan me se cataj xna'anj yá yá 'unj rihaan soj a. Dan me se ase vaa xnii rihaan rej xnii ro', danj vaa 'unj sij ta'nij Diose nihánj rihaan Réj Diose, ne ne uun nucuáá 'unj 'yáá 'unj se vaa rii nimán ma'anj ma'. 'O se inanj 'yáá 'unj ndaa vaa 'yaj Réj Diose ne'enj a. Ne ase vaa 'yaj guee so' ro', veé danj vaa guee 'yáá 'unj uún adonj. ²⁰'O se 'ee ndo'o rá Réj Diose ni'yaj so' manj che'é se ta'nij so' mej, ne tihaan so' manj nu' se vaa 'yaj so' a. Ne suun sa' doj rihaan suun sa' qui'yáj quene'en soj cuano ro', tihaan so' manj a. Yo' me se doj a caraya'anj soj ni'yaj soj suun sa' yo' ei. ²¹Dan me se ase vaa nuu i'na' uún nij síi cavi' 'yaj Réj ro', danj qui'yáá 'unj uún adonj. Dan me se cunuu i'na' uún naj guun yuvii qui'yáá 'unj, sese guun rá 'unj cunuu i'na' uún nij so' adonj. ²²Dan me se ne a'ne' Réj Diose cacun' che'é a doj yuvii ma'. 'O se aj ca'ne' so' suun rihanj sij ta'nij so' se vaa ca'ne' ma'anj cacun' che'é cunudanj yuvii, ²³ne ase vaa aráj cochroj yuvii rihaan so' ro', danj gaa caraa cochroj yuvii rihanj adonj. Dan me se síi na'vej rá caraa cochroj rihanj

sij ta'nij Dioso me se so' me sí se guun rá caraā cochroj rihaan ndaa Réj Dioso sí ca'née manj a.

²⁴Ya ya cataj xna'anj 'unj rihaan soj cuano se vaa sí uno se-nanaj ne amán rá ni'yaj man sí ca'née manj ro', se cuta' Dioso cacun' xráá so' ma'. Dan me se daj chihaa mǐj se cavi' nu' so' ma'. Tananj gaa i'na' so' nu' cavii nu' ca'anj ga Dioso adonj. ²⁵Ya ya cataj xna'anj 'unj rihaan soj cuano se vaa vaa güii, ne nij sí man rihaan chumii nihánj nij sí cavi' vaa güii ro', ca'mij sij ta'nij Dioso rihaan nij so', ne nu' nij sí cunō nana ca'mij ro', cunuu i'na' ya nimán nij so', ne cuano nihánj me güii a'mij rihaan nij so', sese me rá nij so' cunō nij so' adonj. ²⁶'O se ase vaa vaa i'na' ma'an Dioso, ne vaa i'na' taran' nij rasuun 'yaj Dioso ro', danj vaa vaa i'na' ma'anj sij ta'nij Dioso uún, 'yaj Dioso, ne cunuu i'na' yuvii, qui'yáá 'unj, ²⁷ne 'unj me sí nicaj suun, ne ca'ne' 'unj cacun' che'é yuvii, che'é yan sí ca'née Dioso nicaj yu'unj man yuvii mej adonj.

²⁸Se caráya'anj soj nana nihánj ma'. 'O se vaa güii cunō taran' nij sí cavi' naj rihaan santō se-nanaj, ²⁹ne curihanj nij so' rque yo'óo nanj adonj. Dan me se, nij sí qui'yaj se sa' gaa vaa i'na' ro', curihanj nij so', ne cunuu i'na' uún nij so' canē nij so' ga Dioso adonj. Tzaj ne nij sí qui'yaj se chi'ii ro', curihanj nij so', tzaj ne 'o quiran' ndo'o nij so' sayuun che'é cacun' tumé nij so' nanj adonj. ³⁰Dan me se a doj ne uun nucuaj ma'anj qui'yaj sunj a ma'. Maan se ase vaa taj xna'anj Réj Dioso rihanj ro', veé

danj vaa 'yáj gaa a'né' 'unj cacun' che'é nij yuvii, ne 'o nica a'né' 'unj cacun' che'é nij yuvii nanj adonj. 'O se ne 'yáj inanj se me raj qui'yáj ma'. Tananj inanj se ataj xna'anj sí ca'née manj me se vaa 'yáj adonj.

³¹Sese orún' 'unj me sí cataj xna'anj rihaan soj daj sij mej, ne taj che'é cataj soj se vaa ya vaa se-nanaj ma'. ³²Tzaj ne vaa yo'ó sí cataj xna'anj daj sij mej, ne ne'én 'unj se vaa so' me sí cataj xna'anj ya che'é 'unj ei.

³³Dan me se ca'née soj sí cuchi' rihaan sí cu'naj Juan che'é rej nari' nij so' se-nana sí cu'naj Juan, ne cataj xna'anj so' nana ya rihaan nij soj a. ³⁴(Dan me se ca'vee se ca'mii ve'é yuvii che'ej ca'vee se se ca'mii ve'é yuvii che'ej, taj se 'yaj ma'. Maan se nanj taj 'unj rihaan soj che'é se me raj quinanii soj rihaan sayuun nanj adonj.) ³⁵Dan me se sí cu'naj Juan ro', ase vaa aga' ya'an vaa so', ne ase vaa ruvi' sa' rihaan yuvii gaa chuguun aga' ya'an yo' ro', danj vaa ruvi' sa' tucuáan ya rihaan soj qui'yaj so' nanj adonj. Tzaj ne nij soj ro', guun rá soj cunō soj se-nana so' 'o orá nii, che'é se guun rá soj guun niha' rá soj, qui'yaj se-nana so', tzaj ne qui'yaj rma'an soj doj tzin', ne tanáj uún soj se-nana so' a.

³⁶Ne xa' 'unj nihánj, tzaj ne sa' doj vaa sí taj xna'anj che'é 'unj rihaan sí cu'naj Juan a. Dan me se vaa suun ca'ne' Réj rihanj se vaa ya quisij suun yo' qui'yáj, ne che'é dan me 'yaj suun 'unj nij suun yo' a. Che'é ma'an suun sa' yo' ca'vee xcāj soj cuentá se vaa sij ca'née Réj Dioso mej adonj. ³⁷Ne Réj sí ca'née manj

ro', ma'an so' cataj xna'anj daj sij mej, tzaj ne taj se-nana so' cuno soj ma'. Ne ne ne'en soj daj vaa Réj ma'. ³⁸Ne taj se-nana so' nayón nimán soj a ma'. Danj vaa soj, che'é yan ne cuchuman rá soj ni'yaj soj manj sij ca'née so' rihaan chumii nihánj man adonj. ³⁹Dan me se nayaa uxrá soj danj Diose, che'é se me rá soj xcaj soj cuentá daj qui'yaj soj ne ca'vee cayáan soj ga Diose nu' cavii nu' ca'anj ei. Ne veé ma'an danj Diose ataj xna'anj che'é 'unj a. ⁴⁰Tzaj ne na'vej rá soj ca'na' soj rihanj, yan ca'vee cane soj ga Diose nu' cavii nu' ca'anj qui'yaj ma'. ⁴¹"Taj se lyaj sese na'vej rá yuvii ca'mii yuvii nana sa' che'ej ma'. ⁴²Tzaj ne ne'én 'unj daj vaa rá soj, se vaa ne niha' rá soj ni'yaj soj Diose ma'. ⁴³Dan me se ca'née Réj manj ca'naj rihaan chumii nihánj ca'mij se-nana Réj Diose rihaan soj, tzaj ne ne aran' rá soj ca'mij rihaan soj ma'. Tzaj ne sese ca'na' me ma'an yo'ó so' ca'mii so' nana avii raá ma'an so', ne ve'é cuno soj se-nana so' ei. ⁴⁴Daj chihaa mij se guun nucuaj soj cuchuman rá soj ni'yaj soj manj a ma'. 'O se me rá soj ve'é ca'mii nij tuvi' soj che'é soj, tzaj ne ne nanó rá soj daj qui'yaj soj, ne ve'é ca'mii Diose che'é soj ma'. ⁴⁵Se guun rá soj se vaa 'unj me sí cuta' cacun' xráa soj rihaan Réj Diose ma'. Maan se vaa sí cu'naj Moisés, ne nucuaj ndo'o rá soj man so' se vaa ca'vee cavii sa' soj rihaan Diose qui'yaj so', tzaj ne ma'an so' me sí cuta' cacun' xráa soj adonj. ⁴⁶'O se sese ya amán rá soj ni'yaj soj man sí cu'naj Moisés, ne cuchuman rá uún soj ni'yaj soj

manj, gaa ne ca'vee ei. 'O se so' me sí cachrón nana rihaan yanj nana taj xna'anj che'é 'unj adonj. ⁴⁷Tzaj ne sese ne amán rá soj nana cachrón so' rihaan yanj, gaa ne asa' ca'vee cuchuman rá soj cuno soj se-nanaj ga —taj Jesucristó rihaan nij sí uun chij rihaan nij yuvii israelitá a.

Nana nihánj taj xna'anj se vaa go' Jesucristó se chá rihaan 'un' mij snó'o a

6 Veé dan, ne cavii Jesucristó ca'anj Jesucristó rej xco na lacuaná cu'naj Galilea a. Tiberias cu'naj yo'ó se-chuvii na lacuaná yo' a. ²Dan me se rii uxrá yuvii canoco' rej xco so', che'é yan aj quene'en nij yuvii nu' nij suun sa' nocoo qui'yaj suun Jesucristó, se vaa nahuun sa' ndo'o sí ran', qui'yaj so' a. ³Dan me se cavii so' raá quij, ne ca'anj cane so' rihaan yo'ó ga nij sí tucu'yón se-nana so', ⁴ne dan me se daj doj güii achiin canuú cha'anj pascuá cha'anj navij rá nij yuvii israelitá a. ⁵Dan me se naxcaj Jesucristó rihaan Jesucristó, ne quene'en so' se vaa ca'na' ndo'o yuvii rihaan so', ne cataj so' rihaan sí cu'naj Felipé a:

—Me rej quiraan ní' rachrúun cha taran' nij yuvii nihánj, rá so' ga —taj so', xná'anj so' man sí cu'naj Felipé yo' a.

⁶Danj ca'mii so' rihaan sí cu'naj Felipé, che'é se me rá so' quene'en so' daj cataj sí cu'naj Felipé a. Tzaj ne aj ne'en so' daj qui'yaj ma'an so' nanj adonj.

⁷Dan me se cataj sí cu'naj Felipé rihaan Jesucristó:

—A' sa'anj vaa tu'vee yuvii 'yaj suun tunj yavii se quisíj quirí' nij so' doj rachrúun chá nij so' a ma' —taj so' a.

⁸Dan me se 'o sí tucu'yón se-nana so' sí cu'naj Andrés tinúú sí cu'naj Simón Pedró me so' a. Cataj so' rihaan Jesucristó a:

⁹—Nihánj me nicun' 'o xnii, ne nicaj xnii nihánj 'un' guée rachrúun 'núú cebada, ne vij guée xcuj nicaj so', tzaj ne asa' ca'vee quisij doj tzin' nihánj chá taran' nij yuvii nihánj ga —taj sí cu'naj Andrés yo' a.

¹⁰Gaa ne cataj Jesucristó:

—Ca'anj canē nij yuvii rihaan coj chrin', qui'yaj nij soj ei —taj Jesucristó rihaan nij sí tucu'yón se-nana so' a.

Dan me se man uxrá coj chrin' rej yo', ne ca'anj canē nij yuvii rihaan coj chrin' yo', ne 'un' mÍj snó'o me nij so' a.

¹¹Dan me se quita'aa Jesucristó rachrúun, ne nago' so' gracia rihaan Diose, ne cuxra' ta'aj so' rachrúun caxrÍj so' ston nij sí tucu'yón se-nana so', ne nij sí tucu'yón se-nana so' ro', rqué nij so' chá taran' nij sí ne rihaan coj chrin' yo' a. Ne ase vaa qui'yaj so' ga rachrúun ro', danj qui'yaj uún so' ga neē xcuj yo', rqué so' nu' se vaa me rá nij yuvii chá nij yuvii yo' a.

¹²Gaa quisíj caraa rque nij yuvii, ne cataj Jesucristó rihaan nij sí tucu'yón se-nana so' a:

—Naqui'yaj chre' nij soj se quináj tu'va nij yuvii, ne se guun quirí' uun yo' ma' —taj Jesucristó rihaan nij so' a.

¹³Che'é dan naqui'yaj chre' nij so' nu' se quináj tu'va nij yuvii, ne

caraa cunú' chuvij ya scaa, qui'yaj nij xco' nii rachrúun quináj tu'va nij yuvii gaa quisíj chá nij yuvii yo' 'un' rachrúun yo' nanj adonj. ¹⁴Dan me se gaa quene'en nij snó'o suun sa' nocoo qui'yaj suun Jesucristó, ne cataj nij so':

—Sí nihánj ro', ya uxrá sí nata' se-nana Diose me so', ne sí na'vij ní' ca'na' ya rihaan chumii nihánj me so' ei —taj nij snó'o yo' a.

¹⁵Tzaj ne aj ne'en Jesucristó se vaa ca'na' nij so', ne quita'aa nij so' man so', ne cunē' nij so' man Jesucristó guun so' sí nicaj suun rey guun chij rihaan nij so', ne che'é dan naxuun so' man so', ne cavii uún orún' so' ca'anj so' quij a.

Nana nihánj taj xna'anj se vaa cachéé Jesucristó rihaan na a

¹⁶Dan me se rej ti'nuu, ne nanij nij sí tucu'yón se-nana Jesucristó tu'va na lacuaná, ¹⁷gaa ne catúj nij so' rihoo, gaa ne cavii nij so' ca'anj nij so' chuman' Capernaum a. Dan me se quisíj guun rmi' rihaan na lacuaná yo', ne ataa naman Jesucristó rihaan nij so' a. ¹⁸Ne cavii nana yuvaa, ne uxrá nari' nucuj ndo'o na lacuaná yo', ¹⁹ne dan me se 'un' kilómetro ca'anj nij so', gaa ne quene'en nij so' se vaa chéé Jesucristó rihaan na 'na' so', ne gaa quinichrun' so' rihaan rihoo yo', ne cuchu'vi' nij so' a. ²⁰Tzaj ne cataj Jesucristó rihaan nij so' a:

—'Unj me yo' ei. Se chu'vi' soj ma' —taj Jesucristó a.

²¹Che'é dan guun niha' uxrá rá nij so', ne nu' catúj Jesucristó rá rihoo, ne nu' cuchi' rihoo tu'va na lacuaná rej vaj nij so' a.

Nana nihánj taj xna'anj se vaa cataj Jesucristó se vaa ase vaa se chá vaa Jesucristó rihaan nimán ní' a

²²Dan me se yo'ó güii me se quene'en nij yuvii quináj rej xco na lacuaná yo' se vaa taj vaj yo'ó rihoo chéé rihaan na rej yo', maan se oruun rihoo catúj nij síí tucu'yón se-nana Jesucristó gaa ca'anj nij so' a. Tzaj ne ne catuu Jesucristó rá rihoo yo' ga nij síí tucu'yón se-nana so', ni'yaj nij yuvii a. Che'é dan ne quene'en uxrá nij yuvii me rej ca'anj Jesucristó a. ²³Tzaj ne ca'na' doj rihoo cavii chuman' Tiberias tu'va na lacuaná nichrun' rej nago' síí 'nij ra'a man ní' graciá rihaan Diose che'é rachrúún ne chá nij yuvii rachrúún yo' a. ²⁴Che'é dan gaa quene'en nij yuvii se vaa taj vaj Jesucristó ga nij síí tucu'yón se-nana so' chéé ga nij so', gaa ne catúj nij yuvii rque nij rihoo yo', ne ca'anj nij yuvii chuman' Capernaum, nano' nij yuvii man Jesucristó a. ²⁵Dan me se nari' nij so' man Jesucristó chuman' Capernaum, gaa ne xná'anj nij so' man so', cataj nij so':

—Me aman ca'ná' so' nihánj, ga maestro' —taj nij yuvii, xná'anj nij so' man Jesucristó a.

²⁶Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa nuveé che'e se quene'en soj nij suun sa' nocoo qui'yáá 'unj me nano' soj manj ma'. Maan che'é se chá soj rachrúún yo' ne caraa rque soj ro', che'é dan nano' soj manj ei.

²⁷Se guun qui'yaj suun soj che'é inanj se cha soj ma'. 'O se vaa

güii, ne quinavij nu' nij rasuun yo' nanj adonj. Che'é dan qui'yaj suun soj che'é se vaa qui'yaj cavii sa' nimán soj, gaa ne gaa i'na' ya nimán soj nu' cavii nu' ca'anj ei.

'Unj sij ca'née Diose nıcaj yu'unj man yuvii me síí rque se sa' yo' rihaan soj ei. 'O se Réj Diose me síí cataj se vaa ca'vee qui'yáj danj che'é soj adonj —taj Jesucristó rihaan nij yuvii a.

²⁸Che'é dan cataj nij yuvii rihaan so' a:

—Me suun qui'yaj suun núj, rá Diose ga —taj nij yuvii a.

²⁹Gaa ne cataj Jesucristó rihaan nij yuvii:

—Nihánj me suun me rá Diose qui'yaj suun soj, se vaa cuchuman rá soj ni'yaj soj mán 'unj sij ca'née so' rihaan soj adonj —taj Jesucristó rihaan nij yuvii a.

³⁰Che'é dan cataj nij yuvii rihaan so' a:

—Sese danj vaa, ne me suun sa' nocoo qui'yáá so' quene'en núj, gaa ne cuchuman rá núj ni'yaj núj mán so' ga. ³¹Dan me se qui'yaj Diose suun sa' nocoo gaa naá, ne xii ní' me se chá nij so' se cu'naj maná gaa chéé nij so' rej tacaan, qui'yaj Diose gaa naá, ne dan me se danj Diose taj se vaa nanij se chá rihaan nij so', qui'yaj Diose, ne chá nij so' se chá nanij rej xta' adonj —taj nij so' rihaan Jesucristó a.

³²Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano, ne xa' se rqué Moisés chá soj, tzaj ne nuveé se chá 'yaj vaa i'na' yuvii nu' cavii nu' ca'anj me yo' ma'. Xa' se rqué Réj Diose

chā soj, tzaj ne se qui'yaj gaa i'na' soj me ya yo' adonj. ³³O se se chá rqué Réj Diose rihaan soj mé 'unj sij cavii rej xta', ne 'unj me sí rqué se vaa ca'vee gaa i'na' ya soj sij man rihaan chumií nihánj nu' cavii nu' ca'anj adonj —taj Jesucristó rihaan nij yuvii a.

³⁴Che'é dan cataj nij yuvii rihaan Jesucristó a:

—Rque so' se chá yo' rihaan núj nu' cavii nu' ca'anj, señor —taj nij yuvii a.

³⁵Gaa ne cataj Jesucristó rihaan nij yuvii a:

—'Unj nihánj me se chá, ne a'vee 'yáj vaa i'na' ya yuvii ei. Sese ca'na' soj rihanj, ne yo'o gaa xej nimán soj, sese ya uxrá amán rá soj ni'yaj soj manj á. ³⁶Tzaj ne aj cataj 'unj rihaan soj se vaa nda' se quene'en soj manj, tzaj ne ne cuchuman rá soj ni'yaj soj manj a ma'. ³⁷Xa' nij sí rqué Réj Diose manj, tzaj ne ca'na' nij so' rihanj, ne ve'é ca'mii 'unj ga nij so', ne xa' nij sí 'na' rihanj, tzaj ne daj chihaa mÍj se quiri'Íj yanÍj 'unj man nij so' ma'. ³⁸Dan me se ca'ná' 'unj rihaan chumií nihánj, tzaj ne se guun qui'yáá 'unj ndaa vaa me rá ma'anj qui'yáj ma'. Tananj che'é rej qui'yáá 'unj se vaa me rá Diose síí ca'néé mán 'unj qui'yáá 'unj ro', che'é dan nanij 'unj rihaan chumií nihánj adonj. ³⁹Ne nihánj me se vaa me rá Diose qui'yáj ei. Dan me se na'vej uxrá rá Diose ca'anj ni'ya a 'ó nij síí rqué so' manj ma'. Dan me se me rá Diose cunuu i'na' uún taran' nij so', qui'yáj, asa' quisÍj güii ca'anj ni'ya chumií nihánj adonj. ⁴⁰O se nihánj me se vaa me rá Réj

Diose ei. Me rá so' yo'o gaa i'na' taran' nij síí amán rá ni'yaj manj nu' cavii nu' ca'anj ga so', ne 'unj me síí qui'yaj cunuu i'na' uún nij so' asa' quisÍj güii ca'anj ni'ya chumií nihánj adonj —taj Jesucristó rihaan nij yuvii a.

⁴¹Dan me se, che'é se cataj Jesucristó se vaa ma'an so' me se chá nanij rej xta' rihaan chumií nihánj, ne che'é dan ca'mii nij síí uun chij rihaan nij yuvii israelitá nana nij ni'yaj nij so' man Jesucristó, ⁴²cataj nij so':

—Nuveé sij cu'naj Jesús me síí nihánj na'. Nuveé ta'nij síí cu'naj José me so' na'. Nuveé sij ne'en ní me rej so' me nii so' do' na'. Me che'é guun rá so' cataj so' cuano se vaa me so' síí nanij rej xta' rihaan chumií nihánj ga —taj nij síí uun chij ni'yaj nij so' man Jesucristó a.

⁴³Gaa ne cataj Jesucristó rihaan nij so' a:

—Se ca'mii soj nana nij ga tuvi' soj ma'. ⁴⁴Dan me se ca'néé Réj Diose manj, ne a 'ó yuvii se ca'vee ca'na' rihanj sese nuveé Réj Diose qui'yaj ca'na' so' rihanj a. Ne xa' síí 'na' rihanj, tzaj ne cunuu i'na' uún so' qui'yáj asa' quisÍj güii ca'anj ni'ya chumií nihánj adonj. ⁴⁵Dan me se vaa 'o síí nata' se-nana Diose cachrón nana nihánj rihaan yanj gaa naá a: "Ne ma'an Diose tuctu'yón man taran' nij so' adonj", taj síí nata' yo' a. Dan me se taran' nij síí uno rihaan Réj ne nari' se-nana Réj me síí 'na' rihanj ei. ⁴⁶Taj vaj yo'ó síí quene'en man Réj a ma'. Tzaj ne orún' 'unj me síí quene'en man so', che'é se sij cavii rihaan so' mej adonj.

47 "Ya ya cataj xna'anj 'unj rihaan soj cuano se vaa sí amán rá ni'yaj manj me se yo'o cayáan so' ga Diose nu' cavii nu' ca'anj ei. 48 Dan me se ase vaa i'na' nee man soj 'yaj se chá soj ro', danj gaa i'na' nimán soj qui'yáa 'unj adonj. 49 Xa' xii soj síi man gaa naá, tzaj ne chá nij so' se cu'naj maná gaa chée nij so' rej tacaan, gaa ne cavi' nij so', 50 tzaj ne vaa 'unj nihánj, ne ase vaa se chá cu'naj maná cavii rej xta' nanij rihaan xii soj vaa 'unj, ne sese chá soj mán 'unj ne daj chihaa mǐj se cavi' nimán soj ma'. 51 Dan me se 'unj me se chá vaa i'na' ya nanij rej xta', ne sese chá yo'o so' man se chá nanij rej xta' nihánj, ne yo'o gaa i'na' so' ei. Tzaj ne se chá rque 'unj chá yuvií ro', nee manj me yo' ei. Ne yo' me qui'yáj, gaa ne ca'vee gaa i'na' ya cunudanj soj sij man rihaan chumií nihánj ei —taj Jesucristó rihaan nij síi uun chij rihaan nij yuvií israelitá a.

52 Dan me se nuchruj raa ndo'o nij síi uun chij yo' ga tuvi' nij so', ne xná'anj nij so' man tuvi' nij so', ne:

—Asa' ca'vee rque síi nihánj nee man ma'an so' chá yuvií ga —taj nij so', xná'anj nij so' man tuvi' nij so' a.

53 Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se chá soj nee manj, ne sese se co'o soj ton manj, ne se ca'vee gaa i'na' nimán soj a ma'. 54 Tzaj ne síi chá nee manj ne co'o ton manj me se yo'o gaa i'na' so' nu' cavii nu' ca'anj, ne asa' quisij güii ca'anj ni'ya chumií nihánj, ne cunuú i'na' uún so', qui'yáj adonj.

55 Xa' nee manj, tzaj ne nee chá ya ya me yo', ne ton manj me se na co'o ya me yo' ei. 56 Ne síi chá nee manj ne co'o ton manj me se yo'o cayáan so' ga 'unj, ne yo'o cayáan 'unj ga so' chuguanj. 57 Ase vaa vaa i'na' Réé 'unj síi ca'neé mán 'unj rihaan chumií nihánj ro', danj vaa vaa i'na' 'unj, 'yaj Réé 'unj a. Ne xa' síi chá mán 'unj, tzaj ne yo'o gaa i'na' nimán so', qui'yáa 'unj a. 58 'Unj nihánj me se se chá 'na' rej xta' nanij rihaan yo'óo nihánj mé 'unj ei. Tzaj ne ino uxrá vaa 'unj ga se cu'naj maná chá xii soj gaa naá ei. 'O se cavi' cunudanj nij so' nanj á. Tzaj ne síi chá manj me se yo'o gaa i'na' nimán so' nu' cavii nu' ca'anj adonj. 59 —Nana nihánj me nana tucu'yón Jesucristó rihaan nij yuvií cunuú chre' rá ve' tucu'yón nij síi israelitá se-tucuanj Moisés ve' ne chuman' Capernaum a.

**Nana nihánj taj xna'anj daj
ca'mii síi tanáj xco man
Jesucristó ne daj ca'mii síi
noco' raan man Jesucristó a**

60 Que'ee nij síi tucu'yón se-nana Jesucristó cuno nana nihánj nana ca'mii Jesucristó, gaa ne cataj nij so!:

—Sayuun uxrá vaa nana nihánj chuguanj. Daj chihaa mǐj se cuno ní' doj nana tu'va so' a ma' —taj nij so' rihaan tuvi' nij so' a.

61 Quene'en ma'an Jesucristó se vaa nana nij yo' ca'mii ta'aj nij síi tucu'yón se-nana so', gaa ne cataj Jesucristó rihaan nij so!:

—Guun na'aj soj, qui'yaj nana nihánj ei. 62 Che'é dan sese quene'en soj mán 'unj sij ca'neé

Diose n̄icaj yu'unj man yuvij se vaa cavij uún 'unj quínán' 'unj rej cayáán 'unj asij rque, ne daj guun rá soj ga. 'O se doj a guun na'aj soj che'é se ne cunō soj se-nanaj chuguanj. ⁶³Dan me se Nimán Diōse me se vaa 'yaj vaa i'na' nimán yuvij ei. Tzaj ne taj se gún' man nee man yuvij qui'yaj yo' gaa i'na' yuvij a ma'. Xa' nana ca'mij rihaan soj, tzaj ne nana cavij Nimán Diōse me nana yo', ne ca'vee gaa i'na' nimán soj, qui'yaj se-nanaj ei. ⁶⁴Tzaj ne ta'aj soj me síi ne amán rá uno se-nanaj a man adonj —taj Jesucristó rihaan nij síi tucu'yón se-nana so' a.

'O se asij guun che'e Jesucristó tucu'yón so' se-nana so' man yuvij, ne aj ne'en so' me síi me síi cuchumán rá ni'yaj man so', ne aj ne'en so' me síi me síi tacuachén man so' rihaan nij síi taj ri'yunj man so' adonj. ⁶⁵Gaa ne cataj uún Jesucristó:

—Che'é se ne cuchumán rá soj ro', che'é dan cataj xna'anj 'unj rihaan soj se vaa a 'ó síi se guun nucuaj ca'na' rihaan 'unj, sese nuveé Réj Diōse me síi qui'yaj ca'na' so' rihaan 'unj ma' —taj uún Jesucristó a.

⁶⁶Che'é dan canicaj que'ee nij síi tucu'yón se-nana so', ne ca'ne' rá nij so' ga suun chéé ga Jesucristó a.

⁶⁷Che'é dan xná'anj Jesucristó man chuvij nij síi tucu'yón se-nana so', cataj so':

—Soj do' me rá tanáj manj na' —taj Jesucristó, xná'anj so' man chuvij nij síi tucu'yón se-nana so' a.

⁶⁸Gaa ne cataj síi cu'naj Simón Pedró rihaan so' a:

—Taj yo'ó síi cuchij' núj rihaan, man Señor. 'O se so' me síi a'mii nana qui'yaj gaa i'na' núj rihaan Diōse nu' cavij nu' ca'anj, ⁶⁹ne amán rá núj ni'yaj núj mán so', ne aj ne'en núj se vaa mé so' síi guee síi ca'née ma'an Diōse rihaan chumij nihánj adonj —taj Simón Pedró rihaan Jesucristó a.

⁷⁰Gaa ne cataj Jesucristó rihaan chuvij nij so' a:

—Dan me se 'unj me síi narii man chuvij nij soj se vaa canoco' soj manj, tzaj ne ase vaa ma'an síi chree vaa yo'o tuvi' soj adonj —taj Jesucristó rihaan chuvij nij so' a.

⁷¹Nana yo' ca'mii Jesucristó ni'yaj Jesucristó man síi cu'naj Judas ta'níi síi cu'naj Simón Iscariote a. 'O se síi cu'naj Judas yo', tzaj ne yo'o tuvi' chuvij nij síi tucu'yón se-nana Jesucristó me so', tzaj ne me so' síi tacuachén man Jesucristó rihaan nij síi taj ri'yunj man Jesucristó a.

Nana nihánj taj xna'anj che'é nana ca'mii Jesucristó ga nij tinúu so' a

7 Quisij ca'mii Jesucristó nu' nana dan, gaa ne cachée Jesucristó estadó Galilea a. 'O se ne ca'vej rá so' cachee so' estadó Judea, che'é se nano' nij síi uun chij rihaan nij yuvij israelitá man so', ne ticavi' nij so' man Jesucristó, rá nij so' a.

²Dan me se daj doj quisij cha'anj navij rá nij yuvij israelitá cha'anj une' nij so' ve' yacataj a. ³Che'é dan cataj nij tinúu Jesucristó rihaan so' a:

—Cavij so' ca'anj so' estadó Judea, gaa ne quene'en nij síi tucu'yón se-nana so' nij suun sa' nocōo 'yáá

so', tinuj. ⁴Q se sese me rá so' qui'yáá so' suun sa' nocoo, ne ca'anj so' rej quene'en nij sí man rihaan chumií nihánj mán so' á —taj nij tinúu ma'an Jesucristó rihaan so' a.

⁵Q se ndaa ma'an nij tinúu Jesucristó ne cuchuman rá ni'yaj man Jesucristó a ma'. ⁶Che'é dan cataj Jesucristó rihaan nij so':

—Ataa quisij güii no xcúun 'unj qui'yaj suun 'unj á. Se-suun ma'an soj me se a me ma'an güii ca'vee qui'yaj suun soj se-suun soj ei. ⁷Taj che'é quitaj ri'yunj nij sí man rihaan chumií nihánj man soj ma'. 'Unj ro', vaa che'é quitaj ri'yunj nij so', ese 'unj me sí taj xna'anj rihaan nij so' se vaa chi'ii ndo'o vaa 'yaj nij so' adonj. ⁸Ca'anj soj cha'anj xraj ei. Xa' 'unj, tzaj ne se ca'anj 'unj cha'anj ma'. 'Q se ataa quisij güii qui'yaj sunj nanj adonj ⁹—taj Jesucristó rihaan nij so', gaa ne quináj so' estadó Galilea a.

**Nana nihánj taj xna'anj daj
qui'yaj Jesucristó gaa canuú
cha'anj une' nii ve' yacataj a**

¹⁰Dan me se gaa quisij cavii nij tinúu Jesucristó ca'anj nij so' cha'anj, gaa ne cavii ma'an Jesucristó ca'anj so' cha'anj uún a. Tzaj ne ca'anj yuve so' a. ¹¹Che'é dan me nano' nij sí uun chij rihaan nij yuvií israelitá man Jesucristó rej canuú cha'anj yo' a. Ne xná'anj nij so' man tuvi' nij so', cataj nij so':

—Me rej vaj so' ga —taj nij so', xná'anj nij so' man tuvi' nij so' a.

¹²Ne nanó yuve ndo'o nij yuvií cuentó che'é Jesucristó a. Dan me se ta'aj nij yuvií cataj:

—Sí sa' me so' á —taj ta'aj nij yuvií a.

Tzaj ne yo'ó ta'aj nij yuvií cataj: —Taj ma'. Sí tiha' yu'unj man nij yuvií me so' ei —taj yo'ó ta'aj nij yuvií yo' a.

¹³Tzaj ne a 'ó nij yuvií ne ca'mii ranga' che'é Jesucristó ma'. 'Q se cucu'vi' nij yuvií ni'yaj nij yuvií man nij sí uun chij rihaan nij so' a.

¹⁴Dan me se gaa anuú cha'anj, ne cavii Jesucristó rá nuvíí nocoo, ne tucu'yón so' man nij yuvií a.

¹⁵Che'é dan caráya'anj nij sí uun chij rihaan nij yuvií israelitá, ne cataj nij so':

—Nuveé sij tucu'yón me sí nihánj ma'. Me rej nari' so' se-nana Diose ga —taj nij sí uun chij yo' ni'yaj nij so' man Jesucristó a.

¹⁶Che'é dan cataj Jesucristó rihaan nij so' a:

—Xa' se-nanaj, tzaj ne nuveé nana cavii raá 'unj me nana nihánj ma'. 'Q se se-nana Diose sí ca'née manj me nana nihánj ei. ¹⁷Dan me se sese me rá yo'ó so' cunó so' rihaan Diose, ne quene'en so' se vaa nuveé nana avii raá 'unj me nana tucu'yón 'unj ma'.

'Q se quene'en so' se vaa se-nana Diose me nana yo' a. ¹⁸Xa' sí a'mii se-nana ma'an, tzaj ne inanj me rá so' ca'mii sa' yuvií che'é ma'an so', ne me rá so' cavii sa' ma'an so' ei. Tzaj ne sese me rá yo'ó so' ca'mii sa' yuvií che'é sí ca'née man so', ne inanj nana ya che'é sí ca'née man so' a'mii so', ne ne nano' so' chrej chi'ii ma'. ¹⁹Ya uxrá rqué sí cu'naj Moisés se-tucuanj so' rihaan soj, tzaj ne a 'ó tuvi' soj na'vej rá qui'yaj tucúán yo' a ma'. Me che'é nano' soj daj qui'yaj soj, ne cavii 'unj ga —taj Jesucristó rihaan nij sí uun chij rihaan nij yuvií israelitá a.

²⁰Gaa ne cataj nij yuvii rihaan Jesucristó a:

—Nuu nana chree nimán so' á. Me síi me rá ticavi' mán so', rá so' ga —taj nij yuvii rihaan Jesucristó a.

²¹Gaa ne cataj Jesucristó rihaan nij so' a:

—Gaa rque me se orún' suun sa' nocoo qui'yáj, ne caráya'anj taran' nij soj se vaa qui'yáa 'unj suun sa' nocoo güii naránj rá ní' a. ²²Dan me se ya uxrá cataj xna'anj Moisés rihaan ní' se vaa ca'ne' ní' ta'nga' man snó'o che'é rej ca'vee cunu sa' ní' rihaan Diose adonj. Tzaj ne nuveé tucuajnj cuchruij ma'an Moisés me yo' ma'. 'O se se-tucuajnj xii ní' nij síi man gaa naá me yo' adonj. Ne ndaa güii naránj rá a'ne' soj ta'nga' man snó'o ei.

²³Dan me se che'é se me rá soj qui'yaj soj nu' se-tucuajnj Moisés, che'é dan a'vej rá soj cata' ta'nga' man snó'o güii naránj rá soj, tzaj ne me che'é axrij yuvaa soj manj che'é yan cunu sa' nu' nee man yo'o snó'o qui'yáj güii naránj rá soj ga. ²⁴Se guun xcaj soj cuentá che'é se vaa 'yaj yuvii ni'yaj soj che'é inanj tucuaán noco' soj ma'. 'O se xcaj soj cuentá daj me rá Diose, ne cunu cuu soj doj, qui'yaj soj ei —taj Jesucristó rihaan nij yuvii a.

²⁵Che'é dan cataj ta'aj nij síi ne chuman' Jerusalén:

—Ne sij nihánj, nuveé sij nano' nii ticavi' nii man me so' na'. ²⁶Ne veé a'mii ranga' so' nihánj, ne a 'ó nana ne a'mii nij so' rihaan so' man asanj. Ya ya síi ca'née Diose tinanii man yuvii rihaan sayuun me so', rá nij xrej atá suun sa' doj na'. ²⁷Tzaj ne ne'en ní' me rej cavii síi nihánj ei.

Tzaj ne taj síi ne'en me rej cavii síi ca'nej Diose tinanii man yuvii rihaan sayuun asa' ca'na' so' man asanj —taj nij síi ne chuman' Jerusalén yo' a.

²⁸Che'é dan sca' ndo'o ca'mii Jesucristó, cataj so':

—Ne'en soj manj, ne ne'en soj me rej cavii 'unj ei. Tzaj ne ne ca'na' ma'anj ma'. 'O se ya a'mii síi ca'née manj, tzaj ne ne ne'en uxrá soj man so' a ma'. ²⁹'Unj me síi ne'en man so', che'é se cavii 'unj rihaan so', ne so' me síi ca'née manj adonj —taj Jesucristó rihaan nij yuvii a.

³⁰Che'é dan nano' nij so' daj qui'yaj nij so' ne quita'aa nij so' man Jesucristó, tzaj ne a 'ó nij so' ne quisij rá quita'aa man so' a ma'. 'O se ataa quisij güii ca'vee qui'yaj nij so' danj man so' a.

³¹Ne que'ee nij yuvii cuchumán rá ni'yaj man so', ne cataj nij síi cuchumán rá ni'yaj man so':

—Ca'vee se ca'na' yo'ó so' cataj so' se vaa tinanii so' man ní' rihaan sayuun, tzaj ne daj chihaa mij se quisij so' qui'yaj so' doj suun sa' nocoo rihaan suun sa' nocoo qui'yaj síi nihánj a ma'. Ya ya sij tinanii man ní' rihaan sayuun me síi nihánj adonj —taj nij yuvii ni'yaj nij so' man Jesucristó a.

³²Dan me se gaa cuno nij síi fariseo se vaa ca'mii yuve nij yuvii nana dan che'é Jesucristó, gaa ne ca'née nij xrej atá suun nocoo doj ca'née nij síi fariseo man tanuu ca'anj nij tanuu quita'aa nij tanuu man Jesucristó a. ³³Che'é dan cataj Jesucristó:

—Doj güii cayáan 'unj ga nij soj, ne cavii 'unj quinán' 'unj rihaan

sí ca'néé manj 'nà' 'unj nanj ei.

³⁴Nano' soj manj, tzaj ne se nari' soj manj a ma'. Ne se guun nucuaj soj cuchí' soj rej cayáán 'unj a ma' —taj Jesucristó a.

³⁵Che'é dan nij sí uun chij rihaan nij yuvií israelitá cataj rihaan tuvi' nij so' a:

—Me rej ca'anj sí nihánj, ne se nari' ní' man so' ga. Ca'anj so' rihaan tuvi' ní' sí ne chiháán nij yuvií yanj na'. Tucuyón so' se-nana so' rihaan nij yuvií yanj na'. ³⁶Q se cataj so' nana nihánj se vaa: "Nano' soj manj, tzaj ne se nari' soj manj a ma'. Ne se guun nucuaj soj cuchí' soj rej cayáán 'unj a ma'". Me che'é tu'va so' danj, rá soj ga —taj nij sí uun chij yo', xná'anj nij so' man tuvi' nij so' a.

³⁷Dan me se daj yo'ó güii navij cha'anj nocoo sa' ndo'o yo', ne güii yo' canicun' Jesucristó, ne cataj so':

—Sese ase vaa sí nacoo ndo'o na vaa soj, ne ca'nà' soj rihanj, ne rquej na achiin ya man soj á.

³⁸Xa' sí amán rá ni'yaj manj, tzaj ne quirí' so' se vaa taj danj Diose rihaan ní', ne dan me se ase vaa 'o chráá sa' ndo'o nuu na sa' inanj ro', danj gaa se sa' cunuú nimán sí amán rá ni'yaj manj, ne ca'vee gaa i'nà' nimán so' adonj. ³⁹—Danj taj Jesucristó, ca'mii so' che'é Nimán Diose cunuú nimán nij sí cuchumán rá ni'yaj man so' a. 'Q se ataa ca'nà' Nimán Diose rihaan yuvií, ese ataa quisij güii cavi' so' rihaan rcutze a.

⁴⁰Che'é dan ta'aj nij yuvií cuno nana nihánj cataj:

—Ya ya sij nata' se-nana Diose gaa naá sij ca'na' uún rihaan chumií

nihánj me sí nihánj nanj á —taj ta'aj nij yuvií a.

⁴¹Yo'ó ta'aj nij yuvií cataj:

—Sij ca'néé Diose tinanii man ní' rihaan sayuun me sí nihánj ei —taj yo'ó ta'aj nij so' a.

Tzaj ne yo'ó ta'aj nij yuvií cataj:

—Xa' sí ca'nej Diose tinanii man ní' rihaan sayuun, tzaj ne nuveé sij cavii estadó Galilea me so' ma'. ⁴²Q se danj Diose taj se vaa ta'níí ta'nij si'no sí cu'naj David sí cane gaa naá me sí ca'nej Diose, ne sij cavii chiháán sí cu'naj David chuman' Belén me uún so' adonj —taj yo'ó ta'aj nij yuvií uún a.

⁴³Che'é dan guun vij ca'mii nij yuvií, ni'yaj nij yuvií man Jesucristó a. ⁴⁴Ne guun rá ta'aj nij so' quita'aa nij so' man Jesucristó, tzaj ne taj vaj sí quisj rá quita'aa man so' a ma'. ⁴⁵Che'é dan canicaj nij tanuu ca'anj uún nij tanuu rihaan nij xrej ata suun nocoo doj do', rihaan nij sí fariseo do', gaa ne cataj nij xrej do', nij sí fariseo do', rihaan nij tanuu:

—Me che'é ne ca'nà' Jesucristó ga soj, qui'yaj soj ga —taj nij so', xná'anj nij so' man nij tanuu yo' a.

⁴⁶Gaa ne cataj nij tanuu:

—Tzaj ne cunaj uxrá vaa nana a'mii so', ne taj vaj yo'ó yuvií ne'en ca'mii nana a'mii so' a ma' —taj nij tanuu yo' a.

⁴⁷Che'é dan cataj nij sí fariseo rihaan nij tanuu a:

—Tiha' yu'unj so' man soj do' nanj ei. ⁴⁸Q se a 'ó nij sí uun chij do', a 'ó nij sí fariseo do', ne cuchuman rá se vaa sij ca'néé Diose me so' a ma'. ⁴⁹Ne xa' nij yuvií, tzaj ne ne ne'en nij yuvií se-tucuanj

Moisés, ne inañj sayuun quiran' nij yuviï yo', qui'yaj Dioso chuguanj —taj nij sí fariseo rihaan nij tanuu yo' a.

⁵⁰Dan me se nicun' sí cu'naj Nicodemo ga nij so', ne yo'o tuvi' nij so' me so', ne sí ca'anj nano cuentó ga Jesucristó rej nii gaa rque doj me so', ne cataj so':

⁵¹—Tzaj ne se-tucuanj Moisés taj se vaa ne nó xcúun ní' ca'ne' ní' cacun' che'é yo'o so', sese ataa cuno ní' nana a'mii so' ne sese ataa xcaj ní' cuentá daj 'yaj so' ma' —taj sí cu'naj Nicodemo rihaan yo'ó nij sí fariseo yo' a.

⁵²Gaa ne cataj nij so' rihaan sí cu'naj Nicodemo a:

—Me che'é me rá so' ca'mii sa' so' che'é Jesucristó ga. 'O se sij cavii estadó Galilea mé so' ga so' na'. Tucu'yón so', ne xcaj so' cuentá se vaa a 'ó sí nata' se-nana Dioso ne avii estadó Galilea, 'yaj Dioso ma' —taj nij sí fariseo rihaan sí cu'naj Nicodemo yo' a. ⁵³Dan me se cavii nij so', ne quinan' 'o 'o nij so' tucua nij so' a.

8 Tzaj ne cavii Jesucristó xráá quij cu'naj Quij man Chruun Olivó a.

Nana nihánj taj xna'anj daj ca'mii Jesucristó ga nij sí me rá go' yahij man chana tumé cacun' a

²Dan me se rej síj güii me se ca'anj uún Jesucristó rá nuvií nocoo a. Gaa ne cuchi' cunudanj nij yuviï rihaan so', ne ca'anj quitaj so' chruun xlá, ne tucu'yón so' man nij yuviï yo' a. ³Veé dan, ne ca'na' nij sí naqui'yaj cuu se-tucuanj Moisés rihaan yuviï ca'na' nij sí

fariseo do', ne nicaj nij so' man 'o chana a. Ne chana nicaj nij so' me se aj nari' nii man chana yo' gaa cotoj no' ga snó'o, tzaj ne nuveé nica no' me snó'o cotoj ga no' a. Che'é dan quita'aa nij so' man no', ne nicaj nij so' man no' ca'na' nij so' rihaan Jesucristó, ne cachrón nij so' man chana tanuu ma'an nij so' ga Jesucristó a. ⁴Gaa ne cataj nij so' rihaan Jesucristó a:

—Chana nihánj me se maan orá cotoj no' ga yo'ó snó'o, ne nari' nii man no', ne quita'aa nii man no', maestro. ⁵Dan me se se-tucuanj Moisés taj se vaa no xcúun ní' go' ní' yahij man chana vaa danj ndaa se cavii no', taj tucuaán yo' nanj á. Che'é dan me, daj qui'yaj ní', rá so' ga —taj nij so', xna'anj nij so' man Jesucristó a. ⁶'O se guun rá nij so' ca'mii Jesucristó yo'o nana vaa nij che'é se-tucuanj Moisés, gaa ne ca'vee cuta' nij so' cacun' xráá Jesucristó che'é nana ca'mii so' a.

Dan me se ca'anj cane ruj Jesucristó, ne cachrón ra'a so' letrá rihaan yo'óo a. ⁷Tzaj ne yo'o tirquee nij so' xna'anj nij so' man so' a. Che'é dan canicun' caya uún so', ne cataj so' rihaan nij so' a:

—Sese danj me rá soj, ne ca'vee, tzaj ne a me ma'an 'o soj taj a doj cacun' tumé ro', ca'vee go' yahij man no' asino yaan ei —taj Jesucristó rihaan nij so', tzaj ne aj ne'en Jesucristó se vaa taran' nij so' ata cacun' a.

⁸Gaa ne ca'anj cane ruj uún Jesucristó, ne cachrón uún so' letrá rihaan yo'óo yo' a.

⁹Veé dan, gaa ne guun na'aj nij so' gaa cuno nij so' se-nana Jesucristó,

ne nayón nij so' chrej, ne ca'anj nij so' a. Dan me se ndaa 'o 'o nij so' nayón chrej, ne asino yaan ca'anj nij sí cachij doj, gaa ne canoco' nij sí tachruu doj xcó nij so', ne ca'anj cunudanj nij so' nanj adonj. Ndaa síj, gaa ne quináj uun Jesucristó, ne nicun' orún' chana yo' rihaan so' a. ¹⁰Gaa ne canicun' caya uún Jesucristó, ne cataj so' rihaan chana yo':

—Ca'anj taran' nij so', nanj nocoj. Me rej vaj nij sí cuta' cacun' xráa so' ga. A 'ó nij so' ne quisij rá cavi' so' a na' —taj Jesucristó, xná'anj so' man chana yo' a.

¹¹Gaa ne cataj chana yo':

—Taj vaj a 'ó sí me rá ca'mii danj, a man Señor —taj chana yo' rihaan Jesucristó a.

Gaa ne cataj Jesucristó rihaan no' a:

—A 'unj se cataj se vaa qui'yaj nii sayuun mán so' a ma'. Dan me se ca'anj so', ne se qui'yáa so' a doj cacun' rej rihaan so' a ma' —taj Jesucristó rihaan chana yo' a.

Nana nihánj taj xna'anj se vaa cataj Jesucristó se vaa ya vaa se-nana so' a

¹²Gaa ne cataj uún Jesucristó rihaan nij xrej atá suun nocoj doj do', rihaan nij sí fariseo do' a:

—Ase vaa ya'an chuguun vaa 'unj rihaan soj sij man rihaan chumii nihánj adonj. Dan me se sí noco' manj ro', se cachéé so' rej rmi' ma'. 'Unj ro', me ya'an chuguun cachee ga so', ne xcaj so' cuentá me rej vaj so', qui'yáj, ne che'é dan gaa i'na' ya nimán so' nu' cavii nu' ca'anj adonj —taj Jesucristó no nij so' a.

¹³Che'é dan cataj nij sí fariseo rihaan so' a:

—Tzaj ne inanj ma'an so' me sí taj xna'anj che'é ma'an so' á. Nuveé nana ya me nana a'mii so' che'é ma'an so' a ma' —taj nij sí fariseo rihaan Jesucristó a.

¹⁴Gaa ne cataj Jesucristó rihaan nij so' a:

—Nda' se ma'anj me sí a'mii che'ej, tzaj ne ya vaa se-nanaj ei. 'O se 'unj me sí ne'en me rej cavij, ne 'unj me sí ne'en me rej ca'anj 'unj ei. Ne xa' soj, tzaj ne ne ne'en soj me rej cavij ne ne'en soj me rej ca'anj 'unj a ma'. ¹⁵Xa' soj, tzaj ne inanj uta' soj cacun' xráa yuvii che'é inanj se vaa ruvi' rihaan soj nanj ei. Tzaj ne 'unj me se ne utá' 'unj cacun' xráa a 'ó yuvii ma'. ¹⁶Tzaj ne ca'vee se xcaj 'unj cuentá che'é yuvii daj vaa yuvii, tzaj ne ya xcaj 'unj cuentá che'é yuvii ei. Dan me se nuveé orún' 'unj me sí xcaj cuentá che'é yuvii ma'. 'O se vaa Réj sí ca'née manj rihaan chumii nihánj, ne so' me sí racuj manj adonj. ¹⁷Ne se-tucuanj Moisés tucuaán noco' soj me se nana yo' taj se vaa sese cuyaan vaa nana a'mii vij roj so', ne ya vaa se-nana roj so', taj nana yo' ei. ¹⁸Dan me se 'unj me sí taj xna'anj che'é ma'anj, ne taj xna'anj Réj sí ca'née manj uún adonj —taj Jesucristó rihaan nij so' a.

¹⁹Che'é dan xná'anj nij so' man Jesucristó, cataj nij so':

—Me rej ne rée so' ga —taj nij so' a.

Gaa ne cataj Jesucristó:

—Ne ne'en uxrá soj manj do', man Réj do' ma'. 'O se sese ne'en ya soj manj, ne ne'en soj man Réj uún adonj —taj Jesucristó rihaan nij so' a.

²⁰Nu' nihánj me nana tucu'yón Jesucristó gaa canicun' so' rá nuví nocoo rej rqué yuvi sa'anj rihaan Diose a. Ne taj vaj yuvi quita'aa man so' a ma'. 'O se ataa quisij güii ca'vee qui'yaj nii sayuun man Jesucristó nanj adonj.

Nana nihánj taj xna'anj se vaa cataj Jesucristó se vaa daj chihaa mij se guun nucuaj nij sí uun chij rihaan nij yuvi israelitá cuchí' nij so' rihaan so' a ma'

²¹Che'é dan cataj uún Jesucristó rihaan nij sí uun chij rihaan nij yuvi israelitá a:

—'Unj nihánj me se cavii 'unj ca'anj 'unj, gaa ne nano' soj manj, tzaj ne asa' cavi' soj, ne yo'o quitaj nu' cacun' tumé soj xráá soj, ne se guun nucuaj soj cuchí' soj rej ca'anj 'unj ma' —taj Jesucristó rihaan nij so' a.

²²Che'é dan xná'anj nij sí uun chij rihaan nij yuvi israelitá man tuvi' nij so', cataj nij so':

—Ticavi' so' man ma'an so', rá soj na'. Che'é dan cataj so' se vaa se guun nucuaj ní' cuchí' ní' rej ca'anj so', rá soj na' —taj nij so', xná'anj nij so' man tuvi' nij so' a.

²³Gaa ne cataj Jesucristó rihaan nij so':

—Dan me se xa' soj, tzaj ne nanj sij man rihaan chumii nihánj me soj, ne 'unj, tzaj ne sij cavii rej xta' mej nanj á. ²⁴Che'é dan cataj xna'anj 'unj rihaan soj se vaa asa' cavi' soj, ne yo'o quitaj nu' cacun' tumé soj xráá soj nanj ei. 'O se sese se cuchumán rá soj se vaa Diose mé 'unj, ne asa' cavi' soj, ne yo'o quitaj nu' cacun' tumé soj xráá soj nanj

adonj —taj Jesucristó rihaan nij so' a.

²⁵Che'é dan xná'anj nij so' man Jesucristó, cataj nij so':

—Me sí mé so' ga —taj nij so', xná'anj nij so' man Jesucristó a.

Gaa ne cataj Jesucristó rihaan nij so' a:

—Aj cataj xna'anj 'unj rihaan soj asino yaan me sij mej ei. ²⁶Vaa ndo'o nana no xcúnj ca'mij che'é soj, ne no xcúun uxraj ya ca'ne' 'unj cacun' che'é soj ei. Dan me se sí ca'néé manj, tzaj ne so' me sí a'mii ya uxrá, ne inanj nana ca'mii so' cunoj me nana taj xna'anj 'unj rihaan soj sij man rihaan chumii nihánj adonj —taj Jesucristó rihaan nij so' a.

²⁷Tzaj ne ne quene'en nij so' se vaa ca'mii Jesucristó che'é Rej so' Diose sí ca'néé man Jesucristó a ma'. ²⁸Che'é dan cataj Jesucristó rihaan nij so' a:

—Asa' quisij cavii 'unj xta' qui'yaj soj, gaa ne xcaj ya soj cuentá se vaa ya ya sij ca'néé Diose nicaj yu'unj man yuvi mej ei. Ne ne 'yáá 'unj se vaa avii inanj raá ma'anj ma'. 'O se a'mii 'unj ndaa vaa tucu'yón Réj manj adonj. ²⁹Ne so' me sí ca'néé manj rihaan soj, ne yo'o nicun' so' ga 'unj, ne a doj ne tanáj yaníj so' manj a ma'. 'O se 'yáá 'unj se inanj me rá ma'an so' qui'yáj adonj —taj Jesucristó rihaan nij so' a.

³⁰Gaa quisij ca'mii Jesucristó nana vaa danj, gaa ne cuchumán rá que'ee nij sí uun chij rihaan nij yuvi israelitá ni'yaj nij so' man Jesucristó a.

Nana nihánj taj xna'anj daj ca'mii Jesucristó ga nij sí uun chij rihaan nij yuvi israelitá sí cuchumán rá ni'yaj man so' a

³¹Che'é dan cataj Jesucristó rihaan nij sí uun chij rihaan nij

yuvij israelitá síi cuchumán rá
ni'yaj man so' a:

—Sese yo'o canoco' soj se-nanaj, ne
sij ya ya tucu'yón se-nanaj me soj,
³²ne quene'en soj nu' nana ya, ne
quinanii soj rihaan suun uun mozó,
qui'yaj nana ya yo' chuguanj —taj
Jesucristó rihaan nij so' a.

³³Gaa ne cataj nij so' rihaan
Jesucristó:

—'O se ta'níi ta'nij si'no síi cu'naj
Abraham síi cane gaa naá me núj,
ne daj chihaa mij ne guun núj mozó
a ma'. Me che'é cataj so' se vaa
quinanii núj rihaan suun uun mozó
ga —taj nij so', xná'anj nij so' man
Jesucristó a.

³⁴Gaa ne cataj Jesucristó rihaan
nij so' a:

—Ya ya cataj xna'anj 'unj rihaan
soj cuano se vaa síi 'yaj cacun' ro',
me síi uun mozó rihaan cacun'
yo' ei. ³⁵Ne xa' mozó, tzaj ne se
ca'vee guun chij mozó, ne se ca'vee
cane so' nu' cavii nu' ca'anj ma'. Ne
xa' ta'níi síi tucua ve', tzaj ne so' me
síi ca'vee cane rá ve' nu' cavii nu'
ca'anj adonj. ³⁶Che'é dan me sese
tinanii ta'níi Diose man soj rihaan
suun uun mozó, ne ya ya nuveé sij
uun mozó me soj a ma'.

³⁷"Aj ne'enj se vaa ta'níi ta'nij si'no
síi cu'naj Abraham me soj á. Tzaj
ne nano' uxrá soj daj qui'yaj soj ne
cavi' 'unj ei. Danj 'yaj soj che'é rej
na'vej rá soj nari' soj canoco' soj
se-nanaj ei. ³⁸Dan me se a'mii 'unj
inanj se vaa quene'enj qui'yaj Réj a.
Tzaj ne nij soj me síi 'yaj ndaa vaa
cataj rej soj rihaan soj adonj —taj
Jesucristó rihaan nij so' a.

³⁹Gaa ne cataj nij so' rihaan
Jesucristó a:

—Xii núj me síi cu'naj Abraham
gaa naá adonj —taj nij so' a.

Gaa ne cataj Jesucristó rihaan nij
so' a:

—Sese ya ya ta'níi ta'nij si'no síi
cu'naj Abraham me soj, ne qui'yaj
soj ndaa vaa qui'yaj síi cu'naj
Abraham yo' asuun tzaj a. ⁴⁰Tzaj
ne cuano nihánj me se nano' soj
daj qui'yaj soj ne cavi' 'unj, ne
'unj me síi cataj xna'anj rihaan
soj nu' nana ya cataj xna'anj Réj
Diose rihanj adonj. Dan me se
ino uxrá vaa 'yaj soj ga síi cu'naj
Abraham adonj. ⁴¹Maan se 'yaj soj
inanj se vaa 'yaj rej soj nanj á —taj
Jesucristó rihaan nij so' a.

Che'é dan cataj nij so' rihaan
Jesucristó a:

—Nuveé ta'nij cacun' me núj ma'.
'O se oruun Rej núj, ne Diose me so'
nanj á —taj nij so' a.

⁴²Gaa ne cataj Jesucristó rihaan
nij so' a:

—Sese Diose me Rej soj, ne cunuu
'ee rá soj manj se danj ei. 'O se
'unj me síi cavii rej nicun' Diose, ne
ca'ná' 'unj nihánj chuguanj. Dan
me se ne ca'na' ma'anj nihánj ma'.
'O se so' me síi ca'née manj ca'naj
nihánj adonj.

⁴³"Che'é se na'vej rá soj cuno soj
se-nanaj, che'é dan sayuun uxrá
vaa nana a'mij rihaan soj adonj.

⁴⁴'O se ta'níi síi chree me soj, ne me
rá soj qui'yaj soj inanj ndaa vaa me
rá rej soj síi chree qui'yaj soj adonj.
Ne xa' so', tzaj ne síi ticavi' man
yuvij me so' asij guun che'e chumii
nihánj, ne daj chihaa mij ne ne'en
so' ca'mii nica so' nana ya ma'. 'O
se ne aran' rá so' ca'mii so' nana ya
a man adonj. Danj inanj vaa so',

a'mii ne so', che'é se síi ne inanj me so', ne síi tucu'yón man yuvií ca'mii ne yuvií me uún so' adonj.

⁴⁵Ne xa' 'unj, tzaj ne che'é se nana ya a'mij rihaan soj, che'é dan ne amán rá soj uno soj se-nanaj a ma'. ⁴⁶A 'ó tuvi' soj se ca'vee quirii cacun' cuta' xráj a ma'. Inanj nana ya a'mij rihaan soj ei. Me che'é ne cuchuman rá soj cunō soj se-nanaj ga. ⁴⁷O se síi noco' ya man Diose me síi uno se-nana Diose adonj. Tzaj ne nuveé sij noco' man Diose me soj a ma'. Che'é dan ne uno soj a man adonj —taj Jesucristó rihaan nij síi uun chij rihaan nij yuvií israelitá a.

⁴⁸Gaa ne cataj nij síi uun chij rihaan nij yuvií israelitá a:

—Ya uxrá vaa nana ca'mii núj se vaa nuveé tuvi' núj mé so' a ma'. 'O se síi cavií estadó Samaria mé so' chuguanj. Nuú nana chree nimán so' ei —taj nij so' rihaan Jesucristó a.

⁴⁹Gaa ne cataj Jesucristó:

—Taj vaj nana chree nuú nimanj ma'. 'O se aráj cochróo 'unj rihaan Réj Diose, tzaj ne ne aráj cochroj soj rihanj a ma'. ⁵⁰Ne 'yaj suun 'unj che'é yan cataj yuvií se vaa sij sa' mej ma'. Tzaj ne vaa Diose, ne so' me síi me rá cataj yuvií se vaa sij sa' mé 'unj, ne so' me síi ca'ne' cacun' che'é yuvií adonj.

⁵¹Ya ya cataj xna'anj 'unj rihaan soj cuano se vaa sese cunō soj se-nanaj, ne daj chihaa mǐj se cavi' soj a ma' —taj Jesucristó a.

⁵²Che'é dan nij síi uun chij rihaan nij yuvií israelitá cataj rihaan so' a:

—Cuano nihánj me se ne'en ya núj se vaa nuú nana chree nimán

so' á. 'O se cavi' síi cu'naj Abraham cavi' nij síi nata' se-nana Diose gaa naá cavi', ne nihánj me taj so' se vaa sese cunō núj se-nana so', ne daj chihaa mǐj se cavi' núj, taj so' man asanj. ⁵³Dan me se gaa naá me se cavi' xii núj síi cu'naj Abraham, ne sij sa' doj mé so' rihaan so', rá so' na'. Ne cavi' nij síi nata' se-nana Diose uún a. Daj sij mé so', rá so' ga —taj nij so' rihaan Jesucristó a.

⁵⁴Gaa ne cataj Jesucristó rihaan nij so' a:

—Sese cataj 'unj se vaa sij sa' me ma'anj, ne taj yu'vee nó se-nanaj a ma'. Tzaj ne vaa Réj, ne so' me síi taj se vaa sa' 'yáj adonj. Dan me se Diose me Réj, ne nij soj me síi taj se vaa noco' soj man so', ⁵⁵tzaj ne ne ne'en uxrá soj man so' a ma'. Tzaj ne 'unj me síi ne'en man so' adonj. Dan me se sese cataj 'unj se vaa ne ne'enj man so', ne tuvi' soj síi ne mej nanj á. Tzaj ne ya ya ne'enj man so', ne noco' 'unj se-nana so' chuguanj.

⁵⁶Dan me se guun niha' uxrá rá xii soj síi cu'naj Abraham che'é se quene'en so' se vaa vaa güii quene'en so' se vaa ca'na' 'unj rihaan chumií nihánj a. Dan me se quene'en so' se vaa ca'ná' 'unj, gaa ne guun niha' ya uxrá rá so' ei —taj Jesucristó rihaan nij so' a.

⁵⁷Che'é dan nij síi uun chij rihaan nij yuvií israelitá cataj rihaan Jesucristó a:

—Ataa quisij so' vij chihaa chi' yo' a. Asa' a'vee taj so' se vaa quene'en so' man Abraham ga —taj nij so', xna'anj nij so' man Jesucristó a.

⁵⁸Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa asij ataa ca'ngaa síí cu'naj Abraham, ne aj nej nanj adonj —taj Jesucristó rihaan nij so' a.

⁵⁹Che'é dan quita'aa nij so' yahij, ne go' nij so' man Jesucristó, rá nij so' a. Tzaj ne curihanj yuve so' rá nuvíí nocqo yo', ne ca'anj so' a. Dan me se maan tanuu sca'núj nij so' cachén Jesucristó, ca'anj so' a.

**Nana nihánj taj xna'anj
se vaa naxra' rihaan 'o síí
tuchrii, qui'yaj Jesucristó a**

9 Dan me se cavii Jesucristó ca'anj so', gaa ne quene'en so' 'o síí tuchrii a. Dan me se síí tuchrii yo' me se tuchrii so' asij ca'ngaa so' a. ²Gaa ne xná'anj nij síí tucu'yón se-nana Jesucristó man Jesucristó, cataj nij so':

—Me che'é tuchrii síí nihánj, ga man maestro'. Ma'an so' qui'yaj cacun' na'. Ase rej so' qui'yaj cacun' xa' —taj nij so', xná'anj nij so' man Jesucristó a.

³Gaa ne cataj Jesucristó:

—Nuveé ma'an so', nuveé rej so' ga nii so' do', me síí tumé cacun' ma'. Maan se Diose me rá quene'en ní' daj qui'yaj Diose che'é so' adonj.

⁴'Q se nō xcúún ní' qui'yaj suun ní' se-suun síí ca'née manj rihaan chumii nihánj adonj. Ase vaa rej ranga' vaa yo' yaj, ne ca'vee qui'yaj suun ní' yaj ei. Tzaj ne quisij güii ca'ne' rá ní', ne ase vaa rej nií ro', gaa güii yo', ne se ca'vee qui'yaj suun ní' doj a ma'. ⁵Tzaj ne cuano nihánj me se vaj 'unj rihaan chumii

nihánj, ne ase vaa ya'an chuguun ro', danj vaa 'unj rihaan chumii nihánj adonj —taj Jesucristó rihaan nij síí tucu'yón se-nana so' a.

⁶Quisij ca'mii so' danj, gaa ne quirii talúj so' rihaan yo'óó, gaa ne qui'yaj so' doj sigui' man yo'óó yo', ne caxrj so' sigui' yo' rihaan síí tuchrii yo' a. ⁷Gaa ne cataj so' rihaan síí tuchrii yo' a:

—Ca'anj so' na'nu' so' rihaan so' rá na Siloé á —taj Jesucristó rihaan so' a.

Dan me se cuyaan vaa nana "Siloé" yo' ga nana "rasuun ca'née nii man" a.

Veé dan me se ca'anj síí tuchrii yo', ne na'nu' so' rihaan so' rá na yo', gaa ne canicaj so' ca'na' uún so', ne curuvi' rihaan so' a.

⁸Dan me se nij síí yanj nichrun' yan yanj so' do', nij síí aj ne'en man so' gaa tuchrii so' do', cataj nij so':

—Ne síí nihánj me síí cane cachíín caridad gaa rque, rá soj na' —taj nij so' ni'yaj nij so' man síí naxra' rihaan yo' a.

⁹—Danj asanj. Veé ya so' ei —taj ta'aj nij so' a.

Ne yo'ó ta'aj nij so' cataj:
—Taj ma'. Maan se ase ni'yaj guee síí cachíín caridad ro', danj ni'yaj guee síí nihánj, tzaj ne nuveé so' ma' —taj yo'ó ta'aj nij so' a.

Tzaj ne ma'an síí naxra' rihaan yo' cataj:

—'Unj me síí cachíín caridad yo' ei —taj so' a.

¹⁰Che'é dan xná'anj nij yuvii man so', cataj nij yuvii:

—Daj qui'yáá so', ne ca'vee naxra' rihaan so' ga —taj nij yuvii, xná'anj nij so' man síí tuchrii yo' a.

¹¹Gaa ne cataj so':

—Sís cu'naj Jesucristó ro', qui'yaj sigui', ne caxrj so' sigui' rihanj, gaa ne cataj xna'anj so' rihanj se vaa ca'anj 'unj na'nu' 'unj rihanj rá na Siloé a. Gaa ne gaa quisj ca'anj na'nu' 'unj rihanj rá na yo', ne naruvi' rihanj nanj á —taj sís naxra' rihaan yo' rihaan nij yuvií a.

¹²Gaa ne xná'anj nij yuvií man so', cataj nij yuvií:

—Me rej vaj so' cuano ga —taj nij yuvií, xná'anj nij yuvií man sís tuchrii yo' a.

—Ne ne'enj me rej vaj so' cuano a ma' —taj sís tuchrii yo' rihaan nij yuvií a.

Nana nihánj taj xna'anj se vaa ca'maan rá nij sís fariseo ni'yaj nij so' man sís naxra' rihaan yo' a

¹³Dan me se ca'anj nicaj nii man sís naxra' rihaan yo' rihaan nij sís fariseo a. ¹⁴Dan me se güii naránj rá nij yuvií israelitá me güii qui'yaj Jesucristó sigui' ne naxra' rihaan sís tuchrii yo' qui'yaj Jesucristó a. ¹⁵Che'é dan xná'anj uún nij sís fariseo man sís naxra' rihaan yo' daj qui'yaj so' ne naxra' rihaan so' a.

Gaa ne cataj sís naxra' rihaan yo':

—Qui'yaj so' sigui', ne caxrj so' rihanj, gaa ne na'nuj rihanj, ne cuano nihánj ruvi' rihanj nanj á —taj so' rihaan nij sís fariseo a.

¹⁶Che'é dan cataj ta'aj nij sís fariseo:

—Nuveé sij ca'néé Diose rihaan ní' me sís qui'yaj naxra' rihaan sís nihánj a ma'. 'O se 'yaj suun so' güii no xcuún ní' naraan rá ní' adonj —taj ta'aj nij sís fariseo yo' a.

Tzaj ne yo'ó ta'aj nij so' cataj:

—Tzaj ne nuveé sij tumé cacun' me so' a ma'. 'O se nij sís tumé cacun' me se daj chihaa mjí se guun nucuaj nij sís tumé cacun' qui'yaj nij so' suun sa' nocoo ndaa vaa qui'yaj sís qui'yaj naxra' rihaan sís nihánj a adonj —taj yo'ó ta'aj nij sís fariseo yo' a.

Dan me se cuxra' ta'aj nij sís fariseo man nij so', ne ino guun rá nij so' ga tuvi' nij so' ni'yaj nij so' man Jesucristó a. ¹⁷Che'é dan cataj uún nij so' rihaan sís naxra' rihaan yo' a:

—Daj uun rá ma'an so' che'é sís qui'yaj naxra' rihaan so' ga —taj nij sís fariseo, xná'anj nij so' man sís naxra' rihaan yo' a.

Ne cataj so':

—Sij nata' se-nana Diose me so', rá yá 'unj adonj —taj sís naxra' rihaan yo' che'é Jesucristó a.

¹⁸Tzaj ne ne cuchuman rá nij sís uun chij rihaan nij yuvií israelitá se vaa ya ya tuchrii me so' gaa rque ne naxra' rihaan so' a. Che'é dan ca'néé nij so' nana se vaa ca'na' rej so' do', nii so' do', ga sís naxra' rihaan yo' rihaan nij so' a. ¹⁹Veé dan cuchí' roj so', gaa ne xná'anj nij sís uun chij rihaan nij yuvií israelitá man roj so', cataj nij so':

—Ya ya ta'níí roj soj me sís nihánj na'. Ya ya tuchrii me so' gaa ca'ngaa so' na'. Asa' ca'vee naxra' rihaan so' cuano, rá roj soj ga —taj nij so', xná'anj nij so' man roj nica so' a.

²⁰Gaa ne cataj roj so':

—Ta'nij ya rój me sís nihánj, ne tuchrii ya me so' asij ca'ngaa so', ²¹tzaj ne ne ne'en uxrá rój asa' ca'vee naxra' rihaan so' cuano

ǎ ma'. Ne ne ne'en uxrá rój me síi qui'yaj naxra' rihaan so' ǎ ma'. Xna'anj soj man so' á. 'O se síi ǎj nocoo me so', ca'mii so' che'é ma'an so' nanj á —taj roj so' a.

²²Danj ca'mii roj nica rej síi naxra' rihaan yo' do', nii so' do', che'é se cuchu'vi' roj so' ni'yaj roj so' man nij síi uun chij rihaan nij yuvi israelitá a. Dan me se ǎj guun ya ca'mii nij síi uun chij rihaan nij yuvi israelitá se vaa sese cataj yo'o so' se vaa sij ca'née Diose tīnanii man yuvi rihaan sayuun me Jesucristó, ne quirii nij so' xe' man síi a'mii danj sca'núj nij yuvi israelitá a. ²³Che'é dan cataj rej síi naxra' rihaan do', nii so' do', se vaa síi ǎj nocoo me so', ne xna'anj nij so' man ma'an so' a.

²⁴Che'é dan nacúun uún nij so' man síi naxra' rihaan yo', ne cataj nij so' rihaan so' a:

—Ve'é cataj yá so' rihaan Diose daj quirán' so' á. 'O se ǎj ne'en núj se vaa xa' snó'o ca'mii ga so', tzaj ne sij tumé cacun' me so' ei —taj nij so' rihaan síi naxra' rihaan yo' a.

²⁵Che'é dan cataj síi naxra' rihaan yo':

—Ne ne'en uxraj sese sij tumé cacun' me so' ma'. Maan se orún' rasuun ne'én 'unj se vaa gaa rque, ne síi tuchrii mej, tzaj ne cuano nihánj me se ruvi' rihanj adonj —taj síi naxra' rihaan yo' a.

²⁶Che'é dan xna'anj nij so' man so', cataj nij so':

—Ne xa' síi ca'mii ga so', tzaj ne daj qui'yaj so', gaa ne naxra' rihaan so' qui'yaj so' ga —taj nij so', xna'anj nij so' man so' a.

²⁷Gaa ne cataj síi naxra' rihaan yo' rihaan nij so' a:

—ǎj cataj xna'anj 'unj rihaan soj, tzaj ne ne cuno soj ǎ ma'. Me che'é me rá soj cataj xna'anj uún 'unj rihaan soj ga. Guun ma'an soj síi tucu'yón se-nana so', rá soj na' —taj síi naxra' rihaan yo' rihaan nij so' a.

²⁸Gaa ne nij ca'mii nij so' ga síi naxra' rihaan yo', ne cataj nij so': —Ma'an so' me síi tucu'yón se-nana so', ne xa' núj, tzaj ne sij tucu'yón se-nana Moisés me núj ei.

²⁹Ne'en núj se vaa ca'mii ma'an Diose ga síi cu'naj Moisés, tzaj ne ne ne'en núj me rej cavii síi ca'mii ga so' ǎ ma' —taj nij so' rihaan síi naxra' rihaan yo' a.

³⁰Gaa ne cataj so' rihaan nij so' a:

—Niha' uxrá vaa se-nana soj chiha'. Ne ne'en soj me rej cavii so', tzaj ne síi nacuchra' rihanj me so' nanj adonj. ³¹'O se ne'en ní' se vaa ne uno Diose rihaan nij síi tumé cacun' ǎ ma'. Tzaj ne sese aráj cochroj ní' rihaan Diose, ne sese 'yaj ní' se vaa me rá Diose, ne qui'yaj Diose se vaa achíin ni'yaj ní' rihaan Diose nanj á. ³²Dan me se síi tuchrii mej gaa ca'ngaj, ne nu' ca'na' me se ne ca'na' nana rihaan ní' se vaa nacuchra' yo'o so' rihaan síi vaa danj ǎ ma'. Tananj orún' so' me síi qui'yaj danj ei. ³³Dan me se sese nuveé sij ca'née Diose rihaan ní' me so', ne daj chihaa mīj se guun nucuaj so' qui'yaj so' danj ma' —taj síi naxra' rihaan yo' rihaan nij so' a.

³⁴Gaa ne cataj nij so' rihaan so' a: —Nanj síi tumé cacun' mé so' asij ca'ngaa so' ei. Ne nó xcúun so'

tūcu'yón so' a 'ó nana rihaan núj a ma' —taj nij so' rihaan so' a.

Gaa ne quirii nij so' man so' xe' a. ³⁵Dan me se cuchí' nana rihaan Jesucristó se vaa quirii nij so' man sí naxra' rihaan yo' xe' a. Che'é dan nano' Jesucristó man so', gaa ne cataj Jesucristó rihaan so' a:

—So' me sí amán rá ni'yaj man sí ca'née Diose nicaj yu'unj man yuvij na' —taj Jesucristó rihaan sí naxra' rihaan yo' a.

³⁶Gaa ne cataj so':

—Ne me sí me sí ca'née Diose nicaj yu'unj man yuvij, señor'. Cataj xna'anj so' noj, gaa ne cuchuman raj ni'yaj man so' ei —taj sí naxra' rihaan yo' rihaan Jesucristó a.

³⁷Gaa ne cataj Jesucristó rihaan so':

—Aj quene'én so' man so', ne 'unj sij a'mii ga so' cuano me so' adonj —taj Jesucristó rihaan so' a.

³⁸Gaa ne cataj so':

—Cuanō nihánj me se chumán raj ni'yaj mán so', Señor —taj so' a.

Gaa ne canicun' ruj so' rihaan Jesucristó a. ³⁹Gaa ne cataj Jesucristó:

—Ca'ná' 'unj rihaan chumi' nihánj che'é se nō xcúún 'unj ca'ne' 'unj cacun' che'é yuvij adonj. Dan me se xa' nij sí ne ne'en, tzaj ne quene'en nij so', qui'yáj, ne xa' nij sí guun rá se vaa aj quisij xcaj nij so' cuentá, tzaj ne ase vaa sí aráán rihaan ro', danj gaa nij so' se vaa se ca'vee xcaj nij so' cuentá ma' —taj Jesucristó a.

⁴⁰Dan me se cachéé ta'aj nij sí fariseo ga Jesucristó, ne cuno nij so' nana ca'mii Jesucristó a. Che'é dan

xná'anj nij so' man Jesucristó, cataj nij so':

—Ne ase vaa sí aráán rihaan vaa núj, rá so' na' —taj nij so', xná'anj nij so' man Jesucristó a.

⁴¹Gaa ne cataj Jesucristó rihaan nij so' a:

—Sese sij ne ne'en me soj, ne taj vaj cacun' tumé soj ma'. Tzaj ne cuano nihánj me se cataj soj se vaa aj ne'en soj a. Che'é dan yo'ō tumé soj cacun' adonj —taj Jesucristó rihaan nij sí fariseo yo' a.

Nana nihánj taj xna'anj se vaa ase vaa sí tumé matzinj ro', danj vaa Jesucristó, tumé so' man ní' a

10 Gaa ne cataj uún Jesucristó rihaan nij so' a:

—Ya ya cataj xna'anj 'unj rihaan soj cuano se vaa xa' sí ne atúj ta'yaa rej nuu nij matzinj ne avii raá chingá rej nuu nij xo', tzaj ne sí ituu me so' adonj. ²Tzaj ne sí atúj ta'yaa ro', so' me sí daan matzinj yo' adonj. ³Dan me se x'núj ta'yaa rihaan so', 'yaj sí tumé ta'yaa, gaa ne uno nij matzinj se-nana so', gaa ne nacúún so' man nij matzinj a'mii so' se-chuvij 'o 'o nij xo', gaa ne 'anj nicaj so' man nij xo' xe' adonj.

⁴Gaa quisij quirii so' man nij xo' xe', ne nocō' nij matzinj xcō so', che'é se u'yón nij xo' se-nana so' ei. ⁵Tzaj ne yo'ó yuvij me se se canoco' nij xo' man yo'ó so', maan se cunanj nij xo' rihaan yo'ó so', che'é se inō ca'mii yo'ó so' xréé nij xo', ne se cu'yón uxrá nij xo' se-nana yo'ó so' a ma' —taj Jesucristó a.

⁶Dan me se ase vaa 'o cuentó vaa nana nihánj nana ca'mii Jesucristó rihaan nij so', tzaj ne ne xcaj nij so'

cuentá me taj nana nihánj a ma'.

⁷Che'é dan cataj uún Jesucristó:

—Ya ya cataj xna'anj 'unj rihaan soj cuano se vaa ase vaa ta'yaa rej atúj nij matzinj ro', danj vaa 'unj a. ⁸Dan me se xa' taran' nij síí ca'na' gaa rque doj, tzaj ne ase vaa síí ituu vaa nij so' a. Tzaj ne ne cunō nij matzinj rihaan nij so' a ma'. ⁹Dan me se ase vaa ta'yaa yo' vaa 'unj, ne síí atúj rej nicun' 'unj ro', so' me síí amán rá ni'yaj manj, ne quinani so' rihaan sayuun, ne ve'é catuu so', ne ve'é curihanj so', ne nari' so' coj chrin' cha so' nanj adonj.

¹⁰Xa' síí ituu, tzaj ne me inanj rá so' qui'yaj ituu so' matzinj do', ticavi' so' matzinj do', tinavij so' matzinj do' ei. Che'é dan atúj so' rej nuu nij matzinj a. Tzaj ne 'unj me se ca'ná' 'unj che'é se me rá 'unj yo'o gaa i'na' nij xo', ne ve'é uxrá cayáán nij xo', qui'yáj chuguanj.

¹¹Ne 'unj ro', me síí daan ya ya nij matzinj, ne tumé sa' yá 'unj man nij matzinj, ne ca'nej nimanj cavij che'é nij xo' adonj. ¹²Xa' mozó, tzaj ne nuveé sij daan matzinj me so' ma'. Sij 'yaj canaán sa'anj uun me so', ne che'é dan sese ne'en so' xcuu ca'yánj ca'nu', ne chu'vi' so', ne tanáj so' matzinj yo', ne unánj so' a. Gaa ne tanáj ma'an so' man nij matzinj, gaa ne quita'aa ca'yánj yo' man nij matzinj, ne ticha'nuu ca'yánj yo' man nij xo' nanj adonj. ¹³Danj 'yaj mozó yo', che'é se mozó uun me so', ne ne rihuun rá so' sese quiran' nij matzinj sayuun ma'.

¹⁴Ne xa' 'unj, tzaj ne sij tumé sa' man nij matzinj mej, ne ne'enj man nij matzinj noco' manj, ne ne'en nij xo' manj ei. ¹⁵Dan me se ne'en

Réj Diose manj, ne ne'enj man Réj, ne ase vaa 'unj ga Réj ro', danj vaa daán 'unj matzinj gaj chuguanj. Ne a'née nimanj cavij che'é nij xo' adonj. ¹⁶Ne vaa doj daán 'unj matzinj uún, tzaj ne nuvi' nij xo' rej nuu matzinj nihánj ma'. Ne vaa che'é ca'na' yo'ó matzinj yo' uún, qui'yáj, ne cunō nij xo' se-nanaj, gaa ne cunuu chre' nij xo' ga matzinj nihánj, gaa ne cutumé 'unj man cunudanj nij xo' adonj.

¹⁷Dan me se ca'née nimanj cavij, ne cunuu i'na' uún 'unj, ne che'é dan 'ee rá Réj Diose manj adonj. ¹⁸Taj vaj síí 'yaj fuerzá manj cavij ma'. 'O se ma'anj a'née nimanj cavij nanj á. Dan me se no xcúnj ca'nej nimanj cavij, ne no xcúnj cunuu i'na' uún 'unj adonj. Nihánj me suun ca'ne' Réj Diose rihanj nanj adonj —taj Jesucristó rihaan nij so' a.

¹⁹Gaa ne cuxra' ta'aj uún nij síí uun chij rihaan nij yuvií israelitá man nij so', gaa cuno nij so' nana yo' a.

²⁰Dan me se ta'aj nij so' cataj:

—Nuu nana chree nimán so', ne snúú so' nanj á. Taj che'é cunō soj se-nana so' ma' —taj ta'aj nij so' rihaan tuvi' nij so', ni'yaj nij so' man Jesucristó a.

²¹Gaa ne yo'ó ta'aj nij so' cataj:

—Nuveé nana chree nuú nimán síí nihánj a ma'. 'O se se guun nucuaj síí nuu nana chree nimán nacuchra' so' rihaan síí tuchrii a ma' —taj yo'ó ta'aj nij so' a.

Nana nihánj taj xna'anj se vaa guun rá nij síí uun chij rihaan nij yuvií israelitá go' nij so' yahij man Jesucristó a

²²Güii dan me se canuú cha'anj che'é nuvií nocoō chuman'

Jerusalén, ne yavii ayuu yu've' me yo' a. ²³Gaa ne cheé Jesucristó rá chingá cu'naj Corredor Salomón rá nuví nocoo yo', ²⁴ne che'é dan cunuu chre' nij sí uun chij rihaan nij yuvii israelitá, ne yo'o tucuachriin nij so' nu' anicaj man Jesucristó a. Gaa ne cataj nij so':

—Ndaa aman me quisij güii guun ya ya rá núj ni'yaj núj mán so' ga. 'O se cataj xna'anj yá yá so' rihaan núj sese ya sij ca'neé Diose tinanii man yuvii rihaan sayuun me yá so' ei —taj nij so' rihaan Jesucristó a.

²⁵Gaa ne cataj Jesucristó rihaan nij so' a:

—Aj cataj xna'anj 'unj rihaan soj, tzaj ne na'vej rá soj cuchuman rá soj a ma'. Ne xa' suun sa' nocoo 'yáá 'unj che'é Réj Diose, tzaj ne ma'an nij suun sa' nocoo yo' taj xna'anj daj sij mej adonj. ²⁶Tzaj ne ne cuchuman rá soj ni'yaj soj manj man asanj. 'O se nuveé daan 'unj matzinj me soj a ma'. ²⁷Xa' daán 'unj matzinj, tzaj ne uno nij xo' se-nanaj, ne ne'enj man nij xo', ne nocoo' nij xo' xcoj a. ²⁸Gaa ne cunuu i'na' nij xo' cayáán nij xo' ga Diose nu' cavii nu' ca'anj, qui'yáá 'unj, ne daj chihaa mój se cavi' nij xo' a ma'. Ne taj vaj sí ca'nee man nij xo' ra'aj ma'. ²⁹'O se Réj Diose me sí rqué man nij xo' rihanj, ne sij uun chij ya me so' rihaan cunudanj, ne che'é dan taj vaj sí guun nucuaj ca'nee man nij xo' ra'a Réj Diose a ma'. ³⁰'O se ase vaa orún' yuvii vaa 'unj ga Réj adonj —taj Jesucristó rihaan nij so' a.

³¹Gaa ne quita'aa uún nij sí uun chij rihaan nij yuvii israelitá yahij go' nij so' man Jesucristó a.

³²Gaa ne cataj Jesucristó rihaan nij so' a:

—Quisij qui'yaj uxraj suun sa' nocoo quene'en nij soj, ne guun nucuaj qui'yáj danj, qui'yaj Réj Diose, ne che'é me suun sa' nocoo me rá soj go' soj yahij manj ga —taj Jesucristó, xná'anj so' man nij so' a.

³³Gaa ne cataj nij sí uun chij rihaan nij yuvii israelitá:

—Se go' núj yahij mán so' che'é suun sa' nocoo qui'yáá so' a ma'. 'O se go' núj yahij mán so' che'é se ca'mii so' nana nij che'é Diose adonj. Dan me se nanj yuvii uun mé so', ne me che'é cataj so' se vaa Diose mé so' ga —taj nij so' rihaan Jesucristó a.

³⁴Gaa ne cataj Jesucristó:

—Maan se vaa nana no rihaan yanj no tucuáán nocoo' soj, ne nana ca'mii ma'an Diose me nana yo', ne dan me se cataj Diose: "'Unj me sí cataj xna'anj se vaa diose me soj á", taj Diose rihaan nij sí ca'mii se-nana so' gaa naá a. ³⁵Dan me se sese ma'an Diose cataj se vaa nij sí ca'mii se-nana so' me ma'an uún diose, gaa ne daj chihaa mój se ca'veen tanáj xco ní se-nana Diose nana no rihaan yanj gaa ma'. ³⁶Ne veé dan me ca'ne' Diose suun guee rihanj, ne ca'neé so' manj rihaan chumii nihánj ne maan che'é se cataj 'unj se vaa ta'nij Diose mej, che'é dan cataj soj se vaa nana nij ca'mij che'é Diose á. Taj che'é ca'mii nij soj danj, raj ma'. ³⁷'O se sese ne 'yaj suun 'unj se-suun Réj Diose, ne ca'vee ca'ne' rá soj ga suun amán rá ni'yaj manj chuguanj. ³⁸Tzaj ne sese ya 'yaj suun 'unj se-suun Réj Diose, ne ca'vee se ne

amán rá soj ni'yaj soj man ma'anj, tzaj ne vaa che'é cuchuman rá soj ni'yaj soj man nij suun sa' nocoo qui'yaj ei. Ndaa síj, gaa ne xcaj soj cuentá, gaa ne yo'o quene'en soj se vaa ne Réj Diose gaj, ne nej ga Réj Diose uún adonj —taj Jesucristó a.

³⁹Che'é dan guun rá uún nij so' qui'taa nij so' man so' a. Tzaj ne quinanii so' rihaan nij so' a.

**Nana nihánj taj xna'anj daj
guun rá nij síj cuchumán rá
ni'yaj man Jesucristó a**

⁴⁰Gaa ne cavii uún Jesucristó ca'anj so' rej rnej tu'va chraá cu'naj Jordán ndaa rej cuta' ne síj cu'naj Juan man yuvii gaa chéé so' a. Gaa ne guun raan so' rej yo' a. ⁴¹Gaa ne cuchi' uxrá yuvii rihaan so', ne cataj nij yuvii se vaa síj cu'naj Juan síj cuta' ne man yuvii me se a doj suun sa' nocoo ne qui'yaj so', tzaj ne quisj ya nu' nana cataj xna'anj síj cu'naj Juan che'é Jesucristó a. Danj cataj nij yuvii, ni'yaj nij yuvii nij suun sa' nocoo qui'yaj Jesucristó a. ⁴²Gaa ne cuchumán rá que'ee nij so' ni'yaj nij so' man Jesucristó gaa vaj so' rej yo' a.

**Nana nihánj taj xna'anj che'é
se vaa guun gaa cavi' síj cu'naj
Lázaro gaa ne cunuu i'na' uún
so', qui'yaj Jesucristó a**

11 Dan me se vaa 'o síj ran', ne síj cu'naj Lázaro me so', ne síj ne chuman' Betania me so' a. Ne chuman' Betania yo' me se chiháan chana cu'naj Mariá ga chu'vij Mariá chana cu'naj Marta me chuman' Betania yo' a. ²Ne chana cu'naj Mariá yo' me se no' me chana

caxrj casté gun' daj tacóo síj 'nij ra'a man ní', ne yuvé raq ma'an no' tanacoo no' tacóo so' a. Dan me se ra'vij no' me síj cu'naj Lázaro síj ran' yo' a. ³Dan me se ca'née roj ra'vij síj cu'naj Lázaro yo' nana rihaan Jesucristó, cataj roj no': "Xa' síj 'ee rá so' man, tzaj ne ran' so', a Señor", vaa nana ca'née roj no' rihaan Jesucristó a. ⁴Dan me se cuchi' nana yo' rihaan Jesucristó, gaa ne cataj so':

—Nuveé che'e rej yo'o cavi' síj cu'naj Lázaro me quiran' so' a ma'. 'O se quiran' so' che'é rej ve'é doj xcaj yuvii cuentá che'é Diose adonj. Dan me se ve'é doj xcaj yuvii cuentá che'é ma'anj ta'nij Diose, che'é se quiran' síj cu'naj Lázaro yo' nanj adonj —taj Jesucristó rihaan nij síj nata' nana yo' rihaan so' a.

⁵Ne Jesucristó me se 'ee ndo'o rá Jesucristó man chana cu'naj Marta do', man chu'vij no' chana cu'naj Mariá do', man síj cu'naj Lázaro do' a. ⁶Dan me se gaa cuno Jesucristó nana se vaa ran' síj cu'naj Lázaro, ne ne cavii ra'yanj so' ca'anj so' a ma'. 'O se guun raan so' yavj güii rej vaj so' a. ⁷Dan me se cachén yavj güii yo', gaa ne cataj Jesucristó rihaan nij síj tucu'yón se-nana so' a:

—Cavii ní' ca'anj uún ní' estadó Judea ei —taj so' rihaan nij so' a.

⁸Gaa ne cataj nij síj tucu'yón se-nana so' rihaan so' a:

—Cuanq nihánj me se guun ndo'o rá nij síj uun chij rihaan nij yuvii israelitá go' nij so' yahij mán so' ne cavi' so' á. Se guun ca'anj so' yo' ma' —taj nij so' rihaan Jesucristó a.

⁹Gaa ne cataj Jesucristó:

—Ne'en soj se vaa chuvij orá ranga' rihaan chumií nihánj 'o 'o güii, ne dan me se sese cachee yo'ó so' rej ranga', ne se naxru' so' ma'. 'O se curuvi' sa' rihaan so', qui'yaj güii chuguun rihaan chumií nihánj adonj. ¹⁰Tzaj ne sese cachee yo'ó so' rej nii, ne naxru' so', che'é se taj vaj ya'an chuguun nicaj so' adonj —taj Jesucristó a. ¹¹Dan me se quisíj ca'mii so' danj, gaa ne cataj uún so'— Ne xa' tuvi' ní' síí cu'naj Lázaro, tzaj ne otoj so' ei. Tzaj ne ca'anj yaj, che'é rej narií 'unj nej rihaan so' a —taj Jesucristó rihaan nij síí tucu'yón se-nana so' a.

¹²Che'é dan cataj nij síí tucu'yón se-nana so' rihaan so':

—'O se sese otoj so', ne cunu sa' ma'an so', Señor —taj nij so' rihaan Jesucristó a.

¹³Dan me se nana dan ca'mii Jesucristó che'é se aj cavi' síí cu'naj Lázaro, tzaj ne nij síí tucu'yón se-nana Jesucristó me se guun rá nij so' se vaa ya ya otoj uun Lázaro, taj Jesucristó, rá nij so' a. ¹⁴Che'é dan ca'mii nicá Jesucristó rihaan nij so', cataj so':

—Aj cavi' síí cu'naj Lázaro, ¹⁵ne guun niha' rá 'unj se vaa nuvi' 'unj ne ga so' gaa cavi' so' a. 'O se che'é se cavi' so' ro', che'é dan cuchuman doj rá soj ni'yaj soj manj adonj. Tzaj ne cavií ní' ca'anj ní' rej naj so' ei —taj Jesucristó rihaan nij so' a.

¹⁶Che'é dan cataj síí cu'naj Tomás Dídimó rihaan yo'ó nij síí tucu'yón se-nana Jesucristó:

—Cavií ní' ca'anj ní' ga so', gaa ne cavi' ní' ga so' á —taj so' ni'yaj so' man Jesucristó a.

¹⁷Veé dan me se cuchi' Jesucristó chuman' Betania, gaa ne cataj xna'anj nii rihaan so' se vaa aj quisíj ca'anj güii cachin' nii man síí cu'naj Lázaro rque yu'uj yuvej a. ¹⁸Dan me se nichrun' naj chuman' Betania ga chuman' Jerusalén, ne orún' va'núj kilómetro naj chuman' Jerusalén yo' a. ¹⁹Ne aj cavii que'ee nij yuvií israelitá chuman' Jerusalén, ne cuchi' nij so' rihaan chana cu'naj Marta do', rihaan chana cu'naj Mariá do', che'é rej se nanó rá roj no', che'é se aj cavi' ra'vij roj no' a.

²⁰Dan me se gaa cuno chana cu'naj Marta se vaa ca'na' Jesucristó, ne curihañj no' nari' tuvi' no' ga Jesucristó, tzaj ne chana cu'naj Mariá me se quináj no' rá ve' yo' a. ²¹Gaa ne cataj chana cu'naj Marta rihaan Jesucristó a:

—Sese cané so' nihánj, ne ne cavi' ra'vij asuun saj, man Señor. ²²Tzaj ne cuano nihánj me se ne'enj se vaa me ma'an rasuun cachinj so' rihaan Diose, ne qui'yaj so' nanj á —taj chana cu'naj Marta rihaan Jesucristó a.

²³Gaa ne cataj Jesucristó rihaan no' a:

—Cunu i'na' uún ra'vij so' —taj so' rihaan no' a.

²⁴Gaa ne cataj chana cu'naj Marta rihaan so':

—Aj ne'enj se vaa asa' quisíj güii ca'anj ni'ya chumií nihánj, ne cunu i'na' uún so' ga yo'ó nij yuvií cunu i'na' uún ei —taj no' rihaan Jesucristó a.

²⁵Gaa ne cataj Jesucristó rihaan no' a:

—Xa' 'uñj, tzaj ne sij 'yaj nuu i'na' uún yuvií mej, ne 'uñj me síí qui'yaj gaa i'na' yuvií cayáán yuvií ga Diose nu' cavii nu' ca'anj adonj. Ne xa' síí amán rá ni'yaj manj, tzaj ne ca'vee se cavi' so', tzaj ne yo'o gaa i'na' nimán so' chuguanj. ²⁶Che'é se amán rá so' ni'yaj so' manj, ne che'é dan vaa i'na' nimán so', ne daj chihaa mǐj se cavi' nimán so' a ma'. Amán rá so' nana nihánj na' —taj Jesucristó, xná'anj so' man chana cu'naj Marta yo' a.

²⁷Gaa ne cataj no':

—Chumán raj, Señor. Dan me se aj cuchumán raj se vaa sij ca'née Diose tinanii man núj rihaan sayuun mé so', ne ta'nij Diose mé so', ne ca'ná' so' rihaan chumií nihánj a —taj no' rihaan Jesucristó a.

²⁸Dan me se quisǐj ca'mii no' danj, gaa ne ca'anj no', ne canacúún yuve no' man chu'vij no' chana cu'naj Mariá, cataj no':

—Aj ca'na' maestró, ne nacúún so' mán so' a —taj no' rihaan chana cu'naj Mariá a.

²⁹Ne gaa cuno chana cu'naj Mariá nana yo', gaa ne ra'yanj cavii no', ne ca'anj no' rej nicun' Jesucristó a.

³⁰Dan me se ataa catuu Jesucristó rque chuman' yo', ne nicun' so' rej nari' tuvi' chana cu'naj Marta ga so' a.

³¹Dan me se nij yuvií israelitá yuvií cane rá ve' nanó cuentó ga chana cu'naj Mariá me se quene'en nij so' se vaa ra'yanj canicun' no' ne curihanj no' xe', ne canoco' nij so' xcó no', ne curihanj nij so' xe' a. 'O se guun rá nij so' se vaa ca'anj chana cu'naj Mariá rihaan yu'uj

yuvej che'é rej ta'vee no', rá nij so' a.

³²Dan me se gaa cuchi' chana cu'naj Mariá rej nicun' Jesucristó, gaa ne quene'en no' man so', gaa ne canicun' ruj no' rihaan Jesucristó, gaa ne cataj no':

—Sese cané so' nihánj, ne ne cavi' ra'vij asuun saj, man Señor —taj no' rihaan Jesucristó a.

³³Dan me se quene'en Jesucristó se vaa ta'vee no', se vaa ta'vee nij yuvií israelitá ca'na' ga no' do', gaa ne quinanó ndo'o rá so', ³⁴gaa ne cataj so':

—Me rej cachin' soj man so' ga —taj so', xná'anj so' man nij so' a.

Gaa ne cataj nij so' rihaan so' a:

—Ca'anj ní', gaa ne quene'én so' á —taj nij so' rihaan so' a.

³⁵Gaa ne ta'vee Jesucristó a.

³⁶Che'é dan cataj nij yuvií israelitá rihaan tuvi' nij so' a:

—Ni'yaj soj ei. 'O se ta'vee so', che'é se 'ee uxrá rá so' ni'yaj so' man síí cavi' yo' a —taj nij yuvií ni'yaj nij yuvií man Jesucristó a.

³⁷Gaa ne ta'aj nij yuvií cataj:

—'O se sij ne'en nacuchra' rihaan síí tuchrií me síí nihánj á. Che'é dan uun nucuaj so' naqui'yaj sa' so' man síí cu'naj Lázaro, ne sese cane so' nihánj, ne ne cavi' síí cu'naj Lázaro asuun saj ma' —taj ta'aj nij yuvií yo' a.

³⁸Dan me se quinanó uún rá Jesucristó, ne cuchi' so' rej cachin' nii man síí cu'naj Lázaro yo' a. Dan me se yu'uj yuvej me yo', ne caráán yahij rihaan yu'uj yo' a. ³⁹Gaa ne cataj Jesucristó:

—Naxuun soj yahij rihaan yu'uj á —taj Jesucristó a.

Gaa ne cataj ra'vij sí cavi' chana cu'naj Marta rihaan so':

—Tzaj ne gun' ri'yuj man so' yaj, Señor. 'O se quisij ca'anj ya güii naj so' nanj adonj —taj no' rihaan so' a.

⁴⁰Gaa ne cataj Jesucristó rihaan no' a:

—Aj cataj xna'anj 'unj rihaan so' se vaa sese cuchuman rá so' ni'yaj so' manj, gaa ne quene'én so' se vaa nucuaj uxrá Diose á —taj Jesucristó rihaan chana cu'naj Marta yo' a.

⁴¹Che'é dan naxuun nij so' yahij yo' a. Gaa ne naxcaj Jesucristó rihaan so', ne cataj so':

—Guun ni'yaj ní' se vaa cunó so' se-nanaj, Ataj Chij. ⁴²Aj ne'enj se vaa niganj unó so' se-nanaj, tzaj ne a'mij nana nihánj che'é rej cunó nij yuvii nicun' nihánj gaj a. 'O se me raj cuchuman rá nij yuvii se vaa so' me sí ca'née manj rihaan chumii nihánj nanj adonj —taj Jesucristó, cachíin ni'yaj so' rihaan Diose a.

⁴³Quisij cataj so' danj, gaa ne nucuaj ndo'o caguáj so', cataj so':

—Lázaro. Cavií so' ca'na' so' nihánj ei —taj so', caguáj so' rihaan sí cu'naj Lázaro yo' a.

⁴⁴Gaa ne curihanj sí cavi' yo' rque yu'uj, ne nacutáj yatzíj nu' man so', ne caráan yatzíj rihaan so' uún a. Gaa ne cataj Jesucristó rihaan nij yuvii a:

—Naché soj man so', ne cachee so' ca'anj so' á —taj Jesucristó rihaan nij yuvii a.

Nana nihánj taj xna'anj se vaa guun ndo'o rá nij xrej ata suun nocoo doj do', nij sí fariseo do', cavi' Jesucristó a

⁴⁵Dan me se ca'na' nij yuvii israelitá ga chana cu'naj Mariá

yo', ne quene'en nij so' daj qui'yaj Jesucristó a. Che'é dan cuchumán rá que'ee nij yuvii se vaa sí ca'née Diose me Jesucristó a. ⁴⁶Tzaj ne cavii yo'ó ta'aj nij so' ca'anj nij so' rihaan nij sí fariseo, gaa ne cataj xna'anj nij so' rihaan nij sí fariseo nu' se vaa qui'yaj Jesucristó a.

⁴⁷Che'é dan cunuu chre' nij xrej ata suun nocoo doj do', nij sí fariseo do', qui'yaj nij so' juntá, gaa ne cataj nij so':

—Daj qui'yaj ní', rá soj ga. 'O se xa' snó'o nihánj, tzaj ne 'yaj suun uxrá so' suun sa' nocoo adonj.

⁴⁸Sese yo'ó tanáj ní' man so' qui'yaj so' danj, ne cuchuman rá cunudanj nij yuvii ni'yaj nij yuvii man so', gaa ne ca'na' nij tanuu 'yaj suun rihaan gobiernó man Romá, gaa ne tiri' nij tanuu man ní' do', man chiháan ní' do', man nu' tuvi' ní' do' á —taj nij so' rihaan tuvi' nij so' a.

⁴⁹Gaa ne ca'mii yo'ó tuvi' nij so', sí cu'naj Caifás, ne so' me xrej ata suun nocoo doj yo' yo' a. Dan me se cataj so' rihaan nij so' a:

—Ne ne'en uxrá nij soj a ma'. ⁵⁰'O se ataa xcaj soj cuentá se vaa xa' soj, tzaj ne cavií sa' doj soj sese cavi' orún' snó'o che'é nij yuvii, gaa ne veé danj me se quiri' nu' ní' sij israelitá ma' —taj sí cu'naj Caifás rihaan yo'ó nij so' a.

⁵¹Dan me se nuveé inanjan nana cavií raá ma'an sí cu'naj Caifás me nana nihánj ma'. 'O se xrej ata suun nocoo doj me so' yo' yo', ne che'é dan ma'an Diose me sí rqué nana ca'mii so', ne che'é dan me ya vaa se-nana so' gaa cataj so' se vaa cavi' Jesucristó che'é taran' nij yuvii israelitá yo' a. ⁵²Ne nuveé inanjan che'é nij yuvii israelitá

me cavi' Jesucristó ma'. 'O se cavi' so' che'é rej naqui'yaj chre' so' man cunudanj nij ta'níi Diose nij síi man nu' rihaan chumiij nihánj, gaa ne cunuú tuvi' cunudanj nij so' adonj.

⁵³Dan me se maan güii dan me se guun che'e nij síi fariseo do', nij xrej atá suun nocoo doj do', nuchruj raá nij so' daj qui'yaj nij so', gaa ne cavi' Jesucristó a. ⁵⁴Che'é dan me ne ca'vee cachee ranga' so' estadó Judea ma'. Gaa ne cavii so' ca'anj so' tu'va rej taj vaj yuviij mán, gaa ne catúj so' yo'ó chuman' cu'naj Efraín, gaa ne caran' so' chuman' yo' ga nij síi tucu'yón se-nana so' a.

⁵⁵Dan me se daj doj quisij cha'anj pascuá cha'anj navij rá nij yuviij israelitá, ne che'é dan cavii nij yuviij ne chuman' le'ej, ne ca'anj nij so' chuman' Jerusalén, che'é rej qui'yaj nij so' tucuáan nocó' nij so' ne cunuú guee nij so' rihaan Diose a. ⁵⁶Gaa ne nano' ndo'o nij yuviij man Jesucristó a. Dan me se canicun' nij yuviij rá nuviij nocoo, ne xná'anj nij yuviij man tuvi' yuviij, cataj nij yuviij:

—Daj uun rá soj ga. Ca'na' so' rej canuú cha'anj, rá soj na' —cataj nij yuviij, xná'anj nij yuviij man tuvi' yuviij yo' a.

⁵⁷Ne xa' nij xrej atá suun nocoo doj do', nij síi fariseo do', tzaj ne cataj xna'anj nij so' se vaa sese quene'en nij yuviij me rej vaj Jesucristó, gaa ne cataj xna'anj nij yuviij rihaan ma'an nij so' a. 'O se guun rá nij so' quita'aa nij so' man Jesucristó adonj.

**Nana nihánj taj xna'anj se
vaa caxrj chana cu'naj Mariá
casté tacóo Jesucristó a**

12 Dan me se achiin yatan' güii canuú cha'anj pascuá,

ne ca'anj Jesucristó chuman' Betania a. Chuman' Betania ro', ne síi cu'naj Lázaro síi cunuú i'na' uún qui'yaj Jesucristó a. ²Dan me se qui'yaj chuvii nii cha ni'yánj Jesucristó, ne chana cu'naj Marta me chana rque chá ni'yánj nij síi 'na', ne ne síi cu'naj Lázaro rihaan mesá ga Jesucristó gaa chá so' chraa a. ³Dan me se nicaj chana cu'naj Mariá yo'ó aga' xij casté gun' daj tu'vee ndo'o, ne caxrij no' tacóo Jesucristó, gaa ne yuvé raá ma'an no' tanacoo no' tacóo Jesucristó a. Gaa ne nasij toto' nu' rá ve' yo', qui'yaj casté caxrij chana cu'naj Mariá tacóo Jesucristó a.

⁴Dan me se ne síi cu'naj Judas Iscariote, ne yo'ó síi tucu'yón se-nana Jesucristó me so', ne síi tacuachén man Jesucristó rihaan nij síi taj ri'yunj man Jesucristó me so' a. Dan me se cataj so':

⁵—Me che'é ne cutu'vee nii casté nihánj ne quirí' uxrá nii sa'anj ga. 'O se ase vaa sa'anj 'yaj canaán yuviij rque 'o yo' nó casté nihánj, ne vaa che'é rque ní' sa'anj yo' rihaan nij síi nique nanj á —taj síi cu'naj Judas yo' a.

⁶Dan me se danj tu'va ma'an síi cu'naj Judas yo', tzaj ne a doj ne nanó rá Judas yo' che'é nij síi nique a ma'. Maan se sij tumé se-chrunj nij tuvi' Jesucristó chrúun sa'anj me so', tzaj ne síi ituu me so', ne qui'yaj ituu ndo'o so' sa'anj man rque chrúun yo', ne che'é dan ca'mii so' danj nanj ei. ⁷Dan me se cataj Jesucristó rihaan so' a:

—Ca'ne' rá so' qui'yaj ma'an no' ei. Che'é yan quisij güii cachin' nii manj ro', che'é dan caxrij no' casté

tu'vee ndo'o manj nanj á. ⁸Xa' nij sí nique, tzaj ne nu' güii mán nij sí nique ga soj, ne xa' ma'anj, tzaj ne se canicún' 'unj rihaan soj nu' cavii nu' ca'anj ni'yaj soj ma' —taj Jesucristó rihaan sí cu'naj Judas yo' a.

Nana nihánj taj xna'anj se vaa guun rá nij xrej atá suun nocoo doj se vaa cavi' uún sí cu'naj Lázaro yo' a

⁹Dan me se xcaj ndo'o nij yuvii israelitá cuentá se vaa ne Jesucristó chuman' Betania, ne che'é dan ca'anj uxrá nij so' chuman' yo' a. Dan me se nuveé inanj che'é ma'an Jesucristó me ca'anj nij so' ma'. 'O se me rá nij so' quene'en nij so' man sí cu'naj Lázaro sí cunuu i'na' uún qui'yaj Jesucristó a. ¹⁰Gaa ne guun 'o rá nij xrej atá suun nocoo doj se vaa cavi' sí cu'naj Lázaro uún, qui'yaj nij so' a. ¹¹'O se che'é sí cu'naj Lázaro me se cavii ndo'o nij yuvii israelitá canoco' nij so' man Jesucristó, ne cuchumán rá nij yuvii israelitá ni'yaj nij so' man Jesucristó a.

Nana nihánj taj xna'anj daj qui'yaj nij yuvii gaa canicaj uún Jesucristó ca'anj so' chuman' Jerusalén a

¹²Gaa ne güii a'yuj me se cuchi' nana rihaan taran' nij yuvii israelitá navij rá cha'anj pascuá se vaa catuu Jesucristó chuman' Jerusalén a. ¹³Che'é dan me cuta nij yuvii ra'a chruun yuun, ne curihanj nij yuvii tu'va chuman' nari' tuvi' nij so' ga Jesucristó a. Gaa ne caguáj nij yuvii, cataj nij yuvii:

—Caraa guee ní' rihaan Diose ei. Cunaj ndo'o vaa ca'na' sí ca'néé

sí 'nij ra'a man ní' adonj. Sí uun chij rihaan ní' sij israelitá me so' chuguanj —taj nij yuvii, caguáj nij yuvii a.

¹⁴Gaa ne nari' Jesucristó yo'o burró, gaa ne cavii so' xráá burró a. Dan me se cyaan qui'yaj so' ga nana nihánj nana no rihaan danj Diose a: ¹⁵"Soj sij man chuman' Jerusalén me se se cuchu'vi' soj ma'. 'O se xcaj soj cuentá se vaa 'na' sí guun chij rihaan soj nanj adonj. Dan me se sí nica' nimán me so', ne táá so' xráá burró le'ej ta'níí xcuu burró chana adonj", taj nana no rihaan danj Diose yo' a. ¹⁶Dan me se nij sí tucu'yón se-nana Jesucristó me se gaa güii catúj Jesucristó chuman' Jerusalén, ne ne xcaj nij so' cuentá, ne ne caxrii rá nij so' se vaa qui'yaj so' ndaa vaa cataj nana no rihaan yanj yo' ma'. Tzaj ne ndaa quisj cavii sa' Jesucristó qui'yaj Diose, gaa ne ninuj rá nij so' nana no rihaan danj Diose, ne ninuj rá nij so' se vaa guun che'é Jesucristó a.

¹⁷Dan me se nij yuvii cumán ga Jesucristó me se cataj xna'anj nij so' nu' se vaa guun gaa canacúun Jesucristó man sí cu'naj Lázaro se vaa curihanj so' yu'uj uveje ne cunuu i'na' uún ya sí cu'naj Lázaro qui'yaj Jesucristó a. ¹⁸Gaa ne che'é se cuno nij yuvii man chuman' Jerusalén se vaa qui'yaj so' suun sa' nocoo yo', gaa ne che'é dan ca'na' nari' nij so' man Jesucristó a. ¹⁹Che'é dan cataj nij sí fariseo rihaan tuvi' nij so' a:

—Ni'yaj soj ei. 'O se ne qui'yaj canaán uxrá ní', qui'yaj soj a ma'. 'O se veé danj ya canoco' cunudanj

nij yuvii man rihaan chumii se-nana so' nanj adonj —taj nij so' rihaan tuvi' nij so' ni'yaj nij so' man Jesucristó a.

Nana nihánj taj xna'anj se vaa ca'na' doj síí a'mii xna'ánj griego ca'mii nij so' ga Jesucristó a

²⁰Dan me se mán ta'aj nij síí a'mii xna'ánj griego, ne sij cuchí' chuman' Jerusalén gaa anuú cha'anj pascuá me nij so', ne cuchí' nij so' na'vij nij so' rihaan Diose a. ²¹Dan me se cuchí' nij so' rihaan síí cu'naj Felipé síí cavii chuman' Betsaida chuman' naj estadó Galilea, gaa ne xná'anj nij so' man so', ne cataj nij so':

—Me rá núj ca'mii núj doj ga Jesucristó, señor —taj nij so' rihaan síí cu'naj Felipé yo' a.

²²Gaa ne ca'anj síí cu'naj Felipé cataj xna'anj so' rihaan síí cu'naj Andrés se vaa cataj nij síí a'mii xna'ánj griego yo' rihaan so' a. Gaa ne ca'anj cataj xna'anj roj so' rihaan Jesucristó, ne cataj roj so' rihaan Jesucristó se vaa ca'na' nij síí a'mii xna'ánj griego ne me rá nij so' ca'mii nij so' ga Jesucristó a. ²³Gaa ne cataj Jesucristó rihaan roj so' a:

—'Unj sij ca'née Diose nīcaj yu'unj man yuvi, tzaj ne cuano nihánj me se quisj güii cavii sa' 'unj, ne guun chij 'unj, qui'yaj Diose ei. ²⁴Ya ya cataj xna'anj 'unj rihaan soj cuano se vaa ase vaa 'núú vaa ní', ne sese se quini 'núú yaan rihaan yo'óó ne cavi' ma'an 'núú yaan yo', ne quina'vij uun 'núú yaan, tzaj ne sese cavi' 'núú yaan yo', ne quisj que'ee doj 'núú qui'yaj yo' nanj adonj.

²⁵Dan me se xa' síí me rá gaa i'na' rihaan chumii nihánj, tzaj ne yo'o

cavi' so', ne xa' síí a'vej rá cavi' rihaan chumii nihánj che'é se me so' síí noco' manj, tzaj ne yo'o gaa i'na' nimán so' nu' cavii nu' ca'anj adonj. ²⁶Che'é dan me sese vaa 'o so' nuu rihanj 'yaj suun rihanj, ne canoco' so' manj cuaj ei. Ne me rej ma'an canicun' ma'anj ro', maan dan canicun' síí nuu rihanj uún nanj ei. Gaa ne cavii sa' uxrá síí 'yaj suun rihanj, qui'yaj Réj adonj.

²⁷"Cuanó nihánj me se nanó ndo'o raj chuguanj. Ne daj qui'yáj a ranj a. Cachinj ni'yáj rihaan Réj se vaa tīnanii so' manj rihaan sayuun quiranj cuano, rá soj na'. Taj che'é qui'yáj danj ma'. Che'e yan quiran' 'unj sayuun ca'naj adonj —taj Jesucristó rihaan roj so' a.

²⁸Gaa ne cachíin ni'yaj Jesucristó rihaan Diose, cataj so':

—Cavii sa' doj ma'an so' rihaan chumii nihánj, qui'yáá so', Ataj —taj Jesucristó, cachíin ni'yaj so' a.

Gaa ne cavii 'o nana rej xta' ca'mii Diose cuno nij so', ne nana cavii rej xta' me:

—Aj cavii sa' 'unj, qui'yáj, tzaj ne cavii sa' 'unj doj, qui'yáj adonj —taj nana yo' nana cavii rej xta' ca'mii Diose cuno nij so' a.

²⁹Dan me se nicun' uxrá yuvi ga Jesucristó, ne cuno nij so' nana yo', ne cataj nij so' se vaa caguáj tu'vii rej xta' a. Ne yo'ó ta'aj nij so' cataj se vaa ca'mii yo'o se-mozó Diose nana yo' rihaan Jesucristó a. ³⁰Gaa ne cataj Jesucristó rihaan nij yuvi:

—Nuveé che'e orún' 'unj me ca'mii Diose nana yo' ma'. 'O se ca'mii Diose nana yo', che'é rej xcáj soj cuentá ei. ³¹Che'é se vaa quiranj cuano ca'ne' Diose cacun'

che'é nij yuvii man rihaan chumii nihánj, ne quirii yaníj Diose man síi chree síi uun chij rihaan chumii nihánj chuguanj. ³²Gaa ne asa' quisij naxcaj nii manj rihaan chumii nihánj cachron nii manj rihaan rcutze, gaa ne guun rá cunudanj nij yuvii canoco' nij yuvii manj, qui'yáj adonj —taj Jesucristó rihaan nij yuvii a.

³³Ne ma'an nana nihánj nana ca'mii Jesucristó ro', taj xna'anj daj qui'yaj nii man so' ne cavi' so' a.

³⁴Gaa ne cataj nij yuvii rihaan Jesucristó a:

—Aj ne'en núj nana no rihaan danj Diose se vaa síi ca'nej Diose tinanii man yuvii rihaan sayuun me se sij cayáan nu' cavii nu' ca'anj me so' a. Ne me che'é cataj so' nihánj se vaa naxcaj nii man síi ca'neé Diose nicaj yu'unj man yuvii rihaan chumii nihánj ga. Me che'é cavi' so' ga. Daj sij me síi ca'nej Diose nicaj yu'unj man yuvii, rá so' ga —taj nij yuvii, xná'anj nij yuvii man Jesucristó a.

³⁵Che'é dan cataj Jesucristó rihaan nij so' a:

—Cuanó nihánj me se vaj soj rej chuguun sa' ya'an, tzaj ne daj doj quisij orá quina'aj ya'an yo', ne se guun nucuaj soj xcaj soj cuentá ma'. Che'é dan vaa che'é xcaj soj cuentá ndaa vaa 'yaj nij síi vaj rej chuguun ya'an ei. Sese taj, ne guun soj síi chéé rej rmi', ne xa' síi chéé rej rmi', tzaj ne ne ne'en so' me rej vaj so' ma'. ³⁶Dan me se vaj soj rej chuguun ya'an, ne che'é dan cuchuman rá soj ni'yaj soj ya'an sa' ei. Quisij qui'yaj soj danj, gaa ne guun soj ta'níi ya'an chuguun, ne

sij xcaj cuentá guun soj adonj —taj Jesucristó rihaan nij yuvii a.

Quisij ca'mii Jesucristó nana nihánj, gaa ne ca'anj Jesucristó, ne caxrij yuve so' man so', che'é se na'vej rá so' quene'en nij yuvii man so' a.

Nana nihánj taj xna'anj se vaa ne cuchuman rá nij síi israelitá ni'yaj nij so' man Jesucristó ma'

³⁷Nda' se uxrá qui'yaj Jesucristó suun sa' nocoo ni'yaj nij yuvii, qui'yaj Diose, tzaj ne ne cuchuman rá nij yuvii se vaa sij ca'neé Diose me so' a ma'. ³⁸Ne veé danj quisij ya nu' se-nana síi cu'naj Isaías síi nata' se-nana Diose gaa naá a. Dan me se cataj síi cu'naj Isaías:

—Ataj síi chij. Doj yuvii cuchuman rá cuno nana ca'mii núj, ne doj yuvii xcaj cuentá se vaa nucuaj ndo'o so' sij 'nij ra'a man núj ei —taj síi cu'naj Isaías yo' a.

³⁹Ne vaa doj nana nihánj nana ca'mii Diose ne cachron síi cu'naj Isaías rihaan yanj, ne dan me se cataj xna'anj Diose me che'é ne guun nucuaj nij yuvii israelitá cuchuman rá nij so' ni'yaj nij so' man Jesucristó a:

⁴⁰—Síi ca'neé 'unj me se nata' uxrá so' se-nanaj rihaan yuvii nihánj ndaa se caráan rihaan nij yuvii, ne se ca'vee quene'en nij so' doj ma'. Ne ne ca'vee catuu doj se-nanaj nimán nij so' ma'. 'O se na'vej uxrá rá nij so' xcaj nij so' cuentá ne canicaj nimán nij so' ne nahuun sa' nij so' qui'yáa 'unj ma' —taj Diose ne cachron síi cu'naj Isaías rihaan yanj gaa naá a.

⁴¹Danj ca'mii Isaías che'é se aj quene'en so' se vaa sa' uxrá qui'yaj

Jesucristó, ne che'é dan ca'mii so' danj che'é Jesucristó a.

⁴²Tzaj ne cuchumán rá que'ee nij síi uun chij rihaan nij yuvii israelitá ni'yaj nij so' man Jesucristó a. Tzaj ne ne cataj xna'anj nij so' se vaa cuchumán rá nij so' ma'. 'O se chucu'vi' nij so' ni'yaj nij so' man nij síi fariseo, se vaa cuta' nij síi fariseo cacun' xráá nij so', gaa ne quirii yanij nij síi fariseo man nij so' rque nij yuvii israelitá yo' a. ⁴³Dan me se niha' rá nij so' doj cunō nij so' ca'mii sa' yuvii che'é nij so', ne ne caraya'anj nij so' se vaa ve'é ca'mii Diose che'é nij so' a ma'.

**Nana nihánj taj xna'anj che'é
cacun' tumé síi na'vej rá
cunō se-nana Jesucristó a**

⁴⁴Ne sca' ndo'o ca'mii Jesucristó, cataj so':

—Xa' síi amán rá ni'yaj manj, tzaj ne nuveé inanj ma'anj me síi amán rá so' ni'yaj so' man ma'. 'O se amán rá so' ni'yaj so' man síi ca'née manj rihaan chumii nihánj adonj. ⁴⁵Ne xa' síi acaj cuentá che'ej, tzaj ne so' me síi acaj cuentá che'é síi ca'née manj rihaan chumii nihánj adonj. ⁴⁶Xa' ma'anj, tzaj ne chuguun ya'an rihaan chumii nihánj qui'yaj gaa ca'naj rihaan chumii nihánj, che'é rej se quináj nij síi amán rá ni'yaj manj rej rmi' man chuguanj.

⁴⁷Ne ca'vee se se ca'vej rá yo'o so' cunō so' se-nanaj nana catúj xréé so', tzaj ne nuveé 'unj me síi cuta' cacun' xráá so' a ma'. 'O se nuveé che'e se cuta' 'unj cacun' xráá yuvii me ca'ná' 'unj rihaan chumii nihánj ma'. Tananj ca'ná'

'unj rihaan chumii nihánj che'é rej tinanii 'unj man nij yuvii man rihaan chumii nihánj rihaan chrej chi'ii uun chij nimán nij so' adonj. ⁴⁸Dan me se síi tanáj xco manj ne na'vej rá cunō se-nanaj me se quitaj cacun' xráá so' ei. 'O se che'é se ne cunō so' nana ca'mij rihaan so' ro', che'é dan quitaj cacun' xráá so' asa' quisij güii ca'ne' Diose cacun' che'é yuvii chuguanj. ⁴⁹Ne 'unj nihánj me se nuveé inanj nana cavii raj me nana ca'mij ma'. 'O se Réj síi ca'née manj me síi cataj xna'anj rihanj daj ca'mij ei. ⁵⁰Ne aj ne'enj se vaa sese cunō ní' se vaa cataj xna'anj so' rihaan ní', ne cayáán ní' ga so' nu' cavii nu' ca'anj a. Che'é dan nana a'mij me se ma'an nana ca'mii Réj rihanj me nij nana a'mij adonj. — Danj cataj Jesucristó a.

**Nana nihánj taj xna'anj se vaa
na'nu' Jesucristó tacóó nij
síi tucu'yón se-nana so' a**

13 Dan me se gaa ataa quisij cha'anj pascuá, ne quene'en Jesucristó se vaa nichrun' quisij orá tanáj so' chumii nihánj ne quinanj so' rihaan Rej so' Diose a. Dan me se 'ee rá so' man nij síi cachée ga so' rihaan chumii nihánj, ne yo'o 'ee rá so' man nij so' ndaa se cavi' so' a. ²Dan me se quisij orá chá xti'no nij so', ne aj guun rá síi chree se vaa síi cu'naj Judas Iscariote ta'níi Simón me síi tacuachén man Jesucristó rihaan nij síi taj ri'yunj man Jesucristó a. ³Ne aj quene'en Jesucristó se vaa quisij guun chij ma'an so' rihaan cunudanj rasuun, qui'yaj Diose, ne aj quene'en so' se vaa sij cavii rej yanj Diose me so'

ne quinan' uún so' rihaan Diose a.
⁴Dan me se gaa quisíj chá xti'no nij so', ne quirii Jesucristó cotoó nuu so', ne cata'aa so' 'o yatzíj toalla, ne tumíj so' catuun so' a. ⁵Veé dan, gaa ne caraa so' na rque rco'oo, gaa ne guun che'e so' na'nu' so' tacóo nij síi tucu'yón se-nana so', ne nachen so' yatzíj toalla numii catuun so', ne tinacoo so' tacóo nij síi tucu'yón se-nana so' a. ⁶Dan me se cuchí' so' rihaan síi cu'naj Simón Pedró, ne cataj Pedró rihaan so' a:
 —Señor. Ma'an so' na'nu' tacój aj na' —taj Pedró, xná'anj so' man Jesucristó a.

⁷Gaa ne cataj Jesucristó rihaan so' a:

—Ne ne'én so' me che'é 'yáj danj cuano ma'. Tzaj ne vaa güiii, ne xcaj so' cuentá adonj —taj Jesucristó rihaan Pedró a.

⁸—Daj chihaa míj se guun na'nu' so' tacój a ma' —taj Pedró rihaan Jesucristó a.

Gaa ne cataj Jesucristó rihaan so' a:

—Tzaj ne sese se na'nú' 'unj tacóo so', ne se ca'vee guún so' tuví' 'unj ma' —taj Jesucristó rihaan Pedró a.

⁹Gaa ne cataj Simón Pedró rihaan Jesucristó a:

—Se na'nú' so' inanj tacój, man Señor. Ndaa nu' ra'aj do', nu' raj do', na'nu' so' ei —taj Pedró rihaan Jesucristó a.

¹⁰Gaa ne cataj Jesucristó rihaan so' a:

—Xa' síi aj cane, tzaj ne taj che'é na'nu' nii man nu' nee man so' ma'. 'O se aj vaa cuj man so' nanj á. Maan se inanj tacóo so' na'nu' nii nanj adonj. Ne nda' se aj vaa cuj

man ta'aj soj, tzaj ne nuveé taran' soj me síi vaa cuj man ma' —taj Jesucristó a.

¹¹'O se aj quene'en Jesucristó se vaa tacuachén yo'o tuvi' nij so' man so' rihaan nij síi taj ri'yunj man so', ne che'é dan cataj so' se vaa nuveé cunudanj nij so' me síi vaa cuj man a.

¹²Dan me se gaa quisíj na'nu' Jesucristó tacóo nij so', ne nanuú so' se-cotoó so', ne ca'anj cane uún so' rej ne nij so', gaa ne xná'anj so' man nij so', cataj so':

—Ne'en soj me che'é qui'yáj danj man soj na'. ¹³Xa' soj, tzaj ne ve'é a'mii soj rihanj, taj soj se vaa sij tucu'yón man soj mej, ne sij uun chij rihaan soj mej, ne cunaj uxrá a'mii soj ei. 'O se veé yá 'unj nanj á.

¹⁴Dan me se 'unj me síi tucu'yón man soj ne 'unj me síi uun chij rihaan soj, tzaj ne guún 'unj mozó rihaan soj ne na'nú' 'unj tacóo soj ei. Che'é dan xcaj soj cuentá se vaa no xcúun soj cunuu nice' nimán soj ne guun soj mozó rihaan tuvi' soj ne na'nu' soj tacóo tuvi' soj nanj adonj. ¹⁵Danj inanj qui'yáj, che'é rej me raj quene'en soj manj, ne xcaj soj cuentá daj qui'yaj ma'an soj uún adonj. ¹⁶Cuano nihánj me cataj xna'anj yá 'unj rihaan soj se vaa nuveé sij uun chij doj me mozó rihaan se-ru'vee mozó ma'. Ne nuveé sij uun chij doj me síi ca'anj suun rihaan síi ca'née man so' ma'. Ne ase vaa mozó do', ase vaa síi ca'anj suun do', vaa soj rihanj a. Che'é dan daj se qui'yáá 'unj ro', danj gaa qui'yaj soj, qui'yaj suun soj che'é tuvi' soj ei. ¹⁷Ne aj cuno soj nana nihánj, ne sese qui'yaj

soj nu' nana nihánj, ne vaa che'é guun niha' rá soj, ne ya cavii sa' soj adonj. ¹⁸Tzaj ne ne ca'mij nana nihánj che'é taran' nij soj ma'. Dan me se aj ne'enj man soj sij narii 'unj canoco' manj, tzaj ne vaa che'é quisij guee nana nihánj nana no rihaan danj Diose adonj: "Sí chá rachrúun gaj ro', me sí guun rá tiguíj che'é manj adonj", me nana no rihaan danj Diose a.

¹⁹Asij cuano nihánj nu' rej rihaan cataj xna'anj 'unj rihaan soj daj guun rej rihaan, ne cuano nihánj me se ataa quiranj se vaa quiranj, tzaj ne asa' quisij quiranj yo', gaa ne cuchuman rá soj daj sij mej ei. ²⁰Ya ya cataj xna'anj 'unj rihaan soj se vaa xa' sí ve'é nicaj tuvi' ga sí ca'nej 'unj rihaan chumij nihánj, tzaj ne so' me sí ve'é nicaj tuvi' ga ma'anj, ne xa' sí ve'é nicaj tuvi' ga ma'anj, tzaj ne so' me sí ve'é nicaj tuvi' ga sí ca'née manj nanj adonj —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa cataj xna'anj Jesucristó che'é sí tucuachén man so' rihaan nij sí taj ri'yunj man so' a

²¹Síj ca'mii Jesucristó nana nihánj, gaa ne quinanó ndo'o rá so', gaa ne guun che'e so' cataj xna'anj so' daj qui'yaj yo'o so' man so', cataj so':

—Cuanó nihánj me se cataj yá 'unj rihaan soj se vaa yo'o tuvi' nij soj me sí tucuachén manj rihaan nij sí taj ri'yunj manj adonj —taj Jesucristó rihaan nij sí tucu'yón se-nana so' a.

²²Gaa ne ni'yaj taran' nij so' man tuvi' nij so' a. 'O se ne quene'en nij so' me che'é ca'mii Jesucristó nana vaa danj a ma'. ²³Dan me se yanj yo'o so' x'núu Jesucristó, ne nichrun' uxrá ne so' ga Jesucristó, ne sí 'ee rá Jesucristó man me so' a. ²⁴Che'é dan ticun' Simón Pedró raá Simón Pedró rihaan so', che'é rej xna'anj so' man Jesucristó me sí che'e a'mii Jesucristó a. ²⁵Che'é dan xná'anj tuvi' so' man Jesucristó, cataj so':

—Me sí qui'yaj danj, ga Señor' —taj so', xná'anj so' man Jesucristó a.

²⁶Gaa ne cataj Jesucristó: —Tiguíj 'unj doj rachrúun candó nuu rque co'oo, ne rquej man sí qui'yaj danj manj a —taj Jesucristó a.

Gaa ne tiguíj Jesucristó yo'o xco' rachrúun rque candó nuu rque co'oo, ne go' so' man sí cu'naj Judas ta'níi sí cu'naj Simón Iscariote a. ²⁷Ne gaa quisij quita'aa sí cu'naj Judas rachrúun yo', gaa ne catúj Satanás nimán so' a. Che'é dan cataj Jesucristó rihaan so' a:

—Cavii so' ca'anj so' cuaj qui'yáa so' ndaa vaa me rá so' á —taj Jesucristó rihaan Judas yo' a.

²⁸Tzaj ne a 'ó nij so' ne quene'en me che'é ca'mii Jesucristó nana vaa danj rihaan sí cu'naj Judas a ma'. ²⁹Dan me se che'é se sij tumé chrúun sa'anj me sí cu'naj Judas, che'é dan guun rá ta'aj nij so' se vaa ca'ne' Jesucristó suun rihaan so' quiraan so' se vaa cachin rihaan nij so' che'é cha'anj do', se vaa go' so' doj sa'anj rihaan nij sí nique do' a.

³⁰Dan me se nicaj Judas rachrúun yo', ne nu' quita'aa so' nu' curihanj so' xe', ne rej nij me yo' a.

Nana nihánj taj xna'anj che'é suun ca'ne' Jesucristó rihaan ní' a

³¹Che'é dan gaa quisij curihanj Judas, ne cataj Jesucristó rihaan yo'ó nij so' a:

—Daj doj quene'en yuvii se vaa sij sa' uxrá mej sij ca'née Diose nicaj yu'unj man yuvii, ne che'é dan quene'en nij yuvii se vaa sij sa' uxrá me ma'an Diose adonj.

³²Ne che'é dan quene'én' se vaa sij sa' me ma'anj, qui'yaj Diose, ne nichrun' qui'yaj so' danj nanj adonj.

³³Nichrun' quinavij orá chéé 'unj ga soj, nanj rej. Dan me se aj cataj 'unj rihaan nij sí uun chij rihaan nij yuvii israelitá se vaa cavi' 'unj ca'anj 'unj, ne se guun nucuaj nij so' cuchí' nij so' rej ca'anj 'unj ma'. Ne xa' ma'an soj, tzaj ne nano' ma'an soj manj, ne nihánj me cataj xna'anj 'unj rihaan soj se vaa se guun nucuaj ma'an soj cuchí' ma'an soj rej ca'anj 'unj a ma'. ³⁴Ne nihánj me suun naca'anej rihaan soj, se vaa yo'ó gaa 'ee rá soj man tuvi' soj ei. Dan me se daj se cunuu 'ee raj ni'yaj man soj ro', danj gaa qui'yaj soj, gaa 'ee rá soj man tuvi' soj a. ³⁵Sese gaa 'ee rá soj man tuvi' soj, ne quene'en nu' yuvii man rihaan chumij se vaa sij tucu'yón se-nanaj me soj nanj adonj —taj Jesucristó rihaan nij sí tucu'yón se-nana so' a.

Nana nihánj taj xna'anj che'é nana nij ca'mii Pedró che'é Jesucristó a

³⁶Gaa ne cataj Simón Pedró rihaan Jesucristó a:

—Me rej ca'anj so', ga Señor' —taj Pedró, xná'anj so' man Jesucristó a.

Gaa ne cataj Jesucristó:

—Xa' rej ca'anj 'unj, tzaj ne se guun nucuáa so' canocó' so' manj cuano ma'. Tzaj ne vaa güii, ne canocó' so' manj adonj —taj so' rihaan Pedró a.

³⁷Gaa ne cataj Pedró rihaan so' a:

—Me che'é se guun nucuáj canocoj mán so' cuano, Señor'. 'O se ca'nej nimanj cavi' che'é so' á —taj Pedró rihaan Jesucristó a.

³⁸Gaa ne cataj Jesucristó rihaan so' a:

—Ya ya ca'nej nimán so' cavi' so' che'ej, rá so' na'. Cuano nihánj me se cataj yá 'unj rihaan so' se vaa gaa ataa caguaj to'loo, ne va'nuj ya cataj so' se vaa ne ne'én so' manj chuguanj —taj Jesucristó rihaan Pedró a.

Nana nihánj taj xna'anj che'é nu' se vaa qui'yaj Jesucristó che'é ní' a

14 Gaa ne cataj Jesucristó rihaan taran' nij so' a:

—Ca'ne' rá soj ga suun guun vij rá á. Cuchuman rá soj ni'yaj soj Diose, ne cuchuman rá soj ni'yaj soj manj ei. ²Tucaá Réj me se vaa ndo'o rej cané yuvii ei. Sese ne vaa danj, ne me che'é cataj xna'anj 'unj rihaan soj se vaa ca'anj 'unj naqui'yaj sa' 'unj rej cané ma'an soj, rá soj ga. ³Ne che'é se ca'anj 'unj naqui'yaj sa' 'unj rej cané soj, che'é dan ne'en soj se vaa ca'na' uún 'unj rihaan soj, ne nacaj 'unj man soj; ndaa síj, gaa ne cané rcua'aa taran' ní' yo' ei. ⁴Ne aj ne'en soj chrej uchi' ndaa rej ca'anj 'unj nanj adonj —taj Jesucristó rihaan nij sí tucu'yón se-nana so' a.

⁵Gaa ne cataj sí cu'naj Tomás rihaan Jesucristó a:

—Ne ne'en núj rej ca'anj so', man Señor. Asa' ca'vee quene'en núj chrej uchi' ndaa rej ca'anj so' ga —taj sí cu'naj Tomás, xná'anj so' man Jesucristó a.

⁶Gaa ne cataj Jesucristó rihaan so' a:

—Ma'anj me guun chrej rihaan soj, ne ma'anj me nana ya cunō soj, ne ma'anj me sí qui'yaj gaa i'na' nimán soj adonj. Sese se ca'vej rá yo'o so' canoco' so' manj, ne daj chihaa mǐj se cuchí' so' rihaan Réj Diose a ma'. ⁷Sese ne'en ya soj manj, ne aj ne'en soj man Réj Diose adonj. Dan me se asij cuano ro', ne'en soj man so' nanj adonj —taj Jesucristó rihaan Tomás a.

⁸Gaa ne cataj sí cu'naj Felipé:
—Tihaán so' man Réé so' rihaan núj, ne guun ya rá núj, Señor —taj Felipé rihaan Jesucristó a.

⁹Gaa ne cataj Jesucristó rihaan Felipé a:

—Sǐj que'ee ndo'o güii cachée 'unǐj ga nij soj, ne me che'é ne quene'én so' manj, ga Felipé!. Xa' sí ne'en manj, tzaj ne so' me sí ne'en Réj Diose adonj. Asa' ca'vee cataj so' se vaa me rá so' tihaán 'unǐj man Réj Diose rihaan so' ga. ¹⁰Ne cuchumán ya rá so' se vaa cuyaán vaa rá 'unǐj ga Réj Diose a. 'O se xa' nana a'mǐj, tzaj ne nuveé nana avii raá ma'anj me nana yo' ma'. 'O se nuu Réj Diose nimanj, ne so' me sí 'yaj suun nu' suun 'yaj sunj adonj.

¹¹Cuchuman rá soj se vaa cuyaán vaa rá 'unǐj ga Réj ei. Ca'vee se ne amán rá soj ni'yaj soj man ma'anj, tzaj ne cuchuman rá soj se-nanj

che'é suun 'yaj sunj ei. ¹²Ne cuano nihánj me se cataj ya 'unǐj rihaan soj se vaa sí amán rá ni'yaj manj me se ase vaa suun 'yaj suun ma'anj ro', danj gaa suun qui'yaj suun ma'an so' uún nanj adonj. Tzaj ne suun sa' doj qui'yaj suun so', che'é se nucuǐ' 'unǐj rihaan Réj Diose ei. ¹³Ne me ma'an rasuun cachǐnj soj rihanj che'é se me soj sí noco' manj, ne nu' yo' qui'yáj che'é soj adonj. Ndaa sǐj, gaa ne ve'é ca'mǐi nii che'é Réj Diose, qui'yáj ei. ¹⁴Sese cachǐnj soj yo'o rasuun rihanj che'é se me soj sí noco' manj, ne veé danj qui'yáj adonj.

¹⁵Sese ya aráj cochroj soj rihanj, ne cunō soj nij nana cataj xna'anj 'unǐj rihaan soj a. ¹⁶Gaa ne cachǐnj ni'yaj ma'anj rihaan Réj Diose, gaa ne ca'nej so' yo'ó sí cuchí' rihaan soj, ne racuǐj ndo'o so' man soj, ne cane so' ga soj nu' cavii nu' ca'anj a. ¹⁷Dan me se Nimán Diose me sí cuchí' rihaan soj, ne inanj nana ya rque so' man soj a. Tzaj ne se guun nucuaj nij yuviǐ man rihaan chumiǐ nihánj nacaj nij so' man Nimán Diose a ma'. 'O se ne ne'en nij so' man so' ma'. Tzaj ne soj me se ne'en soj man so', che'é se ne so' ga soj, ne yo'o cane so' nimán soj adonj. ¹⁸Se quináj ma'an soj ma'. 'O se ca'na' uún 'unǐj rihaan soj ei. ¹⁹Nichrun' ca'anj 'unǐj, ne se quene'en uún nij sí man rihaan chumiǐ nihánj manj ma'. Tzaj ne quene'en ma'an soj manj, che'é se yo'o vaa i'na' 'unǐj ga Diose, ne gaa i'na' nimán soj ga Diose adonj. ²⁰Asa' quene'en soj manj ne quene'en soj se vaa cuyaán vaa rá 'unǐj ga Réj, ne cuyaán gaa

rá soj gá 'un̄j nan̄j adon̄j. ²¹Sí nari' se-nan̄aj ne uno nana yo' ro', sí yo' me sí yá yá aráj cochroj rihan̄j chuguan̄j. Ne cunuu 'ee rá Réj Diose man sí aráj cochroj rihan̄j, ne gaa 'ee rá ma'an̄j man so', ne quene'en so' manj, qui'yáj ei — taj Jesucristó rihaan nij sí tucu'yón se-nana so' a.

²²Dan me se ca'mii sí cu'naj Judas rihaan so' a. Tzaj ne nuveé sij cu'naj Judas Iscariote me so' ma'. Yo'ó sí cu'naj Judas me a. Dan me se xná'an̄j so' man Jesucristó, cataj so':

—Me che'é cataj so' cuano nihánj se vaa quene'en núj mán so' qui'yáa so', tzaj ne se quene'en nij sí man rihaan chumīi nihánj mán so' ga. Me che'é ca'mii so' dan̄j ga —taj Judas, xná'an̄j so' man Jesucristó a.

²³Gaa ne cataj Jesucristó rihaan so' a:

—Sese aráj cochroj yo'o so' rihan̄j, ne sese cunō so' se-nan̄aj, gaa ne cunuu 'ee rá Réj Diose man so', gaa ne cuch̄i' núj rihaan so', ne yo'o cayáan núj ga so' adon̄j. ²⁴Xa' sí ne aráj cochroj rihan̄j, tzaj ne ne uno so' se-nan̄aj ma'. Ne nana ca'mij cunō soj me se nuveé in̄anj se-nan̄aj me nana yo' ma'. Se-nana Réj sí ca'née manj rihaan chumīi nihánj me nana ca'mij cunō soj nan̄j adon̄j.

²⁵"Dan me se cuano yaj ne ma'an̄j ga soj, ne ca'mij nu' nana nihánj rihaan soj adon̄j. ²⁶Tzaj ne vaa güii ca'nej Réj Diose man Nimán so' cuch̄i' Nimán so' rihaan soj, ne raçuíj ndo'o Nimán so' man soj, gaa ne tucu'yón Nimán so' nu' nana man soj, ne ninuj rá soj nu' nana

ca'mij rihaan soj, qui'yaj Nimán Diose yo' ei.

²⁷"Dan me se se xej nuu nimán 'un̄j tanáj 'un̄j rihaan soj, ne se xej nuu nimán 'un̄j rquej man soj, ne se tiha' yu'un̄j 'un̄j man soj, ndaa vaa 'yaj nij sí man rihaan chumīi nihánj ma'.

Yá yá gaa xej nimán soj, qui'yaj yá 'un̄j adon̄j. Taj che'é quinano rá soj ma'. Se chucu'vi' nimán soj ma'.

²⁸Aj cunō soj nana ca'mij, se vaa cavīi 'un̄j quinán' 'un̄j, tzaj ne ca'na' uún 'un̄j rihaan soj adon̄j. Sese sij aráj cochroj rihan̄j me soj, ne guun niha' rá soj cunō soj nana se vaa cavīi 'un̄j quinán' 'un̄j yan yan̄j Réj Diose ei. Uun chij doj Réj rihan̄j nan̄j adon̄j.

²⁹"Cuano nihánj me se cataj xna'an̄j 'un̄j rihaan soj daj quirán' 'un̄j rej rihaan ní', ne asa' quisij quirán' 'un̄j dan̄j, gaa ne me rá 'un̄j cuchuman rá soj ni'yaj soj manj chuguan̄j. ³⁰Se ca'mij que'ee doj nana rihaan soj a ma'. 'O se daj doj ca'na' sí chree sí guun chij rihaan chumīi nihánj, ne a doj se ca'vee guun chij so' rihan̄j a ma'.

³¹Tzaj ne me rá 'un̄j quene'en nij sí man rihaan chumīi nihánj se vaa aráj cochróo 'un̄j rihaan Réj Diose, ne che'é dan qui'yáj ndaa vaa cataj xna'an̄j so' rihan̄j adon̄j. Canicun' caya soj, ne cavīi ní' ca'an̄j ní' ei — taj Jesucristó rihaan nij sí tucu'yón se-nana so' a.

Nana nihánj taj xna'an̄j se vaa ase vaa yo'o ya'aa coj chruj uvá ro', dan̄j vaa Jesucristó, ne ase vaa ya'aa ra'a avii xráa ya'aa man̄j ro', dan̄j vaa ní' a

15 Gaa ne cataj uún Jesucristó a: —Ase vaa yo'o ra'a

manj chruun uvá ro', danj vaa yá 'unj, ne Réj Diose me sí tumé chruun uvá yo' chuguanj. ²Ne a me ma'an 'o ra'a chruun yo' ne rii chruj uvá, ne a'néj so' man ra'a yo' nanj adonj. Tzaj ne ra'a chruun man chruj uvá raá me se ve'é a'ne' so' man yo', gaa ne cumán doj chruj uvá raá yo' uún ei. ³Dan me se ra'a chruun cachij sa' me soj, che'é se aj cuno soj nana ca'mij rihaan soj ei. ⁴'O nuú rá soj manj, ne 'o nuú 'unj nimán soj a. Dan me se xa' ra'a chruun uvá, tzaj ne se ca'vee cumán chruj raá yo' sese ma'an inanj yo' a ma'. Ne ase vaa ra'a chruun chruj uvá ro', danj vaa soj, ne sese se cuno sa' soj rihanj, ne sese ca'anj yanij soj rihanj, ne se ca'vee qui'yaj soj ndaa vaa me rá Réj Diose qui'yaj soj ma'.

⁵"Dan me se 'unj nihánj me ma'an ra'a manj coj chruj uvá, ne soj me ra'a catuun avii xráa ra'a manj ei. Ne sese yo'o cuno soj rihanj, ne sese yo'o cunuú 'unj nimán soj, ne qui'yaj uxrá soj se vaa me rá Diose qui'yaj soj chuguanj. 'O se sese se racuí 'unj man soj, ne se guun nucuj soj qui'yaj suun soj a doj suun sa' ma'. ⁶Sese se ca'vej rá yo'o so' quinaj so' ga 'unj, ne quiri'ij nii man so', ndaa vaa 'yaj nii man ra'a chruun yo', ne canacoó yo', ne naquiyaj chre' nii man nij ra'a chruun yo', ne quiri'ij nii man nij yo' rihaan ya'an ei. Dan me se cacaa nu' nij sí vaa danj nanj adonj.

⁷"Tzaj ne sese yo'o cuno soj rihanj, ne sese yo'o cunuú se-nanaj nimán soj, ne ca'vee se me ma'an rasuun guun rá soj cachinj soj rihanj, ne rquej man soj chuguanj. ⁸Che'é se

uno soj rihanj, che'é dan a'mii sa' yuvii che'é Réj Diose, ne che'é dan guun nucuj soj qui'yaj suun ndo'o soj suun sa', ne sese cuno sa' soj rihanj, ne sí tucuyón se-nanaj me soj adonj. ⁹Dan me se daj se 'ee rá Réj manj ro', danj vaa 'ee raj man soj chuguanj. Ne yo'o gaa 'ee raj ni'yaj 'unj man soj, qui'yaj soj ei. ¹⁰Sese a'née sa' soj suun a'nej rihaan soj, ne yo'o gaa 'ee raj man soj a. Veé danj 'yáa 'unj, ne a'née sa' 'unj suun a'ne' Réj Diose rihanj, ne yo'o 'ee rá so' manj adonj.

¹¹"Nu' nana nihánj cataj xna'anj 'unj rihaan soj che'é se me raj gaa niha' uxrá raj ni'yaj 'unj man soj, ne me raj gaa niha' uxrá rá ma'an soj uún a. ¹²Nihánj me suun sa' ya a'nej rihaan soj cuno soj ei. Nda' rá se vaa 'ee raj ni'yaj 'unj man soj ro', danj gaa 'ee rá soj ni'yaj soj tuvi' soj ei. ¹³Dan me se sese ca'vej rá yo'o so' nayon so' rihaan tuvi' so' cavi' so' che'é tuvi' so', ne sij 'ee ya rá man tuvi' me so', ne taj vaj a doj sí 'ee doj rá man tuvi' rihaan sí ca'vej cavi' che'é tuvi' a ma'. ¹⁴Ne nij soj me se tuvij me soj sese qui'yaj soj ndaa vaa cataj xna'anj 'unj rihaan soj nanj adonj. ¹⁵Rej rihaan ní' me se se cataj 'unj se vaa se-mozó 'unj me soj a ma'. 'O se mozó me se ne ne'en so' daj 'yaj sí uun chij rihaan so' ma'. Xa' soj, tzaj ne aj cataj 'unj se vaa tuvij me soj, che'é se aj cataj xna'anj 'unj rihaan soj nu' se vaa cataj Réj Diose rihanj adonj. ¹⁶Ne quinarii soj manj a ma'. Tananj ma'an 'unj nihánj quinarii man soj ne cuné' 'unj man soj, yan cavi' soj qui'yaj ndo'o soj se vaa me rá Diose

qui'yaj soj, ne se quina^vij suun sa' 'yaj suun soj daj chihaa mⁱj ma'. Ne che'é se cuné' 'unj man soj, che'é dan me ma'an rasuun cachinj soj rihaan Réj Diose che'é se me soj sí noco' manj, ne rque so' rasuun yo' man soj adonj. ¹⁷Nihánj me se vaa cataj xna'anj 'unj rihaan soj, se vaa gaa 'ee rá soj man tuvi' soj ei —taj Jesucristó rihaan nij sí tucu'yón se-nana so' a.

**Nana nihánj me taj xna'anj
Jesucristó se vaa nij ndo'o
qui'yaj nij sí man rihaan
chumiⁱ nihánj man ni' a**

¹⁸Gaa ne cataj uún Jesucristó a: —Sese quitaj ri'yunj nij sí man rihaan chumiⁱ nihánj ni'yaj nij so' man soj, ne xcaj soj cuentá se vaa asino yaan quitáa ri'yunj nij so' man ma'anj a. ¹⁹Sese sij man rihaan chumiⁱ nihánj un me ma'an soj, ne gaa niha' rá yo'ó nij sí man rihaan chumiⁱ nihánj ni'yaj nij so' man soj asuun, tzaj ne narii 'unj man soj se vaa tanáj soj chumiⁱ nihánj ne canoco' soj manj, ne che'é dan nuveé sij man rihaan chumiⁱ nihánj me soj cuano ma'. Che'é dan táa ri'yunj nij sí man rihaan chumiⁱ nihánj ni'yaj nij so' man soj ei.

²⁰"Yo'o cunuú rá soj nana nihánj nana cataj xna'anj 'unj rihaan soj se vaa nuveé sij uun chij doj me mozó rihaan se-ru'vee mozó ma'. Che'é se canoco' nij sí taj ri'yunj manj qui'yaj nij so' sayuun manj ro', che'é dan ne'en soj se vaa ndaa ma'an soj do', canoco' nij so' qui'yaj nij so' sayuun nanj adonj. Ne che'é se ne cunó nij so' se-nanaj, ne che'é dan ne'en soj se vaa se cuno nij so'

se-nana soj a man adonj. ²¹Dan me se qui'yaj nij so' nu' se nij yo' man soj, che'é se me soj sí noco' manj, che'é se ne ne'en nij so' man sí ca'née manj chuguanj. ²²Sese ne ca'na' 'unj, ne sese ne ca'mij ga nij so', ne taj vaj cacun' tumé nij so' saj ma'. Tzaj ne cuano nihánj me se natá' 'unj se-nana Diose rihaan nij so', ne se ca'vee cataj nij so' se vaa nuveé sij taj ri'yunj man Diose me nij so' ma'. ²³O se sí taj ri'yunj manj ro', so' me sí taj ri'yunj man Réj Diose ei. ²⁴Ne suun sa' nocoo qui'yaj sunj quene'en nij so' me se ne qui'yaj a yo'ó yuviⁱ suun sa' nocoo vaa danj ma'. Ne sese ne qui'yáj suun sa' nocoo yo' quene'en nij so', ne ne tumé nij so' cacun' saj ma'. Tzaj ne yaj me se aj quene'en nij so' nij suun sa' nocoo qui'yaj sunj, ne quitáa ri'yunj nij so' mán 'unj, man Réj Diose do', nanj adonj. ²⁵Tzaj ne nihánj me se quisij ya nu' nana nihánj nana no rihaan se-tucuanj Moisés nana nayaa ma'an nij so' se vaa, "Quitáa ri'yunj rma'an nij so' manj", taj se-tucuanj Moisés yo', ne veé danj qui'yaj guee nij so' nanj adonj.

²⁶"Dan me se ca'nej 'unj Nimán Diose cavii so' rej ne Diose ca'na' so' rihaan soj, ne racuíj so' man soj, ne inanj nana ya rque so' man soj, ne asa' ca'na' Nimán Diose rihaan soj, gaa ne cataj xna'anj so' rihaan soj che'ej ei. ²⁷Ne cataj xna'anj ma'an soj che'ej, che'é rej asij guun che'ej cachée 'unj rihaan chumiⁱ nihánj, cachée soj gaj ei.

16 "Nihánj me quisij cataj xna'anj 'unj nu' nana nihánj rihaan soj, che'é rej na'vej raj

guun na'aj soj che'é se vaa quiran' soj a. ²O se se ca'vej rá nij sí israelitá cunu chre' soj ga nij so' rá ve' tucu'yón nij so' se-tucuanj Moisés ma'. Ne quisij güi guun rá nij so' se vaa nuveé sij noco' man Diose me soj, ne guun rá sí ticavi' man soj se vaa ve'é uxrá 'yaj suun so' rihaan Diose gaa ticavi' so' man soj a. ³Danj qui'yaj nii, che'é rej ne ne'en uxrá nii man Réj Diose do', man ma'anj do' a. ⁴Tzaj ne nihánj me cataj xna'anj 'unj nu' nana nihánj rihaan soj, che'é rej asa' quiran' soj nu' sayuun nihánj, ne ninuj rá soj se vaa aj cataj xna'anj 'unj rihaan soj che'é nu' nihánj nanj adonj —taj Jesucristó rihaan nij sí tucu'yón se-nana so' a.

Nana nihánj me taj xna'anj

Jesucristó se vaa ca'anj so' ne ca'na' Nimán Diose rihaan ní' a

Gaa ne cataj uún Jesucristó a:

—Ne cataj xna'anj 'unj nu' nana nihánj rihaan soj gaa guun che'e soj cachéé soj gaj, che'é se cachéé ma'anj ga soj, ne che'é dan ne cachiin nana vaa danj rihaan soj ma'. ⁵Tzaj ne cuano nihánj me se quinán' uún 'unj rihaan sí ca'née manj rihaan chumi nihánj, ne me che'é ne xná'anj soj manj me rej ca'anj 'unj ga. ⁶Tzaj ne che'é se cataj xna'anj 'unj rihaan soj se vaa ca'anj 'unj ro', che'é dan nanó ndo' rá soj ne nuu xru' rá soj chuguanj. ⁷Tzaj ne ya vaa nana nihánj nana cataj xna'anj 'unj rihaan soj, se vaa cavi sa' soj doj che'é se ca'anj 'unj adonj. 'O se sese se ca'anj 'unj, ne se ca'na' Nimán Diose rihaan soj ma'. Tzaj ne sese ca'anj 'unj, ne

ca'nej 'unj man so' rihaan soj adonj. ⁸Ne asa' quisij ca'na' so', ne cuta' so' cacun' xráá nij sí man rihaan chumi nihánj se vaa tumé nij so' cacun' do', se vaa ataa cunu sa' nij so' rihaan Diose do', se vaa ca'ne' ya Diose cacun' che'é nij so' do' a. ⁹Dan me se che'é se ne cuchuman rá nij yuvii ni'yaj nij so' manj ro', che'é dan cataj Nimán Diose se vaa tumé nij so' cacun' a. ¹⁰Che'é se cavi 'unj quinán' 'unj rej yanj Réj Diose ne se quene'en soj doj manj ro', che'é dan cataj Nimán Diose se vaa ataa cunu sa' nij yuvii rihaan Diose a. ¹¹Che'é se aj ca'ne' Diose cacun' che'é sí chree sí uun chij rihaan chumi nihánj ro', che'é dan cataj Nimán Diose se vaa ca'ne' Diose cacun' che'é ma'an nij yuvii uún adonj.

¹²"Dan me se vaa uxrá doj nana me raj cataj xna'anj 'unj rihaan soj, tzaj ne se guun nucuaj soj cunō soj nana yo' cuano a ma'. ¹³Tzaj ne asa' quisij ca'na' Nimán Diose yo', ne tucu'yón so' nu' nana ya rihaan soj nanj ei. 'O se sij a'mii inan nana ya me so' adonj. 'O se se ca'mii so' nana cavi raá so' ma'. Tananj ca'mii so' inan nana cataj xna'anj Diose cunō so', ne dan me se cataj xna'anj so' che'é se vaa ca'na' rihaan soj rej rihaan soj nanj adonj. ¹⁴Ca'mii sa' so' che'é 'unj, che'é se nīcaj so' se-nanaj, ne nīcaj so' nu' si'yáj, ne cataj xna'anj so' nana yo' rihaan soj chuguanj. ¹⁵Nu' se nicaj Réj Diose me se si'yáj me yo' ei. Che'é dan cataj 'unj se vaa nīcaj so' si'yáj, ne tīhaan so' rihaan soj a —taj Jesucristó rihaan nij sí tucu'yón se-nana so' a.

**Nana nihánj me taj xna'anj
Jesucristó che'é güii guun niha'
rá nij sí tucu'yón se-nana so' a**

¹⁶Gaa ne cataj uún Jesucristó:

—Cachen doj, gaa ne se quene'en soj manj ma'. Gaa ne cachén doj uún, gaa ne quene'en uún soj manj chuguanj —taj Jesucristó rihaan nij sí tucu'yón se-nana so' a.

¹⁷Che'é dan xná'anj nij sí tucu'yón se-nana so' man tuvi' nij so', cataj nij so':

—Me che'é ca'mii so' nana vaa danj se vaa, "Cachen doj, gaa ne se quene'en soj manj, ne cachén doj uún, gaa ne quene'en uún soj manj, che'é se cavii 'unj quinán' 'unj rej yanj Réj Diose a". Me che'é tu'va so' danj, rá soj ga —taj nij sí tucu'yón se-nana Jesucristó, xná'anj nij so' man tuvi' nij so' a.

¹⁸Che'é dan xná'anj uún nij so', cataj nij so':

—Me che'é ca'mii so' nana "cachén doj" ga. 'O se ne ne'en uxrá núj daj taj so' a ma' —taj nij so' rihaan tuvi' nij so' a.

¹⁹Quene'en Jesucristó se vaa me rá nij so' xná'anj nij so' man so', ne che'é dan xná'anj ma'an so' man nij so', cataj so':

—Me che'é xná'anj ndo'o soj man tuvi' soj che'é nana ca'mij, se vaa cachén doj, gaa ne se quene'en uún soj manj, gaa ne cachén doj uún, gaa ne quene'en uún soj manj ga.

²⁰Cuanó nihánj me cataj yá yá 'unj rihaan soj se vaa ta'vee soj ne quinano ndo'o rá soj, tzaj ne guun niha' rá nij sí man rihaan chumii nihánj adonj. Nda' se quinano ndo'o rá soj, tzaj ne cachén doj,

gaa ne guun niha' uxrá nimán soj nanj ei. ²¹Dan me se chana uchruj ne'ej me se nanó ndo'o rá no', che'é se daj doj quisij orá cuchruj no' ne'ej, tzaj ne gaa quisij ca'ngaa ne'ej, ne ni'yón no' nu' sayuun quiran' no' nanj ei. 'O se uun niha' ndo'o rá no' che'é se ca'ngaa yuvii rihaan chumii nanj adonj.

²²Ne xa' soj, tzaj ne cuano nihánj me se nanó rá soj, tzaj ne vaa güii quene'en uún 'unj man soj, gaa ne guun niha' uxrá rá soj, ne taj vaj a doj sí ca'nee se niha' nimán soj a ma'. ²³Ne güii dan me se se xná'anj soj a doj nana manj a ma'. Ya ya cataj xna'anj 'unj rihaan soj cuano se vaa me ma'an rasuun cachinj ni'yaj soj rihaan Réj Diose ne cata' tu'va soj se-chuvij, ne rque so' nu' yo' man soj adonj. ²⁴Dan me se nda' se sij noco' manj me soj, tzaj ne gaa rque me se ne cachinj ni'yaj soj a doj rasuun rihaan Diose ma'. Cachinj ni'yaj soj, ne quirí' soj ei. Ndaa síj, gaa ne gaa niha' uxrá rá soj adonj —taj Jesucristó rihaan nij sí tucu'yón se-nana so' a.

**Nana nihánj me taj xna'anj
Jesucristó se vaa quinán' so'
rihaan Rej so' Diose ne ca'na'
uún so' rihaan chumii a**

²⁵Gaa ne cataj uún Jesucristó a:

—Dan me se aj ca'mii cachrón ndo'oj rihaan soj che'é rasuun nihánj, tzaj ne vaa güii, ne se ca'mii cachronj doj rihaan soj a ma'. Tananj nana nica nata' 'unj rihaan soj che'é Réj Diose a. ²⁶Ne güii dan me se cachinj ni'yaj soj rasuun rihaan Réj Diose, ne cata' tu'va soj se-chuvij, ne taj che'é cataj 'unj rihaan soj se vaa ma'anj cachinj ni'yaj

rihaan Réj che'é soj a ma'. ²⁷Q se ma'an Réj Diose ee rá man soj, che'é se sij aráj cochroj rihanj me soj, ne amán rá soj se vaa cavii 'unj rihaan Réj Diose nanj á. ²⁸Dan me se cavii 'unj rihaan Réj Diose, ne ca'ná' 'unj rihaan chumii nihánj, gaa ne cavii uún 'unj rihaan chumii nihánj, ne nucuí' uún 'unj rihaan Réj Diose adonj —taj Jesucristó rihaan nij sí tucu'yón se-nana so' a.

²⁹Gaa ne cataj nij sí tucu'yón se-nana so' a:

—Cuaño nihánj me se nana nicá a'mii so' no núj, ne a doj ne ca'mii cachrón so' ma'. ³⁰Nihánj me se ne'en núj se vaa ne'én so' cunudanj, ne ndaa ne'én so' me nana uun rá yuvii xna'anj yuvii mán so' a. Che'é dan amán rá núj se vaa cavii so' rihaan Diose nanj á —taj nij sí tucu'yón se-nana Jesucristó a.

³¹Gaa ne xna'anj Jesucristó man nij so', cataj so':

—Ndaa yaj cuchumán ya rá soj na'. ³²Dan me se quisij güii, ne veé aj quisij güii yo', ne cha'nuu soj, ne ino rej cunanj 'o 'o soj, ca'anj soj, ne tanáj soj man orún' 'unj nanj á. Tzaj ne se quináj orún' 'unj ma'. 'O se nicun' Réj Diose gaj adonj. ³³Nu' nana nihánj ca'mij rihaan soj, che'é se me raj gaa xej nimán soj che'é rej nocó' soj manj, tzaj ne quiran' soj sayuun rihaan chumii nihánj, tzaj ne vaa che'é guun niha' rá soj, ne guun ya ya rá soj se vaa 'unj nihánj qui'yaj canaán ya rihaan chumii nihánj ei —taj Jesucristó rihaan nij sí tucu'yón se-nana so' a.

Nana nihánj taj xna'anj daj
ca'mii Jesucristó gaa cachíin
ni'yaj so' rihaan Rej so' Diose a

17 Quisij ca'mii Jesucristó nana dan rihaan nij sí tucu'yón

se-nana so', gaa ne naxcaj rihaan so', ni'yaj so' rej xta', ne cataj so':

—Aj quisij orá yo', Ataj. Ve'é cavii 'unj sij ta'nij so', qui'yáa so', gaa ne ve'é ca'mii yuvii che'é so', qui'yáj, ²che'é se guun chij 'unj rihaan cunudanj yuvii, qui'yáa so' a. Ne che'é dan nu' nij sí rqué so' manj me se gaa i'na' nij so' nu' cavii nu' ca'anj, qui'yáj a. ³Ne sí gaa i'na' nu' cavii nu' ca'anj me se so' me sí ne'en mán so' do', mán 'unj do' a. Dan me se orún' so' me Diose ya, ne 'unj Jesucristó me sí ca'née so' rihaan chumii nihánj adonj. ⁴Dan me se aj qui'yaj sunj nu' suun ca'né' so' rihanj, ne che'é dan aj ca'mii sa' nij yuvii man rihaan chumii nihánj che'é so' nanj adonj. ⁵Ne cuano nihánj me se qui'yáa so' cavii sa' 'unj ga ma'an so', Ataj Chij, ndaa vaa cavii sa' 'unj ga so' asij ataa guun chumii nihánj a.

⁶Ne xa' nij sí rqué so' manj sí cavii rihaan chumii nihánj, tzaj ne cataj xna'anj 'unj se-nana so' rihaan nij so', ne sij cuno rihaan so' me nij so', ne rqué so' man nij so' rihanj, ne aj canoco' nij so' se-nana so' nanj á. ⁷Nihánj me se ne'en nij so' se vaa nij rasuun nicaj 'unj me se ma'an so' me sí rqué nu' rasuun yo' manj nanj adonj. ⁸'O se cataj xna'anj 'unj nu' nana rqué so' manj rihaan nij so', ne cuno nij so', ne ne'en ya nij so' se vaa cavii 'unj rihaan so', ne amán rá nij so' se vaa ca'née so' manj rihaan chumii nihánj a.

⁹Nihánj me se achíin ni'yáa 'unj rihaan so' che'é nij so' a. Ne xa' che'é nij sí man rihaan chumii nihánj, tzaj ne se cachíin ni'yáa 'unj che'é cunudanj nij so' ma'. Maan

inanj che'é nij sí rqué so' manj me cachinj ni'yáá 'unj rihaan so' adonj. 'O se sij uno rihaan so' me nij so' nanj á. ¹⁰Ne nij sí noco' manj me se noco' nij so' mán so', ne nij sí noco' mán so' ro', noco' manj, ne aj cavii sa' 'unj, qui'yaj nij so' nanj á. ¹¹Ne nihánj me se nuví' 'unj yáán rihaan chumií nihánj a ma'. 'O se nij sí nihánj yáán rihaan chumií nihánj adonj. 'Unj me se quinán' 'unj rej yanj so' nanj adonj. Dan me se nij sí rqué so' manj me se qui'yáá so' se ndo'o, ne cutumé so' man nij so', che'é rej yo'o cunō nij so' rihaan so', Ataj Chij. Ne cuyaān gaa rá nij so' ga ní' ei. ¹²Gaa cayáán 'unj ga nij so' me se tumej man nij so' cunō nij so' rihaan so' a. Che'é se rqué so' man nij so' rihanj ro', che'é dan ve'é tumej man nij so' a. Ne cunaj cutumej man nij so' adonj. Ne a 'ó nij so' ne ca'anj ni'ya, qui'yáa ma'. Tzaj ne quene'én so' se vaa ca'anj ni'ya yo'o tuvi' nij so', ne orún' so' ca'anj ni'ya, ne dan me se quisij ya nu' nana nō rihaan dáán so' adonj.

¹³"Nihánj me se quinán' 'unj rej yanj so', ne a'mii 'unj nu' nana nihánj gaa vaj 'unj rihaan chumií nihánj, che'é se me raj gaa niha' uxrá rá nij so' ndaa se vaa niha' rá ma'anj adonj. ¹⁴Aj rquej se-nana so' rihaan nij so', ne che'é dan táa ri'yunj nij sí man rihaan chumií nihánj ni'yaj nij so' man nij sí rqué so' manj a. 'O se ase vaa 'unj ro', danj vaa nij sí rqué so' manj, ne nuveé sij man rihaan chumií nihánj me nij so' a ma'.

¹⁵"O se se cachíin ni'yáá 'unj se vaa ca'nee so' man nij so' rihaan

chumií nihánj ma'. 'O se me rá 'unj cutumé so' man nij so' se cunuu chi'ii nimán nij so' a man adonj. ¹⁶Dan me se ase vaa 'unj vaa nij so', ne nuveé sij man rihaan chumií nihánj me nij so' ma'. ¹⁷Inanj nana ya cunō nij so', qui'yáá so', gaa ne sa' inanj gaa nij so' rihaan so' á. Ne se-nana ma'án so' me nana ya yo' ei. ¹⁸Dan me se ca'neé 'unj man nij so' rihaan chumií nihánj, ndaa vaa ca'neé so' man ma'anj rihaan chumií nihánj a. ¹⁹Ne nihánj me se inanj qui'yaj sunj rihaan so' cavi' 'unj che'é nij so', che'é rej cunuu sa' ya nij so' rihaan so' adonj.

²⁰"Ne nuveé inanj che'é nij sí nihánj me achíin ni'yáj rihaan so' a ma'. Tananj achíin ni'yáá 'unj che'é nij sí cunō se-nana so' ne cuchuman rá ni'yaj manj vaa güii, qui'yaj nij sí nihánj sí nata' se-nana so' nanj adonj. ²¹Dan me se, né so' gaa 'unj, Ataj Chij, ne né 'unj ga so' a. Ne 'o rcua'ān ní', ne dan me se achíin ni'yáá 'unj che'é taran' nij so' se vaa cuyaān gaa rá taran' nij so' uún, ne yo'o noco' nij so' man ní', ne che'é dan cuchuman rá nij sí man rihaan chumií nihánj se vaa ca'neé so' manj rihaan chumií nihánj a. ²²Ne ase vaa cavii sa' 'unj qui'yáá so' ro', danj cavii sa' nij so', qui'yáj, che'é se me rá 'unj cuyaān gaa rá nij so' ndaa rá se vaa 'yaj ma'an ní' a. ²³Dan me se cayáán 'unj ga nij so' ndaa vaa yáán so' ga 'unj, gaa ne quisij nij so' nari' nij so' nu' nana ya, ne ase vaa orún' yuvii ro', danj gaa nij so' a. Ndaa síj, gaa ne quene'én nij sí man rihaan chumií nihánj se vaa ca'neé so' manj ne 'ee rá so' man nij sí rqué so' manj ndaa vaa 'ee rá so' manj adonj.

²⁴Nē xā' nij síi rqué so' manj, tzaj nē me rá 'unj cayáán nij so' ga 'unj rej cayáán 'unj, Ataj. 'O se me rá 'unj quene'en nij so' se vaa cavii sa' 'unj qui'yáá so' á. 'O se asij ataa qui'yáá so' chumií nihánj me se aj 'eē rá so' manj, nē cavii sa' 'unj, qui'yáá so' ei. ²⁵Ataj Chij, sa' inanj 'yáá so' ei. Tzaj nē ne ne'en nij síi man rihaan chumií nihánj mán so' ma'. Tzaj nē 'unj me se quene'enj mán so', nē quene'en nij síi nihánj se vaa ca'née so' manj rihaan chumií nihánj a. ²⁶Nē cataj xna'anj 'unj rihaan nij so' daj sij mé so', nē cataj 'unj doj rihaan nij so', che'é rej gaa 'eē rá so' man nij so' ndaa vaa 'eē rá so' manj, nē cayáán 'unj ga nij so' a —taj Jesucristó, cachíin ni'yaj so' rihaan Diose a.

Nana nihánj taj xna'anj daj guun gaa quita'aa nij tanuu man Jesucristó a

18 Gaa quisij ca'mii Jesucristó nu' nana vaa danj, gaa ne cavii so' ga nij síi tucu'yón se-nana so', nē ca'anj nij so' rej xco chráá cu'naj Cedrón, nē cuchi' nij so' 'o naa chruun, nē catúj taran' nij so' a. ²Nē síi cu'naj Judas síi taquachén man Jesucristó rihaan nij síi taj ri'yunj man Jesucristó me se aj quene'en so' rej yo' a. 'O se aj guun que'eē ndo'o cunuu chre' Jesucristó rej yo' ga nij síi tucu'yón se-nana so' a. ³Dan me se nicaj Judas man nij tanuu do', man nij se-mozó nij xrej atā suun nocoo doj do', man nij se-mozó nij síi fariseo do', ca'anj so' rej yo' a. Nē nicaj nij so' aga' ya'an do', ca' acaa do', neē espadá do', nicaj nij so' vaj nij so' rej yanj Jesucristó ga nij síi tucu'yón

se-nana so' a. ⁴Dan me se quene'en Jesucristó nu' se vaa quirān' so', tzaj nē curihanj so', nē cataj so' rihaan nij so' a:

—Me síi nano' soj ga —taj so', xná'anj so' man nij so' a.

⁵Gaa nē cataj nij so' rihaan so' a: —Nano' núj man Jesús síi cavii chuman' Nazaret a —taj nij so' rihaan Jesucristó a.

—'Unj me so' ei —taj Jesucristó rihaan nij so' a.

Dan me se canicun' síi cu'naj Judas ga nij so' 'na' so' ga nij so' a. ⁶Dan me se gaa cataj Jesucristó se vaa ma'an so' me síi nano' nij so', gaa nē nu' naxuun nij so' man nij so', nē naxru' nij so' rihaan yo'óo a. ⁷Gaa nē xná'anj uún Jesucristó man nij so', cataj so':

—Me síi nano' soj ga —taj uún Jesucristó a.

Gaa nē cataj uún nij so': —Jesús síi cavii chuman' Nazaret a —taj uún nij so' a.

⁸Gaa nē cataj Jesucristó: —Aj cataj xna'anj 'unj rihaan soj se vaa 'unj me so' ei. Sese 'unj me síi nano' soj, nē ca'ne' rá soj ca'anj nij síi nihánj á —taj Jesucristó rihaan nij so' a.

⁹Danj ca'mii so' rihaan nij tanuu che'é rej ca'vee quisij ya nu' nana ca'mii so' rihaan Diose se vaa ne ca'anj ni'ya a 'óo nij síi rqué Diose man so' a.

¹⁰Dan me se nicaj síi cu'naj Simón Pedró neē espadá, nē quirii so' taneē so', nē go' so' raā se-mozó xrej atā suun nocoo doj, nē veé danj güéj nuj xréé so' rej nuva' so', qui'yaj Pedró a. Nē mozó yo' ro', cu'naj Malco a. ¹¹Dan me se cataj Jesucristó rihaan Pedró a:

—Na'nej sa' so' taneê so' rque nuj á. Dan me se ase vaa 'o tazá nuu na vinó rqué Réj Diose manj co'oj ro', danj vaa sayuun nihánj rihanj, ne me che'é na'vej rá so' co'oj man yo' ga —taj Jesucristó, xná'anj so' man Pedró a.

Nana nihánj taj xna'anj se vaa ca'anj nicaj nii man Jesucristó rihaan síi cu'naj Anás a

¹²Dan me se quita'aa nij tanuu do', síi uun chij rihaan nij tanuu do', nij se-mozó nij síi uun chij rihaan nij yuvií israelitá do', man Jesucristó, ne numíj nij so' ra'a so', ¹³ne asino yaan ca'anj nicaj nij so' man so' rihaan síi cu'naj Anás a. Dan me se síi cu'naj Anás yo' me se rej chej síi cu'naj Caifás me so', ne Caifás me síi guun xrej atá suun nocoo doj yo' yo' a. ¹⁴Ma'an síi cu'naj Caifás me síi narqué chrej rihaan nij síi uun chij rihaan nij yuvií israelitá se vaa vaa che'é cavi' 'o snó'o che'é cunudanj nij yuvií israelitá yo' a.

Nana nihánj taj xna'anj se vaa cataj síi cu'naj Pedró se vaa nuveé sij nocoo' man Jesucristó me so' a

¹⁵Dan me se canoco' Simón Pedró do', yo'ó síi tucu'yón se-nana Jesucristó do', rej xco Jesucristó a. Ne yo'ó so' me se sij ne'en xrej atá suun nocoo doj man me so', ne catúj so' ga Jesucristó ta'yaa tucúa xrej atá suun nocoo doj a. ¹⁶Ne Pedró me se quináj so' xe' rej nichrun' ta'yaa a. Che'é dan curihanj yo'ó síi tucu'yón se-nana Jesucristó yo', ne ca'mii so' ga chana tumé ta'yaa, ne catúj Pedró uún, qui'yaj so' a. ¹⁷Dan me se xná'anj

chana tumé ta'yaa man Pedró, cataj no':

—Ne nuvé so' me síi tucu'yón se-nana síi nihánj na' —taj no', xná'anj no' man Pedró a.

Ne cataj so':

—Taj ma' —taj Pedró yo' a.

¹⁸Ne nicun' nij mozó do', nij tanuu do', rej nachráj nii ya'an a. 'O se acoj tiha' rej man nij so', ne cunuu guun nij so' ya'an a. Ne ca'anj Pedró uún cunuu guun ma'an so' ya'an a.

Nana nihánj taj xna'anj daj ca'mii Jesucristó rihaan síi cu'naj Anás a

¹⁹Dan me se síi cu'naj Anás síi cayáan xrej atá suun nocoo doj asij rque doj ro', xná'anj so' man Jesucristó che'é nij síi tucu'yón se-nana Jesucristó do', che'é ma'an nana tucu'yón Jesucristó man nij so' do' a. ²⁰Gaa ne cataj Jesucristó rihaan nij so' a:

—'Unj ro', ca'mii ranga' rihaan cunudanj nij yuvií a. Nu' güii tucu'yón 'unj se-nanaj rá ve' tucu'yón ní se-tucuanj Moisés do', rá nuvií nocoo do', ne yo' me rej nuu chre' taran' soj sij uun chij rihaan nij yuvií israelitá a. Ne taj vaj nana ne ca'mii yuve 'unj ma'. ²¹Me che'é xná'anj soj manj ga. Xna'anj soj man nij yuvií cuno nana ca'mij á. Veé nij so' ne'en ya daj ca'mii 'unj nanj ei —taj Jesucristó rihaan síi cu'naj Anás yo' a.

²²Quisíj ca'mii Jesucristó danj, gaa ne coxro yo' o mozó nicun' rej yo' xruu Jesucristó, ne cataj so':

—Me che'é ca'mii so' danj rihaan xrej atá suun nocoo doj —taj so', guun yuvaá so' man Jesucristó a.

²³Gaa ne cataj Jesucristó rihaan so' a:

—Sese ca'mii chi'ii 'unj, ne cataj so' me nana chi'ii ca'mij á. Tzaj ne sese ca'mii sa' 'unj, ne me che'é coxro so' manj ga —taj Jesucristó rihaan mozó coxro man so' a.

²⁴Veé yo', gaa ne ca'née sí cu'naj Anás man Jesucristó rihaan sí cu'naj Caifás sí cayáan xrej atá suun nocoo doj, ne veé 'o danj numji so' ca'anj so' a.

Nana nihánj taj xna'anj se vaa yavij cataj Pedró se vaa nuveé sij nocoo' man Jesucristó me so' ma'

²⁵Dan me se nicun' Simón Pedró cunuu guun so' ya'an a. Gaa ne cataj 'o yuvij rihaan so':

—Nuveé yo' o sí nocoo' man so' mé so' na' —taj yuvij, xná'anj yuvij man so' a.

Ne cataj Pedró:

—Taj ma' —taj so' a.

²⁶Gaa ne xná'anj yo' o se-mozó xrej atá suun nocoo doj man so', ne tui' sí güéj xrée qui'yaj Pedró me so', ne cataj so':

—Nuveé so' me sí vaj ga Jesucristó rque naa chruun quene'enj na' —taj so', xná'anj so' man Pedró a.

²⁷Gaa ne cataj uún Pedró se vaa nuveé tui' Jesucristó me so' a. Ne nu' ca'mii so' danj, gaa ne nu' caguáj to'loo a.

Nana nihánj taj xna'anj che'é nana ca'mii Jesucristó ga sí cu'naj Pilato a

²⁸Dan me se nicaj nij mozó do', nij tanuu do', man Jesucristó curihanj nij so' rej ne sí cu'naj

Caifás, ne ca'anj nij so' tucúa suun a. Na'yaan uxrá me yo' a. Ne ne catuu nij sí israelitá rá tucúa suun a ma'. 'O se me rá nij so' cha nij so' cha'anj pascúa, ne che'é dan ne ca'vej rá nij so' guun chi'ii nij so' rihaan Diose qui'yaj tucúa suun yo' a. ²⁹Che'é dan curihanj ma'an sí cu'naj Pilato rej nicun' nij so' a. Ne xná'anj sí cu'naj Pilato man nij so', cataj so':

—Me cacun' cuta' soj xráá snó'o nihánj, rá soj ga —taj so' rihaan nij yuvij ca'na' ga Jesucristó a.

³⁰Gaa ne cataj nij so' rihaan sí cu'naj Pilato a:

—Sese nuveé sij 'yaj chi'ii me sí nihánj, ne ne tacuachén núj man so' ndaa rihaan so' tzaj ma' —taj nij yuvij rihaan sí cu'naj Pilato a.

³¹Che'é dan cataj sí cu'naj Pilato rihaan nij so' a:

—Nícaj soj man so', ne ca'ne' soj cacun' che'é so', qui'yaj soj ndaa vaa tucúaán nocoo' ma'an soj á —taj sí cu'naj Pilato rihaan nij so' a.

—Tzaj ne no xcúun so' cavi' so', rá núj, tzaj ne na'vej rá soj sij cavii chuman' Romá ticavi' núj man a 'o yuvij a ma' —taj nij so' rihaan Pilato a.

³²Che'é se ca'mii nij so' danj ro', che'é dan quisij ya nu' se-nana Jesucristó nana a'mii che'é daj qui'yaj nii man so' ticavi' nii man so' a. 'O se orún' nij yuvij man chuman' Romá cachrón rihaan rcutze man yuvij tumé cacun' a.

³³Dan me se catúj uún sí cu'naj Pilato tucúa suun, ne canacúun so' ca'na' Jesucristó, ne xná'anj so' man Jesucristó, cataj so':

—Ma'an so' me sí nicaj suun rey uun chij rihaan nij yuvij israelitá

na' —taj sí cu'naj Pilato rihaan Jesucristó a.

³⁴Gaa ne xná'anj Jesucristó man so', cataj Jesucristó:

—Ma'án so' cavii raá nana vaa danj ca'mii so' na'. Ase yo'ó yuvii cataj xna'anj rihaan so' che'ej xa' —taj Jesucristó, xná'anj so' man sí cu'naj Pilato a.

³⁵Gaa ne xná'anj sí cu'naj Pilato man so', cataj so':

—Sij israelitá mé 'unj, rá so' na'. Ne'én 'unj se-tucuanj soj, rá so' na'. 'O se nij tuví' so' do', ma'an nij xrej atá suun noco doj do', tacuachén mán so' rihanj á. Me cacun' tumé so' ga —taj sí cu'naj Pilato, xná'anj so' man Jesucristó a.

³⁶Gaa ne cataj Jesucristó:

—'O se nuveé rihaan chumií nihánj me rej uun chij 'unj ma'. Sese rihaan chumií nihánj me rej uun chij 'unj, ne gaa tanuu 'yaj suun rihanj, ne cavii nij tanuu, cunu' nij tanuu, che'é rej se cata'aa nij sí uun chij rihaan nij yuvii israelitá manj tzaj adonj. Tzaj ne nuveé rihaan chumií nihánj me rej guun chij 'unj ma' —taj Jesucristó a.

³⁷Gaa ne xná'anj sí cu'naj Pilato man so', cataj so':

—Che'é dan sí nicaj suun rey mé so' na'. Ya na' —taj Pilato, xná'anj so' man Jesucristó a.

Gaa ne cataj Jesucristó rihaan so' a:

—Ya uxrá vaa nana ca'mii ma'án so' se vaa sij nicaj suun rey mej á. Ne nihánj me cataj xna'anj 'unj rihaan so' me che'é ca'ngaa 'unj ne me che'é ca'ná' 'unj rihaan chumií nihánj ei. Dan me se ca'ná' 'unj cataj xna'anj 'unj nana ya rihaan

yuvii a. Ne cunudanj nij sí ya ro', uno nana ya a'mij adonj —taj Jesucristó rihaan Pilato a.

³⁸Ne cataj Pilato rihaan so':

—A me nana cu'naj nana ya ga —taj Pilato, xná'anj Pilato man Jesucristó a.

Nana nihánj taj xna'anj daj qui'yaj sí cu'naj Pilato gaa ca'ne' so' cacun' che'é Jesucristó a

Ne gaa quisij ca'mii sí cu'naj Pilato nana vaa danj ga Jesucristó, ne curihanj uún so' rej nicun' nij sí uun chij rihaan nij yuvii israelitá, ne cataj so' rihaan nij so' a:

—Taj vaj a doj cacun' tumé so' narí 'unj a ma'. ³⁹Tzaj ne vaa yo'ó tucuáan noco' ní' se vaa rii 'unj 'o tuvi' soj sí 'nij taga' 'o 'o cha'anj pascuá a. Ne me rá soj quirii 'unj man ma'an sí nihánj sí nicaj suun rey uun chij rihaan soj sij israelitá na' —taj sí cu'naj Pilato, xná'anj so' man nij yuvii a.

⁴⁰Che'é dan caguáj uún nij yuvii, cataj nij so':

—Se quirii so' man sí nihánj a ma'. Tananj sí cu'naj Barrabás quirii so' ei —taj nij yuvii, caguáj nij yuvii a.

Ne sí cu'naj Barrabás me se sij guun rá cunu' ga gobiernó me so' a.

19 Dan me se nicaj sí cu'naj Pilato man Jesucristó, ne go' nij tanuu cuartá xráá so', qui'yaj Pilato yo' a. ²Ne qui'yaj nij tanuu cachriin tanj, ne cuta' nij so' raá Jesucristó, ne na'néé nij so' yatzíj tintá sa' ndo'o man Jesucristó a.

³Gaa ne cuchi' ndo'o nij so' rihaan Jesucristó, ne cataj nij so':

—Veé sí nicaj suun rey uun chij rihaan nij yuvii israelitá mé so'

á —taj nij so', ca'mii tico nij so', ne coxro nij so' xruu Jesucristó a.

⁴Gaa ne curihañj uún síf cu'naj Pilato xe', ne cataj so' rihaan nij yuvií a:

—Ní'yaj soj ei. Curihañj uún so' rihaan soj, qui'yáj, che'é rej xcaj soj cuentá se vaa taj vaj cacun' tumé so' nari' 'unj a man chuguañj —taj Pilato rihaan nij yuvií a.

⁵Gaa ne curihañj Jesucristó xe', ne 'nij raá so' cachriin tanj, ne nuu so' yatzj tintá sa' yo' a. Ne cataj Pilato rihaan nij yuvií a:

—Ní'yaj soj man snó'o nihánj vij —taj Pilato rihaan nij yuvií a.

⁶Dan me se gaa quene'en nij xrej ata suun nocoo doj do', nij se-mozó nij so' do', man Jesucristó, ne caguáj nij so', cataj nij so':

—Cavi' so' rihaan rcutze, qui'yáá so' ei —taj nij so', caguáj nij so' a.

Gaa ne cataj Pilato rihaan nij so' a:

—Nícaj ma'an soj man so' cachron soj man so' rihaan rcutze, sese me rá soj ei. Xa' 'unj, tzaj ne taj vaj a doj cacun' tumé so' nari' 'unj a ma' —taj Pilato rihaan nij so' a.

⁷Gaa ne cataj nij síf uun chij rihaan nij yuvií israelitá no síf cu'naj Pilato:

—Vaa tucuáán noco' núj, ne tucuáán noco' núj taj se vaa no xcúún so' cavi' so', che'é rej cataj so' se vaa ta'nij Diose me so' adonj —taj nij so' rihaan Pilato a.

⁸Dan me se gaa cuno síf cu'naj Pilato nana vaa danj, gaa ne doj a chucu'vi' so', ⁹gaa ne catúj uún so' tucúa suun, ne xná'anj so' man Jesucristó, cataj so':

—Me rej cavii so' ga —taj so', xná'anj so' man Jesucristó a.

Tzaj ne ne ca'mii Jesucristó a 'ó nana rihaan so' a. ¹⁰Che'é dan cataj Pilato rihaan so' a:

—Me che'é ne a'mii so' ga. Ne ne'én so' sese 'unj ro', me síf no xcúún quirii mán so' taga', ne vej nó xcúún qui'yaj cachron nij tanuu mán so' rihaan rcutze á. Me che'é ne acaj so' cuentá ga —taj Pilato, xná'anj so' man Jesucristó a.

¹¹Gaa ne cataj Jesucristó rihaan so' a:

—Sese nuveé Diose me síf cune' mán so' catá so' suun nihánj, ne ne guun nucuáá so' qui'yáá so' a doj rasuun asuun tzaj ma'. Che'é dan síf tacuachén manj rihaan so' me síf tumé doj cacun' rihaan so' adonj —taj Jesucristó rihaan Pilato yo' a.

¹²Quisfj cuno Pilato nana dan, gaa ne nano' so' daj qui'yaj so', gaa ne ca'vee tinanii so' man Jesucristó a. Tzaj ne doj a caguáj nij síf uun chij rihaan nij yuvií israelitá, cataj nij so':

—Sese ca'anj uun síf nihánj, qui'yáá so', ne nuveé tuví' síf nicaj suun cu'naj César mé so' ma'. 'O se síf nihánj me se sij me rá guun síf nicaj suun rey me so', ne dan me se ca'nee so' suun man síf cu'naj César, rá so', ne sij taj ri'yunj man síf cu'naj César me so' adonj —taj nij so', caguáj nij so' a.

¹³Dan me se gaa cuno Pilato nana vaa danj, gaa ne ca'anj nicaj so' man Jesucristó xe', ne ca'anj cayáán so' rihaan xrúún so' chruun xlá rej ca'ne' so' cacun' che'é yuvií a. Ne rej ne chruun xlá yo' ro', me rej cu'naj Litóstratos xna'ánj griego, ne Gabata cu'naj rej yo' xna'ánj hebreo a. ¹⁴Dan me se güii 'yaj

chuvii nii che'é cha'anj pascuá me yo', ne rej caxuj me yo' a. Ne cataj Pilato rihaan nij sí uun chij rihaan nij yuvii israelitá a:

—Ní'yaj soj ei. Nihánj me sí nicaj suun rey uun chij rihaan soj chuguanj —taj so' rihaan nij yuvii a.

¹⁵Gaa ne caguáj nij yuvii, cataj nij so':

—Nícaj so' man so', ne ca'anj tanuu cachron nij tanuu man so' rihaan rcutze, qui'yáa so' cuaj ei —taj nij so' rihaan Pilato a.

Ne xná'anj Pilato man nij so', cataj so':

—Ma'an sí nicaj suun rey uun chij rihaan soj cachronj rihaan rcutze, rá soj a na' —taj so', xná'anj so' man nij so' a.

—Taj vaj 'ó rey ma'. Orún' sí cu'naj César me sí uun chij rihaan núj ei —taj nij xrej atá suun nocoo doj a.

¹⁶Gaa ne tacuachén Pilato man Jesucristó rihaan nij so' cachron nij so' man so' rihaan rcutze a.

**Nana nihánj taj xna'anj daj
guun gaa cachron nij tanuu man
Jesucristó rihaan rcutze a**

Dan me se ca'anj nicaj nij so' man Jesucristó, ¹⁷ne ma'an so' cataj rcutze, ne cavii so' ca'anj so' rej cu'naj tacaan cúu yave, ne rej yo' ro', cu'naj Gólgota xna'ánj hebreo a. ¹⁸Ne gaa cuchi' nij so' rej yo', gaa ne cachron nij tanuu man so' rihaan rcutze, ne yavij roj so' cachron uún nij tanuu rihaan yavij rcutze uún, ne yo'o so' ro', nicun' rej nuva' Jesucristó, ne yo'ó so' ro', nicun' rej nichrun Jesucristó, ne tanuu nicun' ma'an Jesucristó a. ¹⁹Ne ca'ne' sí

cu'naj Pilato suun, se vaa cano letrá rihaan 'o rcuchra', ne cano rcuchra' yo' raá rcutze, ne letrá yo' taj xna'anj me che'é caví' Jesucristó a. Ne nihánj me se taj letrá no rihaan rcuchra' yo', se vaa "Sí nihánj me Jesucristó sí cavii chuman' Nazaret, ne sí nicaj suun rey me so', uun chij so' rihaan nij yuvii israelitá", taj letrá yo' a. ²⁰Dan me se nayaa que'ee nij sí israelitá nana yo' a. 'O se nichrun' naj rej cachron nii man Jesucristó rihaan rcutze ga ma'an chuman' Jerusalén yo' a. Ne cachron nii nana yo' xna'ánj hebreo do', xna'ánj latín do', xna'ánj griego do' a.

²¹Che'é dan nij xrej atá suun nocoo doj che'é nij yuvii israelitá ro', cataj nij ro' rihaan sí cu'naj Pilato a:

—Se guun cano letrá se vaa sí nicaj suun rey uun chij rihaan núj sij israelitá me so' ma'. Maan se cataj letrá se vaa ma'an so' cataj se vaa sí nicaj suun rey uun chij rihaan nij yuvii israelitá me so' á —taj nij so' rihaan sí cu'naj Pilato a.

²²—Aj quisij cachron 'unj nana cachronj nanj á —taj Pilato rihaan nij so' a.

²³Dan me se gaa quisij cachron nij tanuu man Jesucristó rihaan rcutze, ne nicaj nij so' sagan' Jesucristó, ne cuxra' ta'aj nij so' sagan' Jesucristó, ne nicaj 'o 'o tanuu ta'aj sagan' Jesucristó yo' a. Ne vaa se-cotoó Jesucristó uún a. Ne xa' se-cotoó so', tzaj ne taj rej nuva' nii se-cotoó so' ma'. Maan se orún' yatzij me yo' gaa canánj nii man yo' a. ²⁴Che'é dan cataj nij tanuu rihaan tuvi' nij so' a:

—Se cuxra' ta'aj ní' man cotoó nihánj ma'. Maan se tico tixaj ní' se-suerté ní' che'é nihánj, ne quene'en ní' me sí nacaj man cotoó yo' ei —taj nij so' a.

Danj qui'yaj nij so', ne quisíj ya nu' nana nihánj nana no rihaan danj Diose a: "Cuxra' ta'aj nii sagan' 'unj, ne tico tixaj nii che'é se-cotoó 'unj a", taj danj Diose a. Dan me se nij tanuu me nij sí qui'yaj danj adonj.

²⁵Ne nichrun' nicun' nii Jesucristó do', chu'vij nii so' do', chana cu'naj Mariá nica sí cu'naj Cleofas do', chana cu'naj Mariá Magdalena do', rihaan rcutze no Jesucristó a. ²⁶Dan me se quene'en Jesucristó man nii so' do', man sí tucu'yón se-nana so' sí 'ee rá so' man do', se vaa nicun' rcua'aan roj so' rihaan so', ne cataj so' rihaan nii so':

—Sí nihánj guun ta'ní so', nahiin —taj Jesucristó no nii so' a.

²⁷Gaa ne cataj so' rihaan sí tucu'yón se-nana so' yo' a:

—Chana nihánj guun ní so' á —taj so' rihaan sí tucu'yón se-nana so' yo' a.

Ne maan orá dan guun nij sí tucu'yón se-nana Jesucristó yo' man nii Jesucristó, ne ca'anj nicaj so' man no' ve' tucua ma'an so' a.

Nana nihánj taj xna'anj daj guun gaa cavi' Jesucristó a

²⁸Quisíj qui'yaj nij so' danj, gaa ne quene'en Jesucristó se vaa aj quisíj ya nu' se vaa taj danj Diose che'é so' a. Che'é dan cataj so':

—Nacoó 'unj na nanj á —taj so' a.

²⁹Yanj 'o xruj nuu na vinó yuu rihaan yo'óo, ne nicaj nij so' 'o

yataan esponja, ne tucua'anj nij so' yataan rque na vinó yuu yo', ne cuta' nij so' raa 'o coj hisopo, ne cachrón nij so' yataan yo' tu'va Jesucristó a. ³⁰Ne gaa quisíj co'o Jesucristó na vinó yuu nuu rque yataan yo', ne cataj so':

—Veé danj navij suun, qui'yáj a —taj so', ne ni'naa raa so', ne ca'ne' rá so', ne cavi' so' a.

Nana nihánj taj xna'anj se vaa cho'oj 'o tanuu chruun lanzá x'núu Jesucristó a

³¹Dan me se güii 'yaj chuvii nij sí israelitá cha nij so' cha'anj pascua me yo', ne güii guee ndo'o me cuetan' a'yuj, 'yaj nij yuvii israelitá, ne ne ca'vej rá nij yuvii yo' canoco' xngá rihaan rcutze güii guee yo' a. Che'é dan me cachín ni'yaj nij sí uun chij rihaan nij yuvii israelitá rihaan sí cu'naj Pilato se vaa ca'ne' so' suun tucuachran' nii tacóo nij sí noco' rihaan rcutze yo' che'é rej ra'yanj doj cavi' nij so', gaa ne quirii yanj nii man nij sí cavi' yo' a. ³²Qui'yaj Pilato ndaa vaa cachín ni'yaj nij so' rihaan so', ne ca'anj nij tanuu, ne asino tucuachran' nij tanuu tacóo yo'o sí noco' rej x'nuj Jesucristó, gaa ne tucuachran' uún nij tanuu tacóo sí noco' níchrej x'núu Jesucristó uún a. ³³Tzaj ne gaa cuchi' nij so' rej noco' ma'an Jesucristó, gaa ne xcaj nij so' cuentá se vaa aj cavi' so', ne che'é dan ne tucuachran' nij so' tacóo so' ma'. ³⁴Tzaj ne yo'o tuvi' nij tanuu nicaj xrúun so' chruun taj aga' sihaa raa, ne cho'oj so' x'núu Jesucristó, ne nu' qui'yaj so' danj, ne nu' cavii ndo'o ton do', na do', rej catúj aga' sihaa yo' a.

³⁵Ne síi taj xna'anj nana nihánj me se sij quene'en nu' se vaa guun me so', ne ya vaa se-nana so', ne ne'en so' se vaa ya a'mii so', ne taj xna'anj so' nu' nana nihánj che'é rej cuchuman rá soj sij nayaa nana nihánj ni'yaj soj Jesucristó a.

³⁶O se guun nu' nihánj che'é rej quisij ya nu' nana nihánj nana no rihaan danj Diose, se vaa taj yo': "Se cachran' a 'ó cúu man so' ma'", taj nana no rihaan danj Diose a. ³⁷Ne yo'ó nana ro', taj: "Ni'yaj nij so' man síi cho'oj ma'an nij so' aga' man a", taj yo'ó nana no uún rihaan danj Diose a.

Nana nihánj taj xna'anj daj
guun gaa cachin' nii man
Jesucristó rque yu'uj yuvej a

³⁸Quisij qui'yaj nij tanuu danj, gaa ne cachíin ni'yaj síi cu'naj José síi cavii chuman' Arimatea rihaan síi cu'naj Pilato se vaa ca'vej rá síi cu'naj Pilato quirii yanij so' man Jesucristó a. Ne xa' síi cu'naj José yo', tzaj ne sij tucu'yón se-nana Jesucristó me so', tzaj ne maan se noco' yuve so' man Jesucristó, che'é se chucu'vi' so' ni'yaj so' man nij síi uun chij rihaan nij yuviij israelitá a. Dan me se ca'vej rá síi cu'naj Pilato, ne che'é dan quirii yanij síi cu'naj José man Jesucristó a. ³⁹Ne vaa síi cu'naj Nicodemo uún, ne sij cuchi' rihaan Jesucristó rej niij asij rque doj me so', ne ca'anj so' ga síi cu'naj José yo', ne cata so' ico chi' kiló taj doj squíi cu'naj mirra nachej ga se cu'naj áloe a. ⁴⁰Dan me se tananij roj so' man Jesucristó, ne nucutáj roj so' mantá sa' man nu' nee man Jesucristó, ne caraa roj so' mirra

do', áloe do', rque mantá yo' a.

Dan me se tucuáán noco' nij yuviij israelitá gaa achin' nij so' man nij síi cavi' qui'yaj roj so' a.

⁴¹Dan me se nichrun' rej cachrón nii man Jesucristó rihaan rcutze ro', naj 'o naa chruun, ne rque naa yo' ro', táa yu'uj rque yuvej rej achin' nii xngá a. Tzaj ne yu'uj naca me yo', ne a 'ó xngá ne cachin' nii rque yu'uj yo' ma'. ⁴²Dan me se güii 'yaj chuvii nij síi israelitá cha' nij so' cha'anj pascuá me yo', ne nichrun' naj rej taj yu'uj yo' ga rej nicun' rcutze yo', ne che'é dan cachin' roj so' man Jesucristó rque yu'uj yo' a.

Nana nihánj taj xna'anj daj guun gaa
quisij cunuu i'na' uún Jesucristó a

20 Dan me se taxrej cotungó vaa rmi' doj, ne ca'anj chana' cu'naj Mariá Magdalena rej taj yu'uj rque yuvej yo', ne quene'en no' se vaa taj yanij yuvej aráán rihaan yu'uj yo' a. ²Che'é dan cunanj no', ne cuchi' no' rihaan síi cu'naj Simón Pedró do', rihaan yo'ó síi tucu'yón se-nana Jesucristó síi 'ee rá Jesucristó man do' a. Ne cataj no' rihaan roj so':

—Quirii nii man síi 'nij ra'a man ní' rque yu'uj nanj á. Ne ne me rej ca'anj nicaj nii man so' a ma' —taj no' rihaan roj so' a.

³Che'é dan cavii síi cu'naj Pedró ga yo'ó síi tucu'yón se-nana Jesucristó yo', ne ca'anj roj so' rej taj yu'uj yo', ⁴ne cunanj roj so', ne ra'yanj doj cunanj yo'ó so' rihaan síi cu'naj Pedró, ne so' me síi cuchi' asino yaan doj tu'va yu'uj yo' a.

⁵Gaa ne ni'yaj so' rque yu'uj yo',

ne quene'en so' rej naj nij yatzíj, tzaj ne ne catuu so' ma'. ⁶Dan me se cuchi' síf cu'naj Pedró síf noco' xcó so', gaa ne catúj ma'an Pedró rque yu'uj yo', ne quene'en so' rej naj nij yatzíj, ⁷ne quene'en so' vitó aráán raa Jesucristó, tzaj ne nuvi' yo' naj rcua'aan ga yo'ó nij yatzíj a ma'. Tananj rej yaníj quinaj orún' yo', ne nacu'lu' yo' a. ⁸Dan me se catúj uún yo'ó síf tucu'yón se-nana Jesucristó síf cuchi' asino yaan, ne quene'en so' nij yatzíj yo', gaa ne cuchumán rá so' se-nana chana cu'naj Mariá Magdalena yo' a. ⁹Q se ataa nari' roj so' nana no rihaan danj Diöse se vaa cavi' Jesucristó gaa ne cunuu i'na' uún so' a. ¹⁰Dan me se cavii uún roj síf tucu'yón se-nana Jesucristó yo', quinan' roj so' a.

Nana nihánj taj xna'anj se vaa quene'en chana cu'naj Mariá Magdalena man Jesucristó a

¹¹Ne canicun' chana cu'naj Mariá nichrun' tu'va yu'uj yo', ne ta'vee ndo'o no' a. ¹²Ne quene'en no' vij se-mozó Diöse nuu yatzíj catzii, ne ne roj so' rej cachin' nii man Jesucristó a. Yo'q so' ne rej raa Jesucristó, ne yo'ó so' ne rej tacoj Jesucristó a. ¹³Gaa ne xná'anj roj so' man chana cu'naj Mariá, cataj roj so':

—Me che'é ta'vee so', ga man nocoj —taj roj so' no no' a.

—Ta'vee 'unj che'é se quirii nii man cúú man síf 'nij ra'a manj, ne ne me rej ca'anj nicaj nii man so' a ma' —taj no' rihaan roj so' a.

¹⁴Síj ca'mii no' danj, gaa ne canicaj no' rej xco' no', ne quene'en

no' man Jesucristó, nicun' so' rihaan no' a. Tzaj ne ne cunuu yaan no' man Jesucristó a. ¹⁵Gaa ne xná'anj Jesucristó man no', cataj so':

—Me che'é ta'vee so', ga man nocoj. Me síf nanó' so' ga —taj Jesucristó no no' a.

Dan me se guun rá no' se vaa sij tumé naa naj yo' me síf ca'mii ga no', rá no', ne che'é dan cataj no':

—Sese quirii yaníj so' man so', ne cataj xna'anj so' rihanj me rej ca'anj nicaj so' man so', ne nicaj 'unj man so' ca'anj 'unj á —taj no' rihaan síf nicun' rihaan no' a.

¹⁶Gaa ne cataj Jesucristó:

—Mariá —taj so' a.

Canicaj no', cataj no':

—Raboni —taj no' rihaan so' xna'ánj hebreo, ne dan me se "maestro" me se taj nana ca'mii no' rihaan so' a.

¹⁷Gaa ne cataj Jesucristó rihaan no' a:

—Ca'ne' rá so', se catzii so' doj manj ma'. 'Q se ataa cavii uún 'unj quínán' 'unj rihaan Réj Diöse, ne me rá 'unj ca'anj so' rihaan nij tinúú 'unj ne cataj xna'anj so' rihaan nij so' se vaa cavii 'unj quínán' 'unj rihaan Réj, ne so' me se Rej soj me uún so', ne Diöse síf noco' 'unj me so', ne Diöse síf noco' soj me uún so' adonj —taj Jesucristó rihaan chana cu'naj Mariá a.

¹⁸Dan me se ca'anj chana cu'naj Mariá Magdalena, ne nata' no' rihaan nij síf tucu'yón se-nana Jesucristó se vaa quene'en no' man síf 'nij ra'a man ní', ne nata' no' nij nana cataj Jesucristó rihaan no' a.

Nana nihánj taj xna'anj daj guun gaa cuchi' Jesucristó rihaan nij síf tucu'yón se-nana so' a

¹⁹Dan me se rej ti'nuu ma'an güii cotungó yo' me se caráán nij

sí tucu'yón se-nana Jesucristó ta'yaa rihaan ve' man nij so', che'é se cuchu'vi' nij so' ni'yaj nij so' nij sí uun chij rihaan nij yuvií israelitá a. Gaa ne ca'na' Jesucristó, ne canicun' so' tanuu rej man nij so', ne cataj so':

—Gaa dínj nimán soj ei —taj Jesucristó rihaan nij so' a.

²⁰Quisíj ca'mii so' danj, gaa ne tihaan so' ra'a so' tihaan so' x'núú so' tihaan so' rihaan nij so' a. Gaa quene'en nij so' nu' yo', gaa ne guun niha' uxrá rá nij sí tucu'yón se-nana so' ni'yaj nij so' man sí 'nij ra'a man ní' a.

²¹Dan me se yuún ca'mii Jesucristó rihaan nij so', cataj so':

—Gaa dínj nimán soj ei. Ase vaa ca'néé Réj manj ro', danj gaa ca'nej 'unj man soj nu' rihaan chumii nihánj adonj —taj Jesucristó rihaan nij so' a.

²²Quisíj ca'mii Jesucristó danj, gaa ne ca'yánj Jesucristó rihaan nij so', ne cataj so':

—Nícaj soj Nimán Diose nihánj á.
²³Ne sese cataj soj se vaa navij cacun' tumé me ma'an yuvií, ne quinavij nu' cacun' tumé so' a. Ne sese cataj soj se vaa se quinavij cacun' tumé me ma'an yuvií, ne veé danj gaa quitaj nu' cacun' tumé so' xráá so' nu' cavii nu' ca'anj uún a —taj Jesucristó rihaan nij sí tucu'yón se-nana so' a.

**Nana nihánj taj xna'anj daj
guun gaa quene'en sí cu'naj
Tomás man Jesucristó a**

²⁴Dan me se yo'ó tuvi' chujij nij sí tucu'yón se-nana Jesucristó me sí cu'naj Tomás, ne yo'ó se-chuvii

so' me Dídimo a. Ne nuvi' so' ne ga yo'ó nij so' gaa cuchí' Jesucristó rihaan yo'ó nij so' ma'. ²⁵Che'é dan cataj xna'anj yo'ó nij sí tucu'yón se-nana Jesucristó rihaan Tomás se vaa quene'en nij so' man sí 'nij ra'a man ní' a. Tzaj ne cataj Tomás rihaan nij so' a:

—Sese se quene'en ma'anj rej catúj caquíí ra'a so', ne sese se cutaj ra'aj rej catúj caquíí ra'a so' do', sese se cutaj ra'aj rej quiran' chí'ii x'núú so' do', ne daj chihaa míj se cuchumán raj se vaa cunuu i'na' uún so' ma' —taj sí cu'naj Tomás rihaan nij so' a.

²⁶Dan me se cachén tunj güiii, ne man uún nij sí tucu'yón se-nana Jesucristó, ne ne sí cu'naj Tomás ga nij so', ne dan me se raan nij ta'yaa, tzaj ne taj ni'yón, ne naruvi' Jesucristó tanuu yan man nij so' a. Ne cataj so':

—Gaa dínj nimán soj ei —taj so' rihaan nij so' a.

²⁷Gaa ne cataj so' rihaan sí cu'naj Tomás a:

—Tucua'anj so' ra'á so' nihánj, gaa ne xcaj so' cuentá daj vaa ra'aj, ne cuta' so' ra'á so' x'núú 'unj nihánj rej catúj chruun lanzá, gaa ne guun ya ya rá so' se vaa cunuu i'na' uún 'unj á. Cuchuman rá so', ni'yaj so' manj á —taj so' rihaan sí cu'naj Tomás a.

²⁸Gaa ne cataj sí cu'naj Tomás rihaan so' a:

—So' me sí 'nij ra'a manj, ne so' me Diose sí nocoj adonj —taj so' rihaan Jesucristó a.

²⁹Gaa ne cataj Jesucristó rihaan so' a:

—Uun daj quene'en yá so' manj, gaa ne amán rá so' ni'yaj so' manj

nanj á. Tzaj ne vaa che'é guun niha' rá nij síi ne quene'en manj ne amán rá ni'yaj manj ei. 'O se cavii sa' ya nij so' adonj —taj Jesucristó rihaan síi cu'naj Tomás a.

Nana nihánj taj xna'anj me che'é cachrón síi cu'naj Juan yanj nihánj a

³⁰Dan me se vaa uxrá yo'ó nij suun sa' nocoo qui'yaj suun Jesucristó quene'en nij síi tucu'yón se-nana so', tzaj ne taj vaj nana che'é yo'ó nij suun sa' nocoo yo'ó nó rihaan yanj nihánj, ³¹tzaj ne no nana nihánj rihaan yanj nihánj che'é rej yo'ó cuchuman rá soj sij nayaa nana nihánj se vaa Jesucristó ro', me síi ca'néé Diose tjanii man yuvii rihaan sayuun, ne ta'nij Diose me ya uún so' ei. Ne che'é se amán rá soj ni'yaj soj man so' ro', che'é dan gaa i'na' nimán soj rihaan Diose nu' cavii nu' ca'anj che'é ma'an Jesucristó chuguanj.

Nana nihánj taj xna'anj se vaa nari' tuvi' uún Jesucristó ga chij nij síi tucu'yón se-nana so' a

21 Cachén doj, gaa ne cuchii' uún Jesucristó rihaan nij síi tucu'yón se-nana so' rej nuu na lacuaná cu'naj Tiberias a. Ne nihánj me se vaa qui'yaj so' a. ²Aj cunuu chre' síi cu'naj Simón Pedró do', síi cu'naj Tomás Dídimó do', Natanael síi cavii chuman' Caná chuman' naj estadó Galilea do', roj ta'níi síi cu'naj Zebedeo do', yavíj síi tucu'yón se-nana Jesucristó do' a. ³Gaa ne cataj Simón Pedró rihaan yo'ó nij so' a:

—Ca'anj 'unj tiguíj 'unj nanj rque na quirij xcuj, raj chuguanj —taj so' rihaan nij so' a.

—Ca'anj ní' chiha' —taj yo'ó nij so' rihaan Simón Pedró a.

Gaa ne cavii nij so' catúj nij so' rque rihoo chéé rihaan na, ne nigan' qui'yaj suun nij so', tzaj ne a' lo' xcuj ne quirij' nij so' a ma'.

⁴Dan me se taxrej yo'ó güii me se nicun' Jesucristó tu'va na lacuaná yo' a. Tzaj ne ne quene'en nij síi tucu'yón se-nana so' se vaa ma'an so' me yo' a ma'. ⁵Dan me se cataj Jesucristó rihaan nij so' a:

—Vaa doj se chá rihaan soj na' —taj Jesucristó, xná'anj so' man nij so' a.

Taj ma' —taj nij so' a.

⁶Gaa ne cataj Jesucristó rihaan nij so' a:

—Tiguíj soj nanj rque na rej x'nuj rihoo rej nuva' rihoo, ne quirij' soj xcuj ei —taj Jesucristó rihaan nij so' a.

Che'é dan tiguíj nij so' nanj ndaa vaa cataj Jesucristó, ne caraa nu' nanj, qui'yaj xcuj, ne ne guun nucuaj nij so' cuxuun nij so' nanj a ma'. ⁷Che'é dan ca'mii 'o' síi tucu'yón se-nana Jesucristó síi 'ee rá Jesucristó man rihaan Pedró, cataj so'!

—Síi 'nij ra'a man ní' me yo' ei —taj so' a.

Dan me se cuno Simón Pedró nana se vaa síi 'nij ra'a man ní' me yo', gaa ne che'é se aj quirii so' se-cotoo so', che'é dan nanuú ra'yanj so' se-cotoo so', gaa ne tagüéj so' man so' rihaan na yo' a.

⁸Tzaj ne yo'ó nij so' ro', quináj rque rihoo yo', ne tiguíj nij so' chruun man rihoo yo', ne nicaj nij so' rihoo ca'anj nij so' ndaa tu'va na lacuaná yo', ne orún' cientó metró

tigu'ij ra'a nij so' man rihoo rque na, ne_cuxuun nij so' nanj caraa xcuaj yo' rej tu'va na a. ⁹Ne_nu' cuchí' nij so' rihaan yo'óó, ne_quene'en nij so' 'o ya'an nachráj Jesucristó, ne_táá nee_xcuaj do', rachrúún do', ruvaj yo' a. ¹⁰Gaa ne_cataj Jesucristó rihaan nij so' a:

—Nícaj soj doj xcuaj quirii soj ca'na' soj ei —taj Jesucristó rihaan nij so' a.

¹¹Che'é dan cavii Simón Pedró, ne_cuxuun so' nanj yo' rihaan yo'óó a. Ne_caraa 'o cientó táá yav'ij chihaa cha'núj xcuaj rque nanj yo' a. Ne_nda' se 'ee ndo'o nij xcuaj, tzaj ne_n sin' nanj ma'.

¹²Gaa ne_cataj Jesucristó rihaan nij so' a:

—Cuvá' soj, cha_ruvá soj ei —taj so' rihaan nij so' a.

Ne_a 'o nij síi tucu'yón se-nana Jesucristó ne quisij rá xna'anj man so' me síi me so' a. 'O se aj quene'en nij so' se vaa síi 'nij ra'a man ní' me yo' a. ¹³Gaa ne_ca'na' Jesucristó, ne_nicaj so' rachrúún do', nee_xcuaj do', rqué so' man nij so' a.

¹⁴Dan me se quisij va'núj nari' tuvi' Jesucristó ga_nij síi tucu'yón se-nana so' gaa cunuu i'na' uún so' a.

¹⁵Dan me se gaa quisij chá ruvá nij so', ne_xná'anj Jesucristó man Simón Pedró, cataj so':

—Cunó so' ca'mij, Simón ta'níi Jonás. Doj a 'ee rá so' manj rihaan nij síi nihánj na' —taj Jesucristó, xná'anj so' man Pedró a.

—Ne'en ma'án so' se vaa 'ee raj mán so', Señor —taj Pedró rihaan Jesucristó a.

—Ve'é rque so' cha_daán 'unj matzinj á —taj Jesucristó ni'yaj Jesucristó nu' nij síi noco' man so' a.

¹⁶Gaa ne_xná'anj uún Jesucristó man Pedró, cataj so':

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó rihaan Pedró a.

—Ne'en ma'án so' se vaa 'ee raj mán so', Señor —taj uún Pedró rihaan Jesucristó a.

—Ve'é tumé so' man daán 'unj matzinj á —taj uún Jesucristó, ni'yaj so' nu' nij síi noco' man so' a.

¹⁷Gaa ne_cataj uún Jesucristó rihaan Pedró:

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó, ne_veé danj quisij va'núj xná'anj so' danj man Pedró a.

Dan me se quinanó rá Pedró che'é se quisij va'núj xná'anj Jesucristó danj man so' a. Gaa ne_cataj uún so' rihaan Jesucristó a:

—Ne'én so' cunudanj, Señor. Ma'án so' ne'en se vaa 'ee raj mán so' ei —taj Pedró rihaan Jesucristó a.

—Ve'é rque so' cha_daán 'unj matzinj á. ¹⁸Cuano nihánj me se cataj yá yá 'unj rihaan so' se vaa gaa mé so' síi tachruu, ne_numij ma'án so' yatzij catuún so', ne_chéé so' me rej me ma'an guun rá so', tzaj ne_asa' guun chij so', ne_ticún so' ra'á so', ne_yo'ó so' numij catuún so', ne_nicaj so' mán so' ca'anj so' me rej me ma'an rá so' ca'anj so', ne_nda' se na'vej rá so' ca'anj so', tzaj ne_vaj so' ei —taj Jesucristó rihaan Pedró a.

¹⁹Ne nana cataj Jesucristó rihaan Pedró, tzaj ne nana yo' taj xna'anj se vaa ticavi' nii man so', ne ca'mii sa' yuvii che'é Diose, qui'yaj so' a.

Gaa ne cataj uún Jesucristó rihaan Pedró a:

—Yo'ó canocó' so' manj ei —taj Jesucristó rihaan so' a.

²⁰Gaa ne canicaj Pedró, ne quene'en so' man yo'ó síi tucu'yón se-nana Jesucristó síi 'ee rá Jesucristó man a. So' ro', me síi cayáan rej x'nuj Jesucristó gaa chá xti'no nij so' gaa rque, ne so' me síi xná'anj man Jesucristó me síi tacuachén man Jesucristó rihaan nij síi taj ri'yunj man Jesucristó gaa chá xti'no nij so' gaa rque a. ²¹Dan me se gaa quene'en Pedró man síi 'ee rá Jesucristó man yo', ne xná'anj so' man Jesucristó, cataj so':

—Daj quiran' síi nihánj ga, Señor' —taj so' rihaan Jesucristó a.

²²Gaa ne cataj Jesucristó rihaan so' a:

—Ne sese me rá 'unj yo'ó gaa i'na' so' rihaan chumii ndaa se ca'na' uún 'unj rihaan chumii nihánj, ne

nuvéé se-suun ma'án so' me yo' ma'. Yo'ó canocó' ma'án so' manj ei —taj Jesucristó rihaan Pedró a.

²³Che'é dan cha'nuu nana nihánj sca'núj nij tinuj nij so', ne guun rá nij so' se vaa daj chihaa míj se cavi' síi tucu'yón se-nana Jesucristó yo' a. Tzaj ne ne cataj Jesucristó se vaa ya ya se cavi' so' ma'. Maan se cataj uun so' nana: "Sese me rá 'unj yo'ó gaa i'na' so' rihaan chumii ndaa se ca'na' uún 'unj rihaan chumii nihánj", me nana ca'mii Jesucristó a.

²⁴Dan me se síi tucu'yón se-nana Jesucristó nihánj me se so' me síi cataj xna'anj che'é nu' rasuun no rihaan yanj nihánj, ne so' me síi cachrón nana rihaan yanj che'é rasuun nihánj, ne ne'en núj se vaa ya uxrá nu' vaa nana cataj xna'anj so' ei. ²⁵Ne vaa que'ee doj rasuun qui'yaj uún Jesucristó, tzaj ne sese cachrón nii nu' nana che'é 'o 'o nij rasuun rihaan yanj nihánj, ne se quisíj chumii nihánj cumān cunudanj nij yanj libró yo' rihaan chumii nihánj, rá 'unj a ma'.